

Ramadan Barka

ATAGA GÉNÉRAL

RAMADAN BARKAI MOUSCOU

1960 - 1995



Langue : Tudaga (Toubou) - parlé :

- au Tibesti au Tchad
- au Kawar au Niger
- au Fezzan et Koufra en Libye

Traduction du titre : Général Moscou et son invention

Saisi sur l'ordinateur : Abdolsalam Wahali Brahim

Révision et correction : Abdolsalam Wahali Brahim
Kandamai (*Mark Ortman*)
Ôyi Mahûmut

Design, mise en page : Dočuiř (*Anja Neuhaus*)
Kandamai (*Mark Ortman*)

Première édition : 50 exemplaires (avril 2026)

© 2026 Centre culturel Palmeraie



**TUDAGA
DAZAGA
KANEMBU**

Sagahunu soyû turonnuu-ã 1965	6
Gorsu komboĩ Oozuu-ã : Mars 1968.....	14
Sagahunu Abdullai hi Bordo činakã 1965	16
Yibe têhiĩ yanduu-ã : 1969.....	22
Sagahunu Haya karanurã 1969-1970.....	25
Sagahunu Adum Tôgoi hi Haya huzanurã 1978	38
Sagahunu bûnnu arbataš-ã karaha-ã su naarã : Mars 1980 .	61
Lôko Kûssiri taranğurã	74
Sagahunu Algerie tigirtã : 1982	77
Gorsu Gûroo-ã : 1	82
Gorsu Hayaa-ã	96
Sagahunu yogodi-ĩ Haya zoduã	101
Gorsu Wañaņaa-ã 1983	105
Sagahunu Gûkuni hi Tripoli a ŋuyindã : 1986	106
Sagahunu Oozu yara du tigirtu Yibi lukurã : 1986	119
Sagagunu Hada toburrã : 1987.....	127
Sagahunu Hîsen Wadî Dôm çoņã : 1987	128
Sagahunu Bordo yari di tigrĩ : 1987.....	132
Lôko Njamina tigiri	134
Sagahunu êĩ kônurã : Decembre 1993	147

Tani *général* Ramadan Barkai čer nur budi lûyindĩ *général* Mouscou lûduyindi. Tani 1953 Bordo numeĩ turo Muska čindĩ du tudobus.

Lokol nurã Muskaa yernuru ma Bordo numi-ĩ tigiri karaniri. 1960 kôwuro to lokol tûduus. 1969 ŋgiringĩ Bordo di karanaar. 1969 čoŋu 1970 ŋgiringĩ Haya tidedu ni Haya du karanaar. Tûgi yîsii-ĩ ŋgiringĩ Haya karanaar.

To di bu sohi lokol *Supérieur* aya Njamina tiri ni *Institut Supérieur de Gestion* to di du *certificat* maar. Ôwonni *manegement* čindĩ to ni gunna karanaar. Kôï to di lokola nurã karanuru yina tada ha su tigiri.

Yoo, gudi hunã tani ndobusi nurã Bordo di tudobus. Bordo di tani odo kunu aŋgaltuduno di bu ; yina togusã, tada gunna kunu, kunu du anna-ã ha haduru yeri. Dîne-ã du njîde tûrtu togusoo, nuro yunu durumma anna-ã ha hadummó di, četu nunohoo, yunu nuũ tamma četu nunohudo. Toi yiŋgaldu gubi yê sogohi yê yina tohudã, gunna odu haturu nendiri.

SAGAHUNU SÔYU TURONNUU-Ã 1965

Yire du Naharu-ã (1964) Bordo di čuruk. To di bu ôskoro Čadiana-ã Bordo leo. Odu Bordo lidu ni, hôuluu *Lieutenant* Rôdai Samuel čindĩ aũ to sũ-pîrefe kôî to di ôskoro čikã muro bui. Ôskoro-ã muro, anna kuna ni adaga numia-ã hanayundú. Anna buya-ã mura daha-ã ôskoro-ã hôuluu lida ni adaga numi-ĩ du čikã hanayundú. Adaga numia-ã hananummó tohoo, yina šišaa togusidi.

Ôskoro kuna-ã yum turo abigo tûrrã, anna kuna numi-ĩ du čikã četu gowo. Četu gokã, kôî to di sôyu turo nos. Yum gokĩ tani kômma ha tugó, čiidî ôro Tûskiĩ a tîyiidi gorsu-ã togus. Togusã, odu sôlli maarsu-ã tohudo taa yernduru dî Muska lukuri nduru, Tûskiĩ a tani yê odo lau nur turo yê yernduru lukurĩ daŋammi tûruzi-ĩ hi tigirdã adibi wûyini. « Adibi a wûyinĩ ŋga lukuru waha torkar to gunnoó dî numi-ĩ tigrtoo, anna-ã ha ndû nduru hatiri » ndar.

Zabtudundu, kôî to daŋammi hi tûruzi di wô čaŋguru, tûgi to sũ-pîrefe-ã ha tugurkuru labtan-ã ko-ĩ hi tugurkurã, labtan-ã du tabul turo ho aũ gûrti di yîsu čî. Odu du landirĩ tîyikiidi, aũ turo yuhadi čêne-ã dogu nduũ yûsurru čunu boktiyuo.

Odu wô tugurkurã, adibi a Hatimĩ ndirĩ wûyini « Yîdirsi ndoo, Yîdirsi ndoo » čini.

Odu tunda norko tigirtu hinar « Nûgoi Yîdirsi nga di tedo » ndar ?

Yina tada gunna hindirî, yunu dahu makurdo yugó. Kôî to hi wô numi-î du lukar. Wô du tudugandî tîyikiidi gîmie guru kôî turoa tugandî čûku durtaar. « Kahuda-ã yîridu » čuo.

Tani yê odo lau nurã Sugiî yê tunda čû. Odu lukurî tigirtã, njaka, njaka tiyendã, yarku čundu tuyuhado. Odu yarku čundã, tunda yarkaar, ma yê dî yê gunna šiša du yarkaar. Tani wô dahu yeru yaaru numi-î tuguurã aũ durrú. Môido Tôido-ã hananiri ; yaabi-î tidedî tigrî du aũ čide yugó ; orro do mannu yugó.

Odu kobo turo čî maaru, hornuru su tîš. Neñirî tûgohu saa tûdušu, yusu kor yernaar. Yernuru dî tuguurã, tûgi a ngo ôlogorde-ã tigrî, sôyu turo adiba čû yê ômuri turo yê čusči yida dogu du zîi di tuyudurã, korro tiyenu : « Hêi, odo to sus, sus » čunu tudus.

Odu têi liî : « Yalla, anna ada četu yûsurru » čî.

Odu čustuyundu dañammi tiyiigitu, yaabiî tûkuliî turo du tertuyundu tûyuuño. Adiba-ã du, adibi turo-ã ači Alahai Sugumi ayî hunu, ômuri-î ni Abduraman ndirî Arrahã Tongošã ômuri hunu. Ômuri to yê odu dañaî sêlil tûkuliî turo ma du sûusu čunu du tûyuuño. Dañammi muro lôko to ka hunã gala gunú. Bîrmile mbia-ã to koa yugopu

hîričundu daŋammi ka-ã tududa. Daŋammi du tîyikã, tani huuria-ã du goŋuru yiga bî laniri.

Kunu čî gunna anna du yigiiti, zûbčindi, adiba-ã ha zîi di laniri, zûbčindi. Daŋammi saraa čû yida. Lau turo-ã du gûhi tugopudo ômure-ã ha du « yûsurru » čindi. Zûbčindi ma du čûuŋgi, adiba-ã ni ŋgirigo di čûo, du gunna zûbčindi. Kôï to di tani goŋuru zîi di laniri. To koo kohidirî, de numi-ĩ du aũ yusopudo yugó. Dî Muska mannu tigirtu ači ayî nurã na dada nurã na ha mannu yigiitu daŋammi du čûuŋgu gunna ha zûbčuo.

Boogur Bôloi na gîmie Anur Kôsoi mi na tada mannu du čûku zîi di duraar. Boogur Bôloi dahu hunã tedã gunna guro borsu. Odu dî lanirî, tani njii, anna teitã ha « Nûgoi nuru hinuroo, hanandurú čindi. »

Ndû mannu yunu dahu maardo yugó.

Odu tûyuku kunu odoorčunno kor aũ turo li. Mbo yaabi a di tûgohu anna mûkurã du čûku ni čunu li. Ko-ĩ horiyinã, ômure-ã yalla yuruku čundã, tani sa hundã hûi di luuru tûrizi di kôï ômure-ã du čûuŋgã hananiri. Du tigiri tobuzã, ômure koduro kora du bosu čûo. Gunna wonno borsa, aũ kubu yidado yugó. Gunna mbo du čûuŋgu, zûbčundu du bosu čûo.

Odu kôï to du tigiri ômure-ã du tobus. Du tîyikiidi sôyu turo Êdĩ čindi li. Anna-ã gunna ha su layini. Aũ su layinã

soma hunã mada tûrtu tohoo, kubo hunã yuaki « Unda yîri » čini.

Lôko amma tigiroo, sôyu-ã tataki tuzi : « Ayî nurã ŋgo tani hi tuyuha, abba nurã tuyuha, čini. Aũ hu lôĩ di yubũú, korčo di babũú, bũnnu du babũú, a koo di yubab » čini.

Odu dôoni hunu huraa-ã njoko a ammaa zobka čenoo, amma dî ataga tuzoo koraa toburri. Sũgoi layinoo, aũ gudi hi čuduroo « Yîri » čini : « Odu abba nurã ŋgo tuyuha ayî nurã tuyuha » čini. « Aũ hu korčo di babũú, lôĩ di yubũú » čini.

To muro koo yuhadi anna-ã ha njaka čeni, njaka ada čeni, turo turo du lûyi čenî kubo hunã hartu.

Odu kôi to di tobusu tûyuku, anna-ã muro budi mundu tihesuda, Sîdi Adiliĩ mi yê yoo Lemai yê anna tada ndihei turo yihekã hakundu ôro yerčundú. Buruweta ha guyundu yidadu yigiitu anna-ã du čûdutu yûhudo. Odu anna guda-ã de gunna aũ ŋgullaha yidado yugó. De anna-ã asuba yidadú. De yunu-ã muro dahu čoŋgudo yugó. Gunna to koo di tihesuda.

Odu saa allahar tohudo, ôro matar-ã lau čôhuri kanji. Kunu tobusã « Yalla, anna-ã gunna yiga kuruku » čuo.

Odu yiga tugurkurã, aũ a bui ŋgo Haya čĩĩ ôzi hunã munurú, tedî liĩ, sũ-pîrefe-ã ha hiyi : « A ndũ ? » či.

« Adiba yê aũ a gunna daŋaĩ mûkumma. »

Adiba-ã ha : « Yalla kumandu yaaba nduã yûsurru » či.

Kômma su adiba-ã ha yaaba hundã keyi. Tunda ômure-ã du tîšu togo tûgohu tohudo gunna ha tûyuhudo. A mbozoo aũ aŋgal numa gali koo, anna çû gokudo tohoo, anna šaaba ma yê dî yê čîkã gunna ha yobuũ daŋaĩ mûĩ ni ? Yunu tûrtu gunú. Anna daŋammi du čîkã gunna yunu a sôbob daŋai zotuã aũ hanayinîe yugó.

Zogo sohi, kôĩ a gîmie-ã ha daŋaĩ yidadã ndabčunu, durdi-ĩ na Gûkuni Wêdei na ada hunã na tada gunna daŋammi du čûku, anna-ã gunna četu tiyihido. Mura daŋammi di čûkudo kor du mannu labar taturú.

Mbozoo, aũ gali aŋgal tammo tûrtu togusoo, anna çû gorsu yohudoo, anna šaaba numi-ĩ du čîkã yê yoo anna dogu du Zûgura na ma Zûi na čîkã tada ha ndigiri yobuũ gunna Bordo numi-ĩ kiiduũ daŋaĩ mûũ četu zûmiĩ tûrtu gunú. Sôyo ada hakumma lôko to hôuluu kegirčiniã mura aŋgal ôskoroo gunnoó, yunu gudi aŋgal du yidadú. To koo di yunu a gunna togu.

Yunu to yohudã yĩŋgaldu gorsu Čad du tohã gunna Tû du sôbobči yerči. Yunu to hi su sôbobčínã, šaaba ada tihesudã yê gîmie tihesudã yê gunna yunu to hi su muro. Nûgoi tunda ha numo ndurã du yina a tûrto tuyogusudã čundu budi wayuo.

To di bu sũ-pĩrefe-ã ha yodurku, Yĩtina Allahĩ ĉindĩ hi Bordo yũgurto. Yĩtina Allahĩ, aũ yodurkã du muro kubaga zondu. Kubaga nozundu hunã, anna-ã ha yertu numo nduma yibendu, tĩnne yũuŋgu, bara yũuŋgu ĉini. Aũ guru ni bari ĉũuŋje ĉĩ. Aũ guru ni ôroze hiliyĩnĩe ĉĩ. Anna-ã horkusa hundã gunna Ńĩša.

Yoo, aũ guru numo guru du yerĉi liwo, aũ to hi ĉudurtoo, « Yalla nũgoi horkusu kohumãã » ĉundu ĉoŋgu daŋaĩ duyindi, a zabĉindi. Yunu to hi su yina budi sũboboto guso. Yoo, ôwonnĩ adiba ĉũ gokoo, daŋaĩ mũũ hidiĩ gunnoó, adiba-ã ha yobuũ daha hundã hiduũ, díhini hundã toriĩ, yina to koa koiĩ tũrtu gunú. Bũgudi a Kũkoi ĉindĩ, Aniri Yisa do na díhi hundã, aũ to tunda daha-ã durtirĩ sũg a Bordoo-ĩ lũko to maršẽ ĉindĩ. Kũi to hi tedĩ ĉĩidi, gĩmie a Hĩseniĩ yuhadi : « Nũgoi nuro horkusa kohũũ nduganĩ » ĉi.

Amma yuhadi : « Tani horkusa kohurĩe yẽ kohurdó yẽ nuro ndũ koloko nuũ » ĉi.

Yunu to hi su ĉetu kĩdikidiyundu, miškile ĉenu, amma ha njoko ĉe. Amma muro mannu gĩmie-ã Hĩseniĩ hi njoko ĉe. Yunu to hi su gĩmie guda-ã tigirtu teterĉundu ĉoŋgu tũrri. Allahĩ bũro hunaã ĉĩidi wũ zĩi di ĉuduru. Ćudurũwo, wũ ĉaĩ tigiri « Yalla kumandu ôro kũrtudu » ĉi.

Amma terĉundu, tũrri tũgi sũ-pĩrefe-ã gubugi-ĩ du tigirtã, tunda ĉene-ã dogu du tudusu landirĩ, korĉo yẽ ôrku yẽ

yidadu amma ha yudopî, yudopî, amma nohudo čoŋgu bu labtan-ã taa nerkaa čî, burãkar su činaku tûko. Labtan-ã ko-ĩ tûkudã, logotori-ĩ yuha : « Du kûrtudũú, yigannu yusopu » čî.

Mura yuhati : « Nûgoi, nûgoi čindã. »

Logotori-ĩ yuhadiadu : « Tani aũ nohudo haki sura kohurú. Aũ nduma yoŋgu yûsurru šîdirandie noo, aya labtan-ã du kûrtudũú » čî. Aũ to kôî čîĩ hi čoŋgu tûrru šîdirayuo.

A dûski yuzogo saa yîsii yê murdom soũ turo yê kôidi soma ndurã čudurî yunu to gunna togus. Yunu to hi su yunu gunna sôbobčunu, aũ gunna sôyu-ã tunda ha a tuyogušĩ ndũ čundu. Anna-ã čuruku wô Lîbia tûrru horkusa yohudu bûnno čepu čoobo.

Yuson a koo yogus čindi, yuson a koo yogus čindî. Ôwonnî sôura turo agasiĩ yidĩ čindi, ma kôî turo du čî. Aũ to koo turo yuguruudo čundu, aũ gunna yunu to hi čaasu, numi-ĩ gunna odu bûnno guyundu sôura bôdiyuo.

Sôura Tû du bôdidinã gunna gali yê zondu yê yunu to hi su bôdidu. Gîmie-ã ha mannu yuayuakunu, gîmie-ã Šahai Šîdi mi na, yoo Darkalla Šîdi mi na, tada ha gunna durda tuga du ma yê dî yê miškile čenu. Durda tuga du ma Oozu na keyi.

Odu mura yuhati : « Dikundu tunda ha durda tuga du Oozu na kediyindĩ ndũ čundu, sôura-ã muro lôko to Êli Sugudu na, Kêbir Kêllel na ma dogu du čũo. Gîmie-ã tũrru anna tada četu hoktu. Aya ņgo Darkalla Šĩdi busau a Gitaa-ã du teitu tĩyo. Sôbob yunu a kohudumma ndũ nuru ? » hinar.

Muro yuhadi : « Yire du sôbob yunu a kohudurĩ gunna, sôura agasiĩ yidĩ čindĩ ma kôl turo du čl tubazo, čl. Tubasã, hakumma tunda ha somzũne he tiyendĩ, anna guru hu yiduru, yuso sôura a di tidewo gali gunnuũ nuru yunu to tuduņos, čl. Tuduņosã, tani yunu turo tardo kordu Šahai Šĩdi mi hanayi, čl. Odu tani hi sôortuyunu hidiyi » čl.

« Nuro yunu tamma ndũ dugusa ada aņgal numa ņgo gibi-ĩ koo gunnã nũgoi čunu hidiyunu yire-ã tuha » čl.

« Tani yunu tardo yugó » nuru hadar.

Ôwonni muro tuyuhadi : « Ā-á, yunu turo taũ njl, yunu tamma tuha » čl.

« Odu budi hidiyinle tohã yire-ã hadar, čl. Oguro a dl čl tunda ha durda tuga čunu, somzũne he tiyendĩ, yuso guru hu yiduru, ma anna ada agasiĩ yidadaã tided nuru yunu to orro di dunar » nuru hadar.

Muro tuyuhadi : « Yunu to koo oor du tawo gali miškile gunú. Nũ yire du aũ a tunda ha miškile tiyendĩ, anna ada

četu hoktudundu yunu yidadã dahu makuroo, to di bu yunu turo čûwo četu kohudar » či. Odu Šahai « Wuna mannu bazunnó di gûi di ma anna tada Kêbir na Êli Sugudu na aũ a agasiĩ yidĩ čindĩ na četu hoktu » či.

Odu Šahai tedĩ tigrĩ aũ a agasiĩ yidĩ hi hiyi či : « Sôura kohiri niĩ, ndũ taũ aya niri sôura kahiĩ, wuna na ha taũ, ndũ ni taũ sôura kahiĩ nuru hinar » či.

Hinurã : « Odu metur yaaba ŋalčindĩ yida, yodurã, a diruũ ! » či.

Aã nurã. « Torroo, kubo nurã ma yuaŋuroo, anna ma čikã čati. Dĩ yuaŋuroo, dĩ čikã čati. To koo di tani sôura tar. Duna taru tirido » či.

Muro hi hadiriadu : « Tunda ha čayadindiĩ, a yunu yaaba ŋalčindĩ gunnuũ, tunda ha yunu a koo čayadindiĩ, tunda anna to koo di čayadia gunú nuru » hadar či. Yunu to koo čunu ni Šahai yuha či.

Odu Šahai tedĩ liĩ yuhadiadu : « Anna ada yunu yidadudo yugó. Yunu ndur turo čûwo tunda tûmoore kohudirê gunnoó, zo dikundu yunu a agasiĩ yida na yina na čindĩ, yina ada du bara mannu yugó čunu tuyuhado » či.

GORSU KOMBOĨ OOZUU-Ã : MARS 1968

Odu to hi su yerturu yum sũbud-ã ôskoro-ã kuura kuboo ĉubapi. Landirĩ kuura hundã bõdiyundã : « Tunda kombommi du sũktudo » ĉi. « Sõyo dĩ ko-ĩ hi ĉĩkã haki aŋgaltundu bũnno ĉoopudo yugonnó di gunna ha yitar » ĉi. « Odu ko-ĩ hi Hasaniĩ Mũsai mi to koo di nos » ĉi. « Tunda guda-ã ŋgullahada numi-ĩ gunna Allah tiyendu kubaa makar » ĉi.

« Odu yum sũbud-ã to koo yohudã, yum lahad-ã Bordo a tĩyikiidi Allahĩ ma Zũi ĉuruu ted. Zũi a ĉĩidi, dũnogi odu yuzo ĉũluko tohudo. Yaabi a Mahuma Kandĩi-ĩ komboĩ nerkaa ĉi. Tobusu tĩyikiidi karaha ma du ĉi mude du yuguruu wõ komboĩ tũruzi di ted » ĉi. « Kĩnniĩ tobusã asubu a mõdii-ĩ koŋ, koŋ, koŋ wõ du sauyi » ĉi. « Sauyinã, bũgudi-ĩ Mahuma kandĩ kayuã huna ôskoria-ã ĉũuŋu mude di wõ ĉuruu ted. Kunu bozuã sũgoi tedĩ liĩ yuhadiadu : « Sohura-ã Oozu ĉubapu ĉoŋo, ĉundu yuhatudo, nũ to koo di ĉaĉabtudundu ma lukuri » ĉuo.

Odu bũgudi-ĩ huraša hunã guyunu wõ kombommi tigiri yĩsu tũgohu ma Oozu dahu ĉendu tũri. Zogo tohudo anna-ã ha hindurã, yire du sũbud-ã ĉubapu ni sõyu turo yê aũ mũše ada karayihidĩ yê mura ĉũ yum to Allah ĉenu ĉarku ĉuruku, togi-ĩ dũnogi ma Zũi tigiro.

Odu Zûi tigirtu, Allahî hi kôî to hi labarĉuo. Allahî ĉuruu Bordo tigiri ôskoro ĉoobu ma Oozu tiked ĉi. Kôî to di mura Darkalla na yoo Ôyi Bôgu na gîmie tada Šahai Šîdi mi na ĉetu gokî, ôskoro-ã ha zabyihido. Sûgoi Bordo lidu ôskoro guda ĉoopu ma tûrri. To koo yohidî, gubia yê sogohi yê yohidî, Allah ĉendu ma du ôskoro ĉûdudo.

Odu yunu to hi su sôura-ã gunna, duna guyi. Sohura yê anna Lîbia du tigirtu zûtuo. Zûtundu, to di lau Zuar lau gunna ma Adiliĩ Yûsuma mi na, mura mannu ŋgo wô Lîbia du ôskoro.

Kôî to di mura mannu asuba hunda yidao. Anna-ã gunna bûnno aširaa yê yoo bûnno Tiliyana yê yidao. Lôko to bûnno giba to kua gunnoó, asubu gudi yidadú. Yina tada yidadu, tigirtu Mursu su bozo.

Odu to koo di sôura-ã Tû du sagahunu (1968) duna guyunu bôdidu. Sûgoi durdi-ĩ ni kôî to di layinã budi somzûne he ĉindĩ yĩngaldu ĉuruu Lîbia ted. Lîbia tedã, Allahî sohi huzayi wô Lîbia ĉuruu tigiri. Odu Lîbia tigrĩ aũ ôskor bui diki wô numo a nirĩ ĉendu ĉoŋgu daŋai duyuo. Wô du ôbure dîšee kora daŋai di bos. Sûgoi yusobo.

Taa ĉuruu Bordo ted. Bordo tigrĩ, ĉendu enou bozudo yugonnó di yodurku *capitaine* Abdûlai (44) ĉindĩ to hi yûgurtudu Bordo di bui ĉinawo.

SAGAHUNU ABDULLAI HI BORDO ČINAKĀ 1965

Abdulai ligĩ gubudi yĩtina Allahĩ numi-ĩ gunna zonyodurdo. Numi-ĩ zondindĩ Allahĩ turonnu gunú ; gĩmie tuda-ã mannu kubo hundu du čĩ.

Gĩmie tuda-ã zaga du kubo yidadã ndũ nũwo : « Hakumma yina guru larmaduda čunoo, nuro yiga ndedo tũrtu togusoo, yina yigannu miškile yidadunnãá, tada ha mbozoo anna-ã ha su šer naú. »

Gĩmie-ã tugandĩ aũ ôrozi norriyi čĩdu čenoo, hakumma ŋgo lôommi larmadudo čunno yĩŋgaldu, gĩmie-ã amma ha lôĩ toruũ ôrozi a hi yĩduma čundu, amma ha šerčindi. Yina tada ha lanumo tũrtu tohoo, noor-ã numi-ĩ du buyini.

Kômo ada hakummaa čĩkã gunna du ŋgo Zũmuri ni gĩmie čũo, yoo Yibi ni gĩmie čũo, Wũr ni gĩmie čũo, Bordo yê Zuar yê Oozu yê du sôyo čĩkã gunnoó, kômo ada guda-ã gunna gĩmie-ã mura buya du čũo. Yina tada tohodu, Oozu tubapudo di bu, gĩmie hakummaa čĩkã mannu, gĩmie dômore hundã sôura-ã du tũrrã mura mannu dômore hundã ha čaasudu sôura-ã du tũri.

Numa tada gunna bũge yoho. Wũr yê Zũmuri yê Yibi yê gĩmie čĩkã gunna sôura-ã du tũri. Yibi ŋgo gĩmie Hayaa-ã čũo čĩidi, numi-ĩ yusopu tũri. Kômo ada gunna kubo sohuraa-ã du tũus.

Hakum bui dī čĩĩ layinã, Allahĩ numi-ĩ gunna du bibide duyunno yĩngaldu, Allahĩ hi dī barayunu, kōi hunã ha Abdulai 44 ndirĩ hi yũgurtu. Abdulai muro aũ mēdi yidanũ. Kōmo ada sohura-ã čĩkã ha de hidigunũ. Muro lōko horkusu-ã čendã, anna-ã ha čabčunu mēde huna yuhadĩ tani odo kunu tĩyi, čĩidi mēdi hunã ōwonnĩ yanuru tar. Yuhadiadu : « Kōi wũni hũnuũ dagizi hi susa (illa) mũwo yugurki yee yugurkunnũ ? Hōkorndũwo wenege du susa yugurkũ. Tani nũ kōi to koo hi tiri tobus, čĩidi tani ŋgullaha baranirĩ kōi anna-ã ha tigiri kũdukude na go na yerĩe tarũ » čĩ.

To koo di čĩidi, yum turo ōskoro huna Oozu čĩkã ha mašaa čeniē, ōskoro ma keyunu mašaa hunda čendu zabtundã, Oskodom tigirtã, sohura-ã četu hoktundu gorsu gowo. Ōskoro murdom sã čũ kubaa čoobo ; ŋuida-ã ha čitido yugó. Kōmma ha yũhutu hakumma mōori tigiri čoob. Ŋgullahada murdom sã čũ kubaa čoopã ha daŋaida yohudu dī Ōhodui tũri. Ōhodui a yidađu lōko hakumma četu yibedundã, Šahaĩ daŋaida-ã ha ŋgullahada du hakumma ha kedugu če.

Tumbulbai mannu budi lerči. Layinã ōskoro muro maša čeniã du mannu daŋaida-ã wortuda. Toi yĩngaldu yunu to hi su budi lerči. Abdulai muro ŋgullaha-ã barayinĩ yĩngaldu, dī Njamina du Tumbulbai, Togoĩ Okor mi yē Tahar Barkai yē he yara du Tũ kegirčunu : « Šigirtu miškile a Tũ-ã yibendu » čĩ.

Lôko to Togoï Okor mi ma Moŋgo du sũ-pîrefe-ã kubo hunu. To koo di mura čũ lidu, dî Hêremedou leo. Hêremedou nduroo, ěĩ šilli durusu turo bu Muska tũruzi-ĩ hi čĩ. Sohura-ã bugi-ĩ gunna kõi to mosko ndur. Kõi to di tĩyuku mura tũrri leo.

Gubudi Šahaĩ na anna guru hu čudurtu hoktuo. Yunu to hi su kunu kunu du gorsu-ã Abdulai 44 budi aũ orro di yidadannó yĩŋgaldu. Yĩgo bu Haya čĩĩ ôskoro yê asuba yê kegurčunu, gorsu du mēdi a yibendirĩe gunnoó, anna ada tunda ha ŋgullaha tiyendũ čunu, ôskoro kegurčunu muro sohi li.

To di bu ôskoro ma Oozu čĩkã nozommiri čunu ma ted. Ma tedĩ ôskoro kadura čũ du su čĩka yida. Tedĩ Oozu nerko tigirtã, kõi to di sohura ma ŋa čĩkã četu hoktundu gowo. Gokĩ ôskoro-ã ha zabyihido. Sohura taa čĩkã anna murdom sã hoo di gudi kanjundũ čĩidi, ôskoro-ã ha zabyihido. Zogo tani Yĩgo ho hinurã yuhadiadu : « Tunda ôskoro kadura čũ yê murta tuzoo yê » čĩ.

Tani muro hi hadiriadu : « Nura ha sohura zabnjihitã, sohura murdom sã hoo borsu » nar.

Yũgo yuhadiadu : « Yire mannu togusi. ěĩ a Tũu-ã gorsu hunã, gorsu tosu. Anna ndũ kora njũkoo mannu, anna-ã kundugu duyundoo zabnjihiti. Yunu to muro yire toguso » čĩ.

To koo di ôskoro tada kadura čû-ã ha zabyihido. Dî yugurkã, Walyî di sùgoi ôwonnî sohura guda dî čîkã četu hoktuo. Sohura dî čîkã, mura mundu, asab hundã murta dîšee yê sã dîšee yê, tada četu kuba hokuo. Gorsu to di muro Yisai Ôki mi na Hai Sûndo mi na Addi na anna tuzoo tada kôî to hi čado.

Ôskoro gabčindã tiri Zûi hi ligĩ hakundu tûrrunó tohu, to hi ma zabtundu tiri gibi ŋgo gorsu njûnjuui dînee-ã, tira guru ŋgo tûrra. Kômo guru karahaa hundã yudombu tarakyihitu, Direnau hu čuruku Zûgura ha wô Bordo tigiuro. Odu yunu to tohu layindã, Yîgo muro mannu arrakunnó togus. To di bu Yîgo dî Njamina Tumbulbai hi labarčunu, Hurãs su labaruũ, haduũ li sohura ada ha yihidîe gunnoó zaga gudi sohura ada čurukîe yugó čî.

Tumbulbai ŋgo gibi di Hurãs četu nohoa yidado yingaldu, odu Hurãs su barayunu ôskoro Hurãs ga leo. Ôskoro Hurãs gaa-ã lidî, lôko to tunda dî kôî turo Wônnođiriši ndirĩ Kadua dî agabka čû koraa mosko ndur kohudurdo du čaŋguru tîyo. Adiliĩ Yûsuma mi Zuar du čî lido. Muro hi bui ndur. Tunda ada kuna tîyo.

Tani lôko to kara yaabi dîšee-ĩ tîyi. Arbidia hundu. Êrbedige kômo keyindîe tohoo, arbinu čundu, arbinuru keyindi. Anna buya-ã gorsu Walyîi-ĩ tohu tûrri lidã, anna munduga-ã gunna tartuo. Anna Zuaruu-ã, Zuar tûri. Ko turo-ã anna Wondogoĩ na čîkã, Môlia Bûbuyina na Ôyi

Bôgu na Sêryeã Allahĩ na tada dı kastundu bosu, tiri to Wondogoĩ tedĩ lau lôko ha tugandu ma yugurku sa yugopi. Odu tada ni dı tũri, Zuaruu-ã ni Zuar tũri, to koo di anna-ã gunna tartuo.

Čĩidi Abdulai 44 kubo hunã yuaki yida. Yibe-ã de yusobo yugó.

To koo di čĩkiidi nahar-ã gunna gali di duna čenu, anna-ã labar yidadunnó di ôskoro Hurãs ga lidã tiri ma Tirennu hu tedĩ, anna-ã tiri to hi yugurki čindi. Tiri to gunna kohunu yibeyundu kũriyundu yidadu čĩkiidi, labar yidadunnó di ma ôskoro nahara-ã Yôdiri hi čuruku, kũriyundu, Oozu lau to di tugurku, sôyo hundã ha čoopu tũri.

Odu anna sohi čĩkã yuhado. Ôskoro lidu sôyo-ã ha čoopu tũri čuo. Dgo ôskoro Oozu čĩkã ôbure ôguzuu kora gunna maša hundã čôhuri-ĩ tigiri kũriyunu wô hiye čeni. Čôhuri-ĩ wô kuhu čenoo, guru ni sohura-ã čoopi, guru dohu tohoo sôyo-ã mura tigirtu čoopi. Odu to koo di yina tada turtadĩ, yohidĩ, maša hundu čongã haki wũni hũyundu yibeyundu čubudú. Bũni hundã ni kombommi du yidao, haki yiga čurukú. To koo di čĩkiidi lau to di naharu-ã kũriyunu tigiri čoobu yihi. Čurukudo di bu sũgoi, anna munduga-ã gunna yibe-ã ha čidakudo di yuhati.

Layindã ngo mannu noor du to koo di yerčundã gunnoó, anna ko turo-ã yunu doguu sôura yohidĩe yidadú. Yunu-ã

noor su yerči. Odu hakumma tugañ Allah yogusu, anna
sohura ko turo-ã četu hoktundu yibe he bozo.

YIBE TÊHIĨ YANDUU-Ã : 1969

Têhiĩ Yanduu nduroo, Muskaa dí di čí. Naharu-ã Bordo a čabtu li. Lôko to Šahaĩ Sîdi mi na Mahuma Mólmai na čikiidi, kabten Galôpeĩ li. Čigirtakî dugusa murdom kora yoho. Kôĩ to su anna nû číkã du Mardakore Adiliĩ mi, lôko to odo kunu lokol karadudo ; muro yê Êli Îsa mi yê arbidia hunda ŋgo Haya du karayundudo. To koo yohidĩ mura du neyuo. Anna-ã yibe he su bosã, anna guru dahu ŋgirenu yidao. Šahai Sîdi mi na tada yibe-ã čidaku. Odu kôĩ to hi su neyuo.

Anna díšee yuhati : « Yunu a muro tunda dahu tigirta gunú. » To koo čundu yerčundu yibe-ã du čuruku tûri. Kôĩ to neyindã, dogusu wô Sobtogĩ tigirtu, bûnno yihitu tômudu čuruku tûri. Čuruku tûrrã, noor anna díšee tadaã ha su sũgoi sôura-ã bugi-ĩ yunu to hi su bôdidu.

Lôko to Gûkuni Wêdei mi bu Zuar lau čí, Bordo kôĩ yibe-ã tohĩ lido yugó. To koo di sôura-ã bugi-ĩ togus.

Yina tada tohududo di bu, aũ yari du tuganĩ čĩĩ Abdulai 44, muro yibe-ã anna-ã četu yogus. Kôĩ to hi aũ gĩmie čidawo čer hunã arbiyuo ; anna mundu čera hundã arbiyundu gĩmie du čũuŋo.

Anna bosudo yugondunnãá sũgoi enou tohunnó di Njamina tûrru, mêde hundã gunna yuhatu tômuyuo.

Odu mašaa hundã guyundu dî di lidî, Daski tigirtã, Mahuma Môlimai na tiri turčundu yidadu, hoktundu gowo. Mahuma Môlimai yê Šahai Šîdi mi yê Kôsimi Mûsai mi na čado. Anna guda mannu čata čûo čîidi čera hundã yanuru tarú.

Odu sôura hundã yidadu, ma yê dî yê kunu, kunu du yohidî, anna ada ma čîkã Êli Sugudu na Kêbir Kêllei na, sôura-ã dahu durusu du yidadã četuo hoktuo. Dgo nooruu yingaldu yoho. To di bu ni sôura-ã dahu durusu Hûrolina yunu to tûrtu du guyundu yerčuo. Dgo Abadi ligî gunna aŋgal Hûrolinaa yida lido yingaldu, yunu Hûrolinaa yidadu čoŋgu tûri čûo. To di bu tani numi-î du lôko ha tidedi tigrî gunnoó, Bordo di yina tohudã gunna durru tarú.

Abdulai 44 muro dahu-ã lôko anna-ã bosudo di bu tani odo kunu numi-î du tuduganî tîyiidi, tuyuduru hidiyi : « Nuro odo kunu lokol karanî nuggonnuú ? » tiyi.

« Tani lokol karanî tîyi » nuru hadar.

Abdulai yuhadi : « Tûgi ndû korã karanî njî ? » tiyi.

Tani hadiriadu : « Tûgi dîšee-î karanî tîyi » nuru hadar.

Ôwonni yuhadiadu : « Sa giba ndûusi-î (*composition*) kohummo yuggonnuú ? » tiyi.

Tani hadiriadu : « Kohurdo yugó » nar.

Sûgoi tuyuhadi : « Aya mozoo, suru nuñ yidanú, Haya yusu karanu » tiyi.

Odu Abdulai čôhuri hi tiyinaa Haya kediyi.

SAGAHUNU HAYA KARANURĀ 1969-1970

Odu Haya tigrĩ ada lau nurā yê hoktudo. Tũgi dĩsee-ĩ tũduusu karanuru, sa giba ndũusi yaabi tũdušuu-ĩ yibenar.

Hayaa tĩyuku lokol karandirĩ mannu aŋgal ndurā sōura-ã ha sopurdo yugó. Tani na Êli Mahuma Kandĩ na Allači Ardia mi na Ôyi Îdiris mannu lau ndur, yunu kohidirĩe gunna, muro du tiyetunnoó mannu labar yida. Dohu tohoo, tani gurnad nur tar. Allači Ôli Bôrnoi mi bũnnĩ kunu-ã yida. Tudugandu sōyu durturoo hurnduru boŋgiri. Lôko guruo amma ha kuba hunã ôro kidekti hi nakiri. Yina to koa kohidirĩ, anna-ã yina a kua yohidi čundu yuhati, kunu abustiyihido. Odu yina ada bibida-ã gunna hũtaar.

Sagahunu 1973, tani yê Allači Alĩ yê Alĩ Mahuma Kandĩ yê yuso čôhuri-ĩ hi wũrnduru makuru Kuhura lukar nduru tuduŋoso. Čĩidi tunda ada kuna karandirĩ tĩyo ; gũrso taturú. Hôkorndurā tigrĩtu Barkai Anii mi, adurasu hunã Barkai Kono mi čindi, muro hi hatar : « Čôhuri ôgurinduru Ebeše lukurĩe gũrso baranuũ tendummoó tohú » ndar.

Muro hidiyuo : « Ndũ kohidĩ ? » či.

Tunda yire ndurā hatar : « Čôhuri wũrnduru Kuhura čaktorkiri nduru » hatar.

Barkai Kono mi tuyuhado : « A yunu ômuree kohidĩ njũo » či. Lôko to Hayaa yeruũ Ebeše ndedĩe ôguri

čôhunii-ĩ gŕso dŭbo ôguzuu. Tunda yunu orro di dundurã, lôko čôhuri-ĩ yerčunu eskenu-ã zodoó, anna čusčindiã ha gŭu du su yŭturu ma Kuhura lau dahu čeni, yenduru Ebeše tedŭadu yugó. To koo di gŕso dŭbo murdom yihitu tiyo. Yunu ndurã kohudiriadu tŭyikiidi, subua gudi-ĩ êredie Hŭrolinaa-ã tugop ; labara haŋgurdo togus.

Tunda hatiriadu : « Labara tadurdó di diŋguru ma tigiirtoó, tuyoopu Tumbulbai hi tiyendi nduru abusndar. »

Odu šiĩ nakiri ôburi ye lau kor tobusã, êredie-ã lanjundú ; yunu čide yugonnó togus. Tunda zabtudundu tigirtu Barkai Kono mi hi ŋgo ni gŕso nuã yunu a kohidirŭe yiŋgaldu yopaar. Nŭ tohunnó togus gŕso nuã yida ndar.

Barkai Kono mi yuhadi : « Ā-á, orrondu yidadu » či.

Tunda hatiri : « Ā-á nuro nŭmooi yida. Lôko lukurŭe tohu, yunu turo taduru kohudirŭe tohoo, nŭ zaga tenduma ŋadu tiridu yopuri » nduru hatar.

Taa gŕso hunã zamburu yendar.

Sŭgoi lokol ndurã karandiri yaabi yŭsii-ĩ tigirtã nahar metur-ã turo četu mēde tuyooó. Muro hi su kônduru hekar. Odu toi yiŋgaldu, tunda ha kôwuro turo lokol-ã du boktiyo. Kara-ã tuzŭe tohã, tani yuso Lŭbia tidedu, Lŭbia du yiga luuru karanaar. Nuru orro di dunar.

Taa luurã 1.1.1975 Njamina tigiri. Njamina tigrĩ yaabi Haye Ešee-ĩ čaŋar. Njamina du ôbure čû tobuzã, tûgi êriskii-ĩ torru maarã Haya tided. Hayaa luuru Kuhura tided.

Sûgoi Kuhura du luuru ma Bêida ada karayindiã čĩkã tigiri, tia ndura sôuraa-ã yûturi.

Ada karayindiã turo yuhadiadu : « Nura tuda-ã sôura kohidĩ njûo čĩidi yunu turo yandu yidadu » čĩ. Mêdi hunã ôwonni tihinedo yugó.

Odi-ĩ yuhadi : « Aya Gidehi ada karayindiã gunna ha čabči čĩ. Lôko čabčinã, mêde hunã yuhadĩ lobčinã, yunu turo hinindiri čĩ : Tunda nû yunu ndur taturã mbi huturoł-ã borsu čĩ. Lôko mbi-ĩ morčunno tohoo, kôdi dunodo tunda ši tubasunnó di orrodiyindĩ nogor čunu ada karayindiã ha hiyi čĩ. Kômma ni ŋгаа, yunu orrodiyindĩ ni ndû ? » čĩ.

Odu ada guru kora yuhati : « Ereda bara yibendiri čundu yina mundu yuhado. »

Gidehi lôko mêde hundã šiĩ činawo, yuhadiadu : « Nura dahu makũú. Tani yunu hadirĩ tĩyĩĩ, aya šibtudundoo, numo dunodo du ôrozi čĩ, du tûduusu, tobusi hago tiyendĩ, tani numo nû durrĩ tĩyĩĩ Tû a » čĩ. « Tû numo mosko yida, du amba čĩ. Tunda bini di bu zaga Tû makirĩ, orro di dunduroo gali. Yunu to dahu nduma du dundu » čĩ.

Odu ada-ã gunna ohuro čeo. Mbo gubudi lôko ada karayindiã ha čabčínã, Gidehi hiyi : « Ada Lîbiana gunná du čûkun ? » či.

Ada-ã yuhatiadu : « Gunna Lîbiana » čuo. Čïidi labar yidanú ; ada guda du čûo. To koo di mêdi a yuhadã, zogo ôsuri to yiga yuguruk.

Taa tani dî Sebehe tided. Mararam du mannu šêrike turo Hîlip Hozmon čindî du ôbure tuzoo kora horkusu kohaar.

Du horkusu kohirî, yuso tûgi karaha čustii-ĩ maar nuru tuduņos. Diņuru yiga tidewo suru yidanú. Tûgi nur karaha čustii-ĩ taroo gali nuru tuduņos.

Sûgoi 1.1.1976 dî Nîyer Agades tigiri. Taa Kuddiĩ Yîlber yê Alahai Lihaĩ yê četu hoktudundu to hi bu Njamina lukar. Njamina du ôbure čû tobuzã tûgi nur karaha čustii-ĩ maarã sûgoi Lîbia zabtudu. Sebehe tigiri dugusa tîšã, tani yê Kôki Ôli Bôrnoi mi yê Ôli Mahuma Kandî yê ma Turabulus lukar. Turabulus tigirdã, Gûkuni lido čï tigirtu lahandaar.

Odu Gûkuni tuyuhati : « Nura sôura-ã du yunu gunna hanandiĩ ; sôura-ã du yîridu » čunu « su budi gurtakar. »

Tunda muro hi hendar : « Nuro Hîsen četu njîkiidi, ndûi yiņgaldu nendundu ? » ndar.

Gûkuni tuyuhati : « Hîsen Lîbia ha go yendar ; Čad su ni go yendar, čini, dahu du yida, či. Tani yunu orro di tarã Lîbia ha gorsu yendurdo tohoo, anna tuda Tû čîkã gunna ši basi. Tuda-ã Lîbia gunnoó, kôî gudi layundu čûkudo yugó. Dî di ni hakumma čenu ndû mannu ma lenú. Anna-ã šia basi. Yoo, Tû a anna-ã gona ha Lîbia târru yina guru yigiiťi, kûdukude mûkurdo tûrtu tohoo, tunda ši tubasi. Šaaba-ã ni ši basi. To kugiĩ Lîbia ha gorsu yendurdó di, kûsur dunduru, hakum a dî čĩ hi gorsu yenduru, yunu Lîbiaa čûwo, sûgoi landuroo, gali gunnuũ nuru hadirî, tani yê muro yê su tigirtenú. »

Hîsen yuhadi či : « Čûu na ha go yendiri » čini. « Lîbia ha ni go yendiri, dî čĩ hi ni go yendiri. To gunnoó tani tobuzú čunu čuruu ted » či.

Odu tunda gali ndar, Gûkuni hi hatar : « Tunda mannu diŋguru sôura-ã du lukuroo suru yidanú ; lokol du tooni ôskorie du tûŋgu yina guru hiŋguru, tigirtoó anna-ã ha wasaga yendiri. Yunu to koo kohuduroo gali nduru » hatar.

Gûkuni yuhadi : « Ôro tigirtudo di bu sûgoi yunu čĩĩ landuroo gali » či.

Yunu to hi su gurtakirî dahu makurdó togus. Yum turo tûgohu tigirtã, Gûkuni yugó. Hindurã, « Ômuši du miškile tohudo ôro ted » čuo.

Yogodi-ĩ ôskoro keyunu čirri to Ômuši na gunna yonĝu čunu, yuhado. Ma du sohura-ã yê anna šurtaa-ã yê goku, Lîbiana-ã lau wenege du anna murdom kora čado – anna čatã du Sîdi Lêbin, Sîdi Tilako ndirĩ ni nos. To koo di Gûkuni hi barayundu, ôro Tû ted.

Tunda hôkorndurã yunu gudi hanandurdoó ni karahaa buya čusti hundã hiŋguroo gali ndar. Tani yê Ôlí Mahuma Kandî yê Alači Alî yê kôî nani du tûduusudi. Dgo karahaa kuna čusti tuguna ; sûgoi buyaa-ã hiŋgaar. To koo di karahaa buya-ã čusti yê yibedi yê tihiko.

Sagahunu 1977 duru tadurdó di sohura-ã Bordo čubapu čonjo. Sûgoi ôwonni gorsu Hayaa-ã togus. Gorsu Hayaa-ã togusã, šêrke-ã du horkusa kohidirî tîyikiidi, sopar. Tani na Ôli Mahuma Kandî na Ôli Sukaya na Sebehe tigi-ro.

Lôko to Hûrolina du aũ karaha bui čusčinie yugó. Karahaa buya su asuba tuzukuda tusu čûo čîidi anna čusčindia yugondú. Odu to koo di karahaa tada tunda yopuru, su ôskoro čûdutu huzaa bu Haya lukar. Haya tigirtu gorsu-ã du kubo dundar. Yogodi-ĩ asuba galigo di če čîidi, aũ ŋuidunoo karaha kunu su gundirîe yugó. Lôko to Lîbia mannu karahaa huna munduga-ã Land-Rovera.

Karaha Land-Rover turo su êredie tólhun čî. Abdelaziz Îzo ndirĩ to Gûkuni na četu yidadu čûo. Čîidi karaha kunu gudi yidadú. Anna ŋuida čûkoo mannu, karahaa buya-ã ha

yopuru lukuri. Bu Ayaãña ndiri, taa bu dogu, Gurmaa lau a di čî. Duida ndurã gunna du tigiituru yûturi. Sûgoi odu zabtudundu tiridi. Anna ñuida guru Sûnusi Kôso na Hayaa yopuru, Zuar tigiituru, karaha Land-Rover su čûdutu wô Lîbia keyuo.

Odu tunda Zuar ga zabtudundu Haya lukurîe tohoo, asuba bûnno buyaa-ã gunduru lukuri. To koo kohidirî Haya toburu, kubo nduruu togus. Odu numi-ĩ gunna gali di turnduru ôburi turo yê lau yê kor du tobuzo. To di bu tunda guru hu karahaa buya-ã yopu, wô Lîbia yûsurru mašaa kiiti čuo.

Odu karahaa-ã yopuru wô Lîbia maša bûrodia lukar. Lîbia tigirtã, Adum Tôgoi, yogoda-ã lau tigiri mašaa barayunu čeo. Taa tani hi tuyuhadi : « Dgo gorsu-ã yingaldu njûo. Nû nura anna bûre Hûrolinaa, karahaa-ã yûhutu nani horkusa bûro-ã du tohudiã yogusu » čî.

Tani hi tuyuhadi : « Nuro aya êredie a tôlhun Sebehe du čĩ su sobus » čî. To koo di Adum Tôgoi turtuyunu êredie-ã su ôbure yusu kora horkusu kohirî tobus.

Odu êredie tôlhun-ã su tîyi, tûgohu tigiroo, dûnogi saa talata ñgirigĩ Lîbia du yê Čad yê yunu Hûrolinaa tohã yê tohĩ yê gunna tani labara-ã yeri. Lôko to yogodi-ĩ mannu yunu budi yogus. Anna kuna koa číkã ha mannu čabčunu yuha : « Njamina ndûrru bapiĩ » čî. Čôhuri-ĩ busamma ha

tedî zaga čarku su kôčindĩ yê čakindĩ yê wasaga čeni. Yoo, artasa ada yidadã gunna kumandu a koo di yihitu čunu wasaga čeni.

Bordo yê Zuar yê artasuu yili čĩĩ gunna yogodi-ĩ čoobu zogo Njamina ŋgiridoo, čôhure gorsua čĩkã ha zaga nũ wasaga nendurã ŋadu yitiĩ či.

Anna, anna-ã ha oskoba čendiã nahara. Artas Tũ du čĩĩ gunna yihitu yigidesudu, zogo guda kiituru nendiri či. Anna-ã ni dahu tududa artasa yidadã gunna to koo di yihitu yigideso. Čôhuri-ĩ yerčunu dí Njamina numi-ĩ nerko tigrĩ, wũni numii-ĩ tugopudo haki bozunnó togus.

Odu čôhuri-ĩ sũgoi zabtunu, ma Gũro na kũruiyini saa tumania tũgohuu-ã Zuar tigrĩ bos. To di bu čôhuri-ĩ čoŋgu tũri. Lũko turo tiri kandiri Wow lau tugurkurã čôhuri to bozu čĩ durturi. Gudi hunã taa numi-ĩ du tũyikã, ŋgo Haya numi-ĩ čoŋgudo di bu Asĩl bu tigrĩ Atia čubabĩ, dahu tigrĩtenũ. Šerayindiadu čĩkiidi, Asĩl wošiyunu Lĩbia yũgurto. Lĩbia a čĩidi yogoda-ã četu hoktundu, sũura hunã ha duna čenĩe yunu to koo dahu du duyĩ.

Odu Sebehe du araã tunda četu tũyikã mannu tunda du kubogo gunnó togus. Dohu yum turo araã miškile yibeyindĩe čabtundu čĩkiidi, Êyi Teĩteĩ čuduru tani hi tuyuhadi : « Araã yaabi Wuzaiĩ, Ôbudii Ôyi ayĩ hunã bu tũruzi-ĩ hi yaabi čĩĩ du čabtundu čĩkã labar taũ ni » čĩ ?

Tigiri lanurã, mugoi yaabi-ĩ ko-ĩ zui borsu.

Odu dogusu, anna čû yoburu, bûnno nura yoburu, Gûkuni na Adum Tôgoi na ôro hûndug yebel yiga Sebehe nduriĩ kôï to hi čûo.

Tigiri Adum su gubudi hadar. « Araã čabtundu čûo, čabu a čabtundu číkã ŋgullaha ndur du yugó. To kugiĩ nuro ni ôskoro F.A.P. gunna nuro bui. Yoo Gûkuni ni êreis F.A.P. nura čû bursa aya njíkã gali gunú. Anna ada četu sobusu » nar.

Adum tuyuhadi : « Anna nuã gunu zabsu » čï.

Tani zamuru hadar : « Yaaba bûge so čûo, yuso bozo » nar.

Ôwonni Adum zabčï tuyuha : « Anna-ã mêde tuyuhati » čï.

Tani zamuru hadar : « To hadũú. Nura gunna hag anna gôrdi gunjindia tadam. Yaaba du bûge čûo. Nura anna šišaa njûo. » Lôko to Abas Koti na Hasan Yamûs na anna guda šišaa mundu čûo.

Odu Adum hadirî dahu tigirennó tohu čed.

Sûgoi Gûkuni hi tigiri hadar : « Araã yunu a tûrtu yohidî čûo. To kugiĩ, anna ada kiiduru gôrde ndua četu njûkoo gali » nar.

Gûkuni zabčï tuyuha : « Adum su yuha » čï.

Tani hadiriadu : « Adum anna nuã yoob zabsu či tuyuha » nar.

Gûkuni tuyuhadi : « Yoo, anna nuã yoobu zabsu » či.

Odu bî-ĩ ôzuũ, dugusa çû du miškile yohudu, bûgudi-ĩ Adiliĩ Landai mi na ha čitido. Bî-ĩ ôzuũ, tobusu tia ndura yûturi, saa atnašur tohudo. Yiga luurîe tohã, Adum tuyuhadi : « Zogo yîri toŋ wô Hamîa-ã tunak » či. Yoo nuru, yaabi-ĩ ko-ĩ yiga tuguurã, Abduraman Amur ndiri, aram hanandiri, Gûkuni arbidia hunu, tohi karaha hûlkus, hûndug-ã nerkaa yûgurtu činaa sûgoi zabtu.

Tani du tigiri Adum su hadar : « Aũ a arbidia Gûkunii-ĩ aram a yuson su aya karaha činak liĩ čî. Muro mannu čabu-ã du čî aya činakudo » nar.

Adum yuhadi : « Yoo budi gali » či.

Du tigiri Gûkuni hi to muro koo di hadar.

Gûkuni yuhadi : « Gali yunu yohudã tuyuhati » či.

Tani zamuru hadar : « Yunu čabu yohudã nuro hi njuhatîe gali nar. » Odu tani luuru tided.

Tûgohu wô tigiri, tôlhun-ã Čad yê kôe ndura čikã gunna četu nûŋuru luuru tided. To di bu ôro tigiri Adum Tôgoi hi maaru tûgi Môsouduu-ã gubugii-ĩ naaru, tani wô numi-ĩ tided. Lôko to tûgi ndurã labtan 2 Mars kûli ôronnu čî.

Odu tûruzi di wô numi-ĩ tidedu, sũgoi kôĩ zabtudunu bu tólhun-ã lau tidedĩ tĩyiidi, aram Ahuma ndiri ŝurtaa ôskoriee-ã du čĩ. Čad Daguna du tobusudo, gali di hanadiyini. Dogu du kubo kidektiyi. Karaha hunã yida čai mude du li čirri-ĩ hi tuzu tuyuhadi : « Adum Tôgoi hi čubabo, čĩidi ňui hunã kũrmo yidanú » čĩ.

Odu kôĩ taa tũgi ndurã dogu yugó, nerkaa čĩ. Tidedĩ tigrĩ Kêlleĩ Abdalla yê aũ gudi turo yê čũo. Mura ha hadar : « Adum Tôgoi hi čubabo. Wenege du Gũkuni ôro turonnu čĩ. Lukuru waha torkar » nar. Odu taa tani yê Kêlleĩ Abdalla yê lau ndur to gudi-ĩ yê lukurĩ ôro hũndug-ã tigiro.

Mura ha yigannu hũduru tani du kôĩ Gũkuni čĩĩ tigriri. Du tigrĩ, Gũkuni de labar mannu yidanú. Yĩsu kĩtab hunu turo karayinĩ čĩ, lahanuru : « Ndũ labar êski mazu ? » nar.

Gũkuni yuhadi : « Labar êski yugó, ňgullaha » čĩ.

Tani hadiriadu : « Êski yugonnãá, Adum su mannu čubabo » nar.

Odu yerči bos. « Ndũ koo nuũ ? » čĩ.

Tani hadiriadu : « Adum su čubabo čĩidi ňui hunã kũrmo yidanú, čundu yuhado. »

Gũkuni hidiyi : « Wunana ? » čĩ.

Tani hadiriadu : « Araã gunu wuna gudi » nar.

Gûkuni yuhadi : « Yoo halas. Kayuã nurã mûuri Môsouduu-ã lukar » či.

Odu kayuã huna çûuŋu çetu wô Môsouduu-ã tigiro. Tigirdã, Gûkuni hi çoŋgu du tûri ; tunda ha yiga gartu çuo. Kunu tobusã, tunda ha mannu du lûduyuo.

Tigirtã Môsoud yuhadi : « Yunu togusã ni gînei di togus, daardó di togus. Sûgoi yunu a koo kôï a di yeru togusú ; nû yûsurru Adum su landu. »

Odu tunda wô tigirtu Adum su landuru zabtudo. Kôï yiga kurukurã, Gûkuni hi ôro hûndug-ã çoŋgu tûri. Tunda ha ni bu tûgi ndurã tuyoopu tûri. Tûgi ndurã du aũ aram turo nohudo ŝurtaa ôskoriee-ã aũ çîduwo wuna çundu anna-ã ha njaka çendî çûku, tani yê Mahuma Dazûka ndirî yê tigiro : « Nûgoi nura ŝurtaa ôskoriee-ã niridu anna-ã ha mêde yendiî ? Ndû lamar nduũ nduru yina hatarã, odu tani yê Mahuma Dazûka yê tuyoopu daŋammi tûri. »

Daŋammi di dugusa çû tîšã, tiyihitu saa talata dogusuu-ã kôï a Ahuma Mabûruguu-ã tigiitu tûyuhudo.

Gûkuni yum to yîsã, togi-î Haya çoŋgu tûri. Haya tigirtã araã gorsu yohidî çûo, çôhuri-î hi su bûnno yihitu çendu bozudo yugó. Çôhuri-î tûruzi di Kuhura tigiri bos. Kuhuraa mbi yudou togi-î Zuar tûku çinak. To hi bu karaha du Haya tigiri. Adum Tôgoi ni labtan-ã du çî kunu wosçinã çuruu bu Haya ted. Haya tigrî çuruu dî Salal kôï ôskoro hunã

čikã du tigiri bos. Kôï to di dugusa dîgidem kora bozudo, yogoda-ã Gûkuni hi yuhado : « Yunu kohumma gunna šigiri Adum Tôgoi hi kûrtu » čuo.

Odu Gûkuni tani yê Ahuma Abas yê tuyuhatu : « Tûgohu saa talata wûdur turo čî lukuri » čï.

Odu taa dogusu saa tînen, ôro hamîa-ã du karahaa čû tusu čûo : turo-ã ni maša tuzukudo, turo-ã ni mbia bîrmile dîšee su čûo. Yopuru Haya dahu yendar. Yerndurã turo tîsã, togi-ĩ Ômul tigirdu tîšo. Haya tigirtã Adum bu Salal lau čî. Kôï to di kayi mannu yidanú. Alî Sukaya karaha Fîad bui yida, Adum su čoŋu Haya yûgurtu.

SAGAHUNU ADUM TÔGOI HI HAYA HUZANURĂ 1978

Adum Tôgoi Haya li Gûkuni četu dugusa ôguzuu hoktundu bosuã, odu yum turo odoor Hayaa yernduru togi-ĩ tûgohu Ôgi tigirtu bu Zuar lukar. Zuar tigirtã, tani hi Momor wûdur čĩ ndedi čuo. Karaha gudi yidadú, Lîbia lau karahaa barayuo.

Lôko to Lîbia mannu karahaa gala yidanú, Kûruzou hu karaha bui turo yê Land-Rover turo yê Hasan Kôkia yê yuburdo turo yê yigiitu, mura wô Lîbia zabtuo. « Tani hi bu Momor šigiri Anur Kôsoi mi hi yoŋu nani Zûmuri šigiri Salla ha yoŋu yîri » čuo.

Odu luuru Momor tigiri Anur Kôsoi mi yê Kôki dahu wele yoburu kûrinuru Bordo tigiri. Sûgoi Zûmuri tigiri Sala Barkai mi hi maaru, Wow hu luuru Sebehe tigiri. Dugusa tîšã, anna ada Bordo lau číkã Geti Šegu mi na yuhati : « Tunda Bordo lau tîyikã budi šimasda. Karaha buya-ã turo tenduwo gali » čuo.

Odu karaha-ã čendã, aũ čusčiniĩ gali gunú, mura yuhati : « Tani kugiĩ hi tendũwo gali » čuo.

Adum Tôgoi mura yuhadi : « Ramadan Mouscou, tólhun-ã su čĩ haki nendurú » čĩ.

Odu budi yuhatã, tani hadiriadu : « Miškile gunú. Ôskor hakummaa koo kôï horkusu hakummaa čïï gunna kohiï. Numi-ĩ du anna-ã karaha gudi yidadú. Mura ši masda koo, tani aya tarú. Karaha hundã čuzuru ôro maaru tidedi » nar. « Odu, odo turo Artur ndiri, ŋgo tani tugonnoó muro tólhun-ã su bozi. Odi-ĩ hi haduru tólhun-ã su sobus. Tani karaha a maaru ôro Bordo tidedi » nar.

To koo di ôro Bordo gezendaar. Odu Bordo sa čû, ôguzuu kor kohudurdo, lôko 2 *février* gorsu a Njaminaa tohĩ, tiri a Wow yê Taanuã yê kôidi tïyo. Bordo tigirtu dugusa čû kora tîšã, Gûkuni Bordo li. Odu tani gubudi ma Zûmuri tigiri. Anna čikã ha labarnuru, « Gûkuni lido Bordo čî, wenege du a hi yuguruu kanjini nuru » hadar.

Mbozoo, tani anja hundã čakhiduroo zabtidiniadu tïyi.

Mura yuhati : « Garru nani Gûkuni liwo, mêde ndura tadar hatiri, taa četu Bordo zabtindindi » čuo.

Dugusa ôguzuu kora tîšã, Gûkuni li. Anna-ã ha lahayunu yîšã, togi-ĩ tûgohu yuhadi : « Čabsundu nani, zaga tirĩ nuhatiri » či.

Odu anna-ã « Kînniĩ garru » čuo.

Gûkuni « Yoo » čunu, garčini allahar tohã, aũ yunu yuhadiê yugó yîso. Togo tûgohu tohudo, čabsundu činã, anna-ã ôwonni čabtindî yugondú.

Odu Gûkuni yuhadi : « Karaha-ã tundu, anna-ã mêdi yidado yugó. Čabsundu niri čabtundunnoó, tani tidedi » či.

Lôko ôskoro-ã karaha-ã su huraša hundã čûdutu tuyundã, anna-ã tiri karaha-ã čuriĩ su ôgune čûdutu, anna guru bûnnuda bosu čûo yuhati : « Karaha-ã yuguruwo, kôkore hunã yitiri » čuo.

Odu Sala Barkai kômma ha čî, yerčunu kabula du čubu, « Huria ada nura anna ndê yertuũ yina a kua kohidiĩ čunu kabula du čubu. » Odu mura Sala Barkai mi hi čongu tuyuo, tududo čîidi, kabula du čubi.

Gûkuni layinã a tûrtu koo kôï a di tobuzú čunu, wô kiši-ĩ tûruzi di čaki.

Taa tunda anna hoo kora wô sohi tugurkar. Odu tigirtu četu tobuzo. Kôï to hi tîyikiidi, saa tînen kor tohã, ôro baradiyuo. Lukurĩ tigirtã, de aũ êski di lido koo, ôskoro-ã zûr su tusu čûo ; odu turo, turo du kuba čenu lahayunu, zaga hunu tunganã yuha.

Mbo Sala Barkai mi hi tuyundu yidadã mannu yuhurkudo.

Odu Gûkuni mêde hunã yuhadi čîidi, Abdel-Azîz Îzo, tôlhun-ã su čî, êrbedige turo tûku Gûkuni hi če.

Lôko mêde hunã yuhadu tuzã, êrbedige-ã karayinã yuhadi : « Mbozoo, tani Yibi hi ma tidediadu tîyi čîidi, nû

a koo di bu Kalaid čunoo ni munurú, Amšaluba čunoo ni munurú, kôï to lau baradiyindî čûo. Gařanu du bu tidennoó tohú, haki ma Yibi tidee » či.

Odu anna-ã ha yunu čenî čîde yugó. Čîidi, yina hunda barayindiã četu yuhatu, dûli di daha toobo.

Gûkuni gubudi čuruu ted. Tani taa tîšu, tûgohu Bordo tided. To di baddu Lîbia lukuru anja ndura yopuru sûgoi zabtudo. Anna-ã Lîbia a mannu yina hunda čepu čoopã gunnoó, Lîbia yina mundu tiyendudo yugó. To di bu yogodi-î mannu ŋgo koo gunú. Aŋgal gudi guyi. Sûgoi yogodi-î čačabtunu yiga yugurîe, to koo di Êyi Mahuma Huka mi na Adili Êyi na lidu labartiyuo.

Odu tani anna ma Zûmuri čîkã ha tigiri labarnaar. Yoo, ôwonni tiri a Yibigo ho ma tûusî, to di yê a di yê gunna yandu yidadu su yugurkîe wunaši nuru hadar. Odu kiši a ma Yibigo hi anna keyundu tigirtu bozo. To koo di tîyikiidi, yogoda karahaa šaabîe yidada Oozu tigirtu, kîšibe yuduhaku. Mbozoo tiri a Taanua-ã tûrrie kugiî, hanayundunnó di bîe tûrru morčundu tiri a Yibigo tedî guyuo. Asab du karahaa mura hoo tûri.

Dogusu kohunu-ã du hidendu, su bûnno yihitu, karahaa-ã kunu šia bazo. Odu karahaa čû kora ŋgullahada čoopu Zûmuri yigiitu dî Bordo labartuyundu, karahaa a kua yopuru Zûmuri kiitar čuo. Odu tani ma Zûmuri tigiri.

Karahaa-ã yê anna-ã yê gunna lanuru buya-ã ha labarniriadu tîyiidi, Kôki dahu wele yê Kôki Tahar yê Allaçi Môliĩ yê Zuar ga yerčunda ma Zûmuri lidu, yuhati : « Araã ma Šarda tigirtu anna guru hu čitu, bu Haya lau tûri. Tunda ni tôlhun tadorú, tôlhun-ã Allahĩ yida Wûr čĩ » čuo.

Taa tani mbo tôlhun-ã tardo, kumanuru mura četu Bordo zabtudo. Bordo tigirtã, Allahĩ Wûr čĩ tôlhun-ã du hajuru hadar : « Araã karahaa mundu tugurku kanjuo ; kumanu tôlhun-ã yoŋu Zuar ŝigiri » nar.

Allahĩ yuhadi : « Wenege du mbi nurã Zuar tûyugurtú, yunu kohirĩ munurú » čĩ.

Tani hadiriadu : « Sîdi Adum (Sîdi Diliĩ) anna yida bu huzado tigrĩ čĩ. Mbi lítire murta yusu kor yendiri. Dumadu čakagi-ĩ hi hokndindi nuru » hadar.

Odu karaha Mahuma Ôyi Huka mi hi anna dîgidem sã hoo su yûturu, Sîdi Diliĩ hi bui di nakuru to koo di bu Zuar gezeyuo. Zuar tigirtã, ada čuruku bu Haya lau tûrra.

Tani Bordo a tôlhun-ã tadirĩidi, Njamina du tôlhun tiyendu tuyuhati : « Yandu yidadu. Haya du yiga kôĩ orroa čû koraa, karahaa murta yusu yogodaa tigirtĩ čûku čôhuri-ĩ čuduru čundu » tuyuhado.

Taa tani bu Haya labarnaar. Turo tîšã, gudi-ĩ anna ndura Haya čikã dî Ômul tugurku tiri tuyundu yidadĩidi ada četu

hoktuo. Hoktundu gokî allahar kor togusudo, dî Njamina du mannu Gûkuni, anna buya čikã četu cõhure cû yida Haya čaki.

Gûkuni tigrĩ gubudi, goku yogoda-ã ha zabyihitudo. Sûgoi čačabtundã sohi huzayuo. Sa yogoda-ã ha čûku tûrri. Maraha-Dugol tigrĩ, yogoda-ã sa hundã tûruzi di Gûrĩ lau tûrra. Anna ndurã yî yidadú, Wadi-Maru tigrĩ Zuar tûri.

Odu ŋгаа yopuri čindî, anna guru yuhati kuzo durtûú. Zuarko šigirtu sobusu, kôî to hi yugurki čuo. To koo tohã, anna Hayaa-ã ni bu Haya zabtuo, guda-ã ni Zuarko tigrĩ bozo. Sîdi Diliĩ na anna Bordo di kedugundurã yê hoktundu dî Sugurka tigrĩ kohunu yibeyundu bozo. Kôî taa čûku dugusa tûdušu bosudo, yogoda-ã tuguruwo.

Yogoda-ã karahaa murta yusu kora yidao. Kôî to di kûsurtundi yogoda-ã čarku Wûr tûruzi di tûri. Dgo yogoda-ã lôko yugurkĩ ka čûa toorkuda. Ko turo-ã tigrĩ Wañaña čubab. Tunda anna Wañaña čikã četu tólhuno tadar. Mura tuyuhati: « Yogodi-ĩ li. Četu tookî tîyo čindi, gorsu-ã tohî čĩ čindî. Sûgoi yogodi-ĩ hi zambar » čuo. To koo di yogodi-ĩ hi Wañaña du zabčuo.

Gûkuni yê anna ada Njamina du araã yingaldu četu lidã yê tûrri Zuar leo. Taa Gûkuni êrbedige kegirči tiyenu su

yuhadi : « Yogoda ada tiri-ĩ hi bĩe tũrru Zũmuri a yopuã, Zuar kii » ċi.

Odu tani ma Zũmuri tigiri yogoda-ã ha yoburu Zuar tigiidar. Dugusa ôguzuu kora tĩsã, anna-ã labara hakundã, « Yogodi-ĩ dĩ Wũr ga ċabtu ċĩ » ċuo.

Odu to koo di anna ko turo-ã ċaċabtundu dĩ Wũr ndubabia tũri. Mũsa Sugĩ na seryã Allahĩĩ na dĩ gubudi tũri. Ćaċabtundu saa atunašur tohoo gorsu-ã bôdindiri ċuo. Odu anna dĩ Wũr du lidã ċetu ċaċabtundu saa yuhatã tohã, gorsu-ã bôdiyuo. Kôĩ to di gokĩ, Allah ċendu araã ha ċusċundu, bokundu yihido. Tunda lau asar bui haŋgurdo yugó. Aũ ndur nohã turonnu Wordugu Wahali mi, aũ gudi morċunno yugó. Araã lau anna hunda mundu ċado.

Yum gorsu-ã tohã, tunda mannu tũgohu yernduru dũnogi taa tigirtu dugusa ôguzuu kora tĩšu sũgoĩ Zuar zabtudo.

Anna ndura mbo Bordo di huzaa dĩ Wũr tũrrã, gorsu-ã tuzuã yopuru Zuar tigirtu, sũgoĩ Bordo zabtudo. Bordo a tĩyikiidi, tani hi aũ komboĩ bui-ĩ kubo hunu tuyoho. Odu Bordo du tobus. Bordo du tĩyiku, ôbure mundu tobusu, horkusu-ã gunna gali di yibenduru tiri hi nakaar.

Sũgoĩ tĩyikiidi, anna ada ôskoro-ã buya hundã ċabu ċĩ Haya yĩridu ċuo. Lôko to Okiĩ Dagaš ôskoro-ã gunna bui. Odu Haya tigirtu gurtakirĩ, anna Annagada bu Bau lau

mannu lida čûo. Kôî to di walčambirî, mède ndurã du daha tudoopunnó togus.

Adum Tôgoi êrbedige kegurčunu nura gunna Njamina yîridu či.

Čačabtudundu Njamina lukar. Tunda Bordo di tiridĩ karahaa ndura buya čû tadar. Kôwuro to Lîbia tiri hunã ko yugobó. Hôkorndurã, karahaa ndurã taduru su oro gunduru, ôguri haŋgurã du maša ôskoroo-ã yopuroo gali ndar.

Odu karahaa tada Ogole Kêlleî mi hi hûтуру yenduru, tunda gubudi Njamina lukar. Njamina tigirtu čaba ndura taduru kohidirî, mêdi taduru tigirtã du nos. Kôî to di ôbure guru tobusã, Sala Barkai, Maka tedîe togusã, tani hi *sous groupement Tibesti* tuyoho. Odu gubia yê sogohi yê anja ôskoro ôro Tû čîkaã kenuru yerî, ôburi 12 tohã, landurã numi-ĩ anna Hîsenuu-ã yê Gûkunia-ã yê du kunu kubogo gunnó togus.

Ŋgo gubudi ôbure du M.P.L.T. četu gokudo. Gorsu hundã mannu sôbobo guruu yingaldu gokudo. Ôwonni Hîsen čačabtinî či čindi, anna buya-ã četu sôortudundã tani hi ôro ndedu anna kuna koa čûkoo taũ niroo gali čuo. Yire du lôko to yuhatĩ muro tûrtu.

Aramma liĩ, anna-ã gunna ma B.E.T. tûrrã. Ôro magaza ŋgo Gaduu-ã du asuba buya čîkã, Hîsen anna guru hu čebu

ndêbše čenu karahaa dîgidem sã yusu yida, asuba bûnno buyaa čikã gunna bûroyunu ma kôî hunã čoobu ted. Magaza-ã bûgi yogus. Sôbob bûgi yohĩ, gorsu orro di yidado gunnũú čundu yunu to anna ndurã budi su čigirtawo. Yunu to hi su tani hi aya anna mundu yugondú ; ôro ndedu anna mîndie kiiduwo gali čuo.

Tani mura hadiriadu : « A tûrtu kuba zôdi haki ôro tidedú. Tidedîe dakũwo, ôroŋa mašaa ni yugondú. Yina guru tendu anna-ã ha tigiiduru yeri. To gunnoó ndû mannu tardó di tidedú » nar.

Odu gûrso tiyendu, Alahai Dûga ha tigiiduru yeru, maša karahaa buya ôguzuu baraniri nuru hadar.

Taa Alahai Dûga maša karahaa buya ôguzuu čuzuu tiye. Tidedĩ gubudi, Kêllel Abdalla na, Brahîm Ben na tuyuhati : « Anna centrafricain murta dîšee sã dîšee sôura yohidiadu čûo. Numo a Centrafrique čindĩ êreis hunã Davîd Dakô ho čulopîe to koo di sôura yohidiadu čûo. Bui hundã ni docteur Îdi Lada čindi, Njamina du čî. Nû anna hunã ha yoop nani Zuar yûdu » čuo. « Bui hundã ni, Capitaine Bouro čindi, yunu kohumma gunna yoop Zuar ga yûhu to di bu čôhuri hi wô Lîbia tûrri » čuo.

Odu halas, galigo yanuru tar. Yum to lahad, adibi nurã mannu yum to hode dunuru, karahaa nurã čačamuru yernaar. Aya lukurĩ Capitaine Bouro yê Tošĩ Sala yê teido.

Tošĩ Sala ŋgo Haya du lido. Niri hunu liĩ, yurusu Tumbulaii-ĩ ma Hayaa ŋgo gibi duyundã, muro na Sĩdig Bugar, Yabur Wuĩ dĩgiši-ĩ to na, ada guda lau huna hoo kora, ŋgo kõi yurusu Tumbubaii-ĩ gibi duyundã čiletu, yodurku layindã, Tumbubai du čĩ hanayundã, tani hi Tošĩ tedĩ li tuyuha : « Tumbubai yurusu hunã Hayaa čĩ. Anna-ã ŋgo kũzo yohududo to koo čindi, Gũkuni na Adum Tõgoi na ha yuha. Yurusu-ã dĩ tũkudu anna ba hunã ha čendoo gali čunu, Tošĩ to koo di ma Hayaa yerčunu aya li » tuyuha.

Odu Adum Tõgoi hi hadurã, Adum yuhadiadu : « Tunda nũ zaga wasaga nuudu du tĩyikã, haki yurusa gundurĩe koo gunũ. Wõku numi-ĩ ŋgullaha yuguruudo tohoo taa landiri » čĩ.

Õwonnĩ Gũkuni hi hadurã mannu, yuhadiadu : « Wasaga nuudu nũ tunda du tĩyikã, haki yurusa yopuru anna ha yendirĩe koo gunũ. Yurusu-ã yeĩe tohoo, čabu koo yibenuũ, mõore-ã ha yonũgu nuũ hadĩĩ. Diũũ haki yeũ. Nũ garnduru, lõko ŋgullaha yuguruwo, to di bu tũkuduru mõore-ã ha yendiri » čĩ.

Odu yum lahad-ã Tošĩ yẽ Capitaine Bouro yẽ četu karaha Toyota taduru yernduru, dugusa õguzuu tĩšã Korotoro tigirtu, yiga lukar. Korotoro yẽ Haya yẽ kõidi dũski tũdugutu tĩyikiidi, gorsu a *9 mois* togus.

Taa tunda yerndurã togi-ĩ Haya tigirow. Haya tigirtã, karahaa buya-ã yĩ hundã mógoda. Tokurã, yeru yísido yugó, hiduru kenar. Karahaa buya-ã mura ôguzuu, turo-ã ni ma Mĩski tedi. Anna Yibi čĩkã anja hundã Mĩski yuduhakĩe to koo di mbo mannu yertura.

Odu karahaa čũ-ã yĩe hundã yudokã, kumandu yuruku nuru čuruwo. Kõi to di tani tĩšu, anna tundaa čĩkã, Ôli Mahuma Kandĩ mi na Hasan Halali na Allahuza Kêbir na četu hoktudundu, numi-ĩ čuro di labara wudar.

Mura tuyuhati : « Wenege du anna numi-ĩ du čĩkã tũrriadu yugondú čuo. Tunda lukurĩe ni anna mĩndie karahaa mannu tadorú. Yunu kohidirĩ hanandurú. Nũ nuro ôro ndedĩ njĩ, ndũ koo kohiadu njĩ » čuo.

Tani mura hadiriadu : « Aya sobusu gartundu, ôro tigiri, anna ôronja čĩkã yoburu, yunu kohurã gunna a hi kurri nuru » hadar.

Mura zabčundu hidiyuo : « Lau dĩ di ndedĩe wunaši ? » čuo.

Tani mura ha hadar : « Nura anna a kora aya njĩkiidi, dĩ di tidedú. Yunu kohurã gunna a hi kurru četu dĩ lukuri » nuru hadar.

Tĩšu tũgohu tohã, Tošĩ mbo muro Haya bozĩe, muro hi soburu, Capitaine Bouro ho maaru luar. Karahaa buya-ã

mannu dohu yasaayindã, Rond-point de Gaulle tûgutu čûku tigiro. Četu tûdugutu, dohu yasaanduru togi-ĩ Zuar tigiro.

Zuar šema zigiĩ kôï wô čaŋgirĩ, karahaa huzaa dî tûrriã, Zûmuriĩ-ĩ yê Bordoo-ĩ yê hoktudo. Karaha Bordoo-ĩ ni Kôso Adiliĩ mi hi bui hundu, Zûmuriĩ-ĩ ni Galmai Kamakama ha bui hundu yuhati : « Gunna bu Wadi-Maru asaga gundurdo čindi ; nû bu Wadi-Maru lukurĩ tîyo » čuo.

Tani Zuar tigiri tîšu tûgohu tohudo, Mahuma Môro karahado numi-ĩ du čî hoktudo. Taa maša Bordo yê Zûmuri kôida-ã muro hi wašinar. Gudi Zuar yê Wûr yê kôida-ã Allahĩ hi wašinar. Anna *centrafricain* murta dîšee sã dîšee-ã sêryeã Allahĩ hi wašinuru, wô Lîbia du čôhuri ligi. Liwo yunu kohumma gunna su yûdudu kenu nar.

Tani Zuar ga kôï zabtidiĩ, Capitaine Bouro tuyuhadi : « Tunda ni čôhuri hi lukurĩ tîyo. Nuro karaha Toyota a taŋã yoŋu zabsu » čï.

Dûski tûdugudu dúnogi yernuru, dogusu Wadi-Maru tigiri. Anna mbo tûrrã četu tîšo. Odu taa anna buya čikã četu čabtudunu, wasaga nuudu Njamina čĩĩ gunna haduru yer. Yum to tûdugudo.

Anna-ã yuhati : « Sala Barkai yerčunno, ma Yibi tigiri anna čoobu ligi. Muro hi aya garndar » čuo. Yum to tûdugutu tîšo, togi-ĩ ôwonni tûdugutu tîšo.

Agudi-ĩ tohudo tani mura ha hadar : « Njamina wasaga hunã gali gunú. Sala ni ôwonna liĩ yugó. Aya tobusoo suru yidanú. Čabtudundu lukuru Haya tigirtu garnduroo gali nuru » hadar.

« Odu kôĩ taa čabtudundã, tani hi Galmai Kamakama, Galmai Barka ha to hi kubo nuũ du yida. To koo di lukuroo gali » čuo.

« Tûgohu taa yernduru, tani yê Kôsoĩ mi yê Mahuma Sîdi yê karahaa ôguzuu taduru, ma Duwor tigirtu waha torkiri. Sala yuguruudo koo nura yê bu Maraha Dugol ga hoktudo ndar. To koo di lau ndurã yerčundu Maraha Dugol lau tûri. Tunda ni karahaa ôguzuu taduru ma Duwor tigirtu, kûrinduri sa kopurã Sala haki yuguruunó togus. Odu anna-ã tûrrudo, yunu kohudurã gunna Haya tigirtu Allahĩĩ hi labarnduroo gali » ndar.

Taa tunda tûruzi di bu Maraha Dugol tigiuro. Anna taa čĩkã ha labarnduru : « Sala haki yuguruudo yugó. Nura ni sohi kuruku, tani gubudi Haya tigiri sêryeã Allahĩĩ hi labarniri. Yunu yohã gunna Wadi Maru tigiri. Sala četu hoktundu, zaga dĩ kegirčĩnĩ tuganoo gali » nar.

Kôĩ taa tani yernurã, sôlli maarsuu-ã Haya tigiri. Ôli Mahuma Kandĩ mii čaŋar. Dogusu du, Brahim Mahuma Kandĩ mi na Îsa Tahariĩ na mura tôlhun-ã su čũo.

Mura ha haduru : « Allahĩĩ hi labarndu » nar.

Odu mura Allahĩ hi labarĉuo. Tĩšu tũgohu tohã karahaa lau ndura ôngohi hũturã mannu lidu Ômul yĩsu, tũgohu saa tumania ma numi-ĩ leo. Tũruzi di ma komboĩ CCS ndirĩ du tũuso. Tani wô CCS tigiri, Galma Kamakama na ĉetu yuso ma tigirtu Āsa Hamid muro bui di ĉĩ durturu, mura dĩ kũši-ĩ orro di yidadũ ĉĩidi, yunu hundu yidadã dahu makar » ndar.

Odu ma kôĩ ĉĩkã lukurĩ tigirtã Āsa Hamid su durturu hatar : « Tunda ôro Tũ du tiro ; dĩ Njamina ni gorsu tohĩ ĉĩ. Yunu dahu makurdo yugonnãá yĩngaldu aya tiridudo. Nura ni yunu taduũ njĩkã ndũ ? Dĩ kũši hi njũku yee ndũ taduũ njũku nduru » hinar.

Āsa Hamid tuyuhati : « Dĩ aũ baradiyundudo yugó. Tunda tĩyo. Hôšĉi dĩ baradiyundudo tohoo miškile gunũ lukuri » ĉi.

Tani hadiriadu.: « Budi gali » nar. Mbo mannu yunu hundu yidadu ĉĩkã hananiri. Mura ha hadar : « Dĩ baranjundudo yugonnoó, tunda ni tĩyo dugusa subua kor numi-ĩ du tobusi. Hôšĉi baradiyundudo tohoo, gunna ĉetu zaga dĩ lukurĩ tudugandi » nar. « Gorsu ĉĩ dĩ yĩridu ĉundoo dĩ lukuri. To gunũ gorsu yugó, dĩ baradiyundudo yugonnoó, tunda Tũ zabtidindi » nar.

Āsa Hamid yuhadiadu : « Budi gali » ĉi.

Muro hi ôwonni hadar : « Karahaa ndurã kôme kĩnni kĩnnie yibedi barayindi. Dĩ worša-ã ha labarru, tigirtu

yibenduru, numi-ĩ du tobusu dı Njamina lau mēdi garnduru, yunu guru ċũwo waha torkiri » nar.

Dı worša-ã du mannu Alı Sukaya na mura buya du ċũo. Odu karaha ndur bui turo yē Land-Rover turo yē kunu yibedi barayindi. Karahaa guda-ã miškile bui yidadú. Karahaa ndura ċũ tada ha ċoopu tũrru yibeyuo. Saa wahid kor kōi tōlhun-ã ċĩ tigrĩ, dı Njamina du baranjindi ċundu tuyuhado.

Taa Njamina du Allaċi Galma ha haŋaar.

Allaċi Galma hidiyi : « Ndũ kohidĩ njũku ? » ċi.

Tani hadiriadu : « Haya du tĩyo » nar.

Allaċi zabċi hidiyi : « Dı niriđi nugondunnũu ? » ċi.

Tani hadiriadu : « Wuna baradiyundudo ? » nar.

Allaċi tuyuhadi : « Nũ zaga njĩkã du yertu » ċi.

Tani muro hi hadiriadu : « Nũ muro ċaċabtudundu yerndiri nuru » hadar. « Tunda mbo mannu tũgohu yerndirĩe orro di tadar. Nũ yerndirĩe koo anna ndura guru haki yopuru lukurdó toi yĩŋgaldu mura ha kusara yitirĩ tĩyo » nar.

Galma yuhadi : « Halas gali » ċi.

Lôko karahaa hundã yibeyindu, wûdur hundu gunna galčindã, mbo mannu Hasan Halali na Ôli Mahuma Kandî na, numi-ĩ du anna dazaga čikã gunnoó, anna guda arañgada yê karra yê aũ gudi čĩĩ gunna ha labarčuo.

« Komboĩ CCS Hayaa-ã du anna murta tuzoo kora čikã ha mannu labarčundu gunna ha watisundu. Tũgohu saa talata tohoo, aũ gunna CCS kôĩ ôskoro-ã čikã tigiri bos » čuo.

Tũgohu saa site kombommi tigirtu, saa sabaa tohã čuruku ma matar-ã lau tũri. Anna numia-ã tũgohu kombommi tigirtã, de anna dañaida-ã mannu yugondú. Anna čikã, anna tundaã yê hoktundu čurukudo. Odu bĩrigada-ã tani yê Kôsoi mi yê Mahuma Sĩdi yê baradiyundu tigiŕo.

Tigirtã yuhatiadu : « Lũnundurã yunu gudi gunú. Anna ndura CCS ga aya numi-ĩ du čikã ha aũ turonnu mannu sopummo yugó. Gurada anna čita dañai di čikã yê anna ndura *sous groupement* ha mannu yopuũ ndũrri njĩkã dahu tigirtenu » čuo.

Odu tani hadiriadu : « Tunda gorsu a lukurĩ tĩyo. Njamina du mĩyundu êrbedige kegirčundu ôskoro F.A.P. ga Čad du kôĩ njĩkã gunna kumandu Njamina yĩridu čundu yuhatã, masunnó gunú, wenege du masi. Tunda gorsu a lukurĩ tĩyikã gunnoó, abigo lukurĩ tugondú. Nũ Njamina du gorsu tohĩ čĩ. Nura ada mannu lukuri ndũwo, noopuru lukuri. Aũ tedĩ hi sopuru lukurú. Tennãã ha gũu du makuru lukurú.

Tunda yunu taduru tîyikã a muro. Aũ dahu ŋgirenu yidawo yuha » nar.

Hîsen Babarta ndirĩ yuhadi : « Yire du gorsu a ndûrri njûo, çîidi anna gurada yopuũ ndûrri njîkã to ŋga koo » çî.

Tani hadiriadu : « Anna-ã çuruka ôro matar-ã lau karahaa buya guru hu su çûo. Anna gurada çûku hanandîe koo šigirtu njeo » nar.

Ôro tûrri tigirtu anna gurada-ã ha barandiri çuo. Tuda taa çîkã, mura ha bokuo dogu nduũ yûsurru, anna ada çakundú çuo.

Mura yuhati : « Buya nduã yoopu tuyundudo. »

Tuda-ã yuhati : « Ada çetu çañgirîe gunnoó, tunda anna ada ha hûturu lukurú » çuo.

To koo di kakastindî, Ôli Mahuma Kandî dogu du zîi di çuduru tedî tigiri hiyi : « Nûgoi ? » çî.

Mura yuhati : « Anna gurada gûi di tûrri çîkã, buya nduã tiyendudo, çîidi ada tiyendî yugondú » çuo.

Ôli yuhadi : « Anna ada ha kandamandûú sûgoi zabsundu » çî.

« Odu çuruku ma Goburru-ã kôi hîwuluu çakinî, taa bûni çî, tigirtu wusçuo. Mbozoo tûrri çîidi, bî-î dûskeyinno.

Ôwonnei anna ada Gûro čikã ôngohi êrbedige kegurčundu, Allahuza Kêbir mannu četu tigirtî tîyo gartundu čundudo. Kôî to hi tobusu garndirî. Saa tînen tohã, karahaa munduga-ã ha yûsurru nduru kendar. Karaha Alhai Kêbiruu-ã četu karahaa tuzoo tobusu garndirî to-ĩ ôro dahu-ã kônduru sôlli maarsuu-ã sôllinduru, saa sabaa yina guru tohã, ada lidî yugondú. Odu mbi bîrmil turo Alhai Kêbir su yeru huzanu ma tiri-ĩ hi hañũwo, četu kuruku. To gunnoó ma Gûro ŋgiri zaga sohi niritĩ sugandu, tunda gubudi lukurdo » nar.

Taa tani na Kôsoi mi na dogusu gezenduru lukurî, Bîr ašura-ã *Puits 110* tigirtunnó di, anna mbo túrrã kôî di yîsu čûku tigirtu četu tîšo.

Mura ha hatiri : « Nûgoi yasaandumãá êre kor kôî a hi nîšã ? » ndar.

Mura yuhati : « Karaha Ênimog (14.5 mm) yidĩ, wûni yidanú. Toi yingaldu dogusu haki yasaandurú aya tîšido » čuo.

Odu tîšu tûgohu du yerndaar. Lukurî Šiša tiri-ĩ lôko to dî tûruzi di tedi. Kûruune-ã du lukurî owonu yerči. Ôwonnei aũ tês-kide mannu tadorú. Owonu-ã du lukurî, tani nerko di sohi tirĩ gunnoó, aũ tiri-ĩ muguno tadorú.

Durdi-ĩ Êrzei Barka turo du ma lido. To mannu yunu tira mugunoo yidado yugó. Anna guda-ã du aũ gudi ma lido tiri-ĩ hanayinê çide yugó.

Odu diŋguru kûruune-ã du lukurî, morndiri nduru, lukurî owonu-ã buyi. Suru yidanú. Tûdugutu saa wahid kor sũgoi yerndaar. Odu lukurî allahar kor tohudo, karahaa-ã ha totura čoobi budi kûsurtudo. To di bu tira-ã guru haŋgaar.

Suag karaha Ênimog-ã ha hadar : « Kuruk četu gubudi lukuri. Kôï sôlli maarsuu-ã tohĩ korã guda-ã gûbkurčindi » nar.

Tunda gubudi lukurî sôlli maarsuu-ã tohã, wusndar. Karahaa guru kora saa ašura dogusuu-ã êski di yasaayundu leo.

Tiřu tûgohu du yernduru lukurî saa ašura kor tohã, ôwonni owonu-ã yerči. Tiri mbo tadoru lukurî tîyikã mannu tiri-ĩ mortiyuo.

Tudusu garndirî saa čû kor tobusã, tani hadiriadu : « Têskide tadurdó di bu suru yidanú morndirîe ni četu morndar. To gunú, numo gûmburie ni četu numo gûmbar, hôya lukar » nar. « Tani ôwonni dahu du tar dî Njamina gorsu tohî čî, anna ni yugondú, toi yĩŋgaldu anna-ã ha dûski yê dohu yê gûu du yoburu tidedî tîyi. Odu karahaa ndurã wûne-ã wasnduru, karaha yê karaha yê kôï di mitura murdom sã hoo kor, to koo lukurî tiri-ĩ du tidibenno. Odu

tiri-ĩ makurã Allah tiyendu lukurĩ saa atunaš kor Korotoro tigirtã, ôskoro-ã gañanjundu, kumayundu mašaa hunda yibeyundu, mašayindã, tani karaha Ênimog-ã ha maaru hõya gubudi lukar. Mura guda-ã zaga gũbkuřindĩ hi tugano » nar. « Ênimog-ã ha maaru luar. Kuba ha dĩ tugurkuru, lukurĩ sõlli maarsuu-ã tohã Tĩlis tigirtu wusnduru tĩyikiidi, karahaa guda-ã dogusu yasaayundu leo. »

Tĩlis ga tĩšã, tũgohu du yernduru lukurĩ saa sabaa kor Salal tigirtã, Njamina du karahaa tuzoo Kõki Kadur su bui hundu du ĉũku hoktudundu labara wuturã, anna tuda borsu dũgidem soũ turo ĉatudo ĉera hundã tuyuhado.

Odu Kõki yuhadi : « Dĩ numi-ĩ kubogo gunũ. Anna guru tenduũ kumanuru karahaa kuna-ã ha yoburu gubudi tidennoó, dĩ ņa haraga-ã wudu » ĉi.

Tani hadiriadu : « Karahaa tundaã mannu kõme kũruune tusã du lukurdo, odu dĩ tũrri miškile yugó ĉetu lukar » nar.

Kunu dahu tigirtennó koo di Salal ga ĉetu bu Mũsoro gezendaar. Taa yerndurã, enou tobusudo yugonnó di saa atunaš kor Mũsoro tigiuro. Mũsoro tigirtã, kõi to di Usman Sugĩ na tuda ĉĩkã gunna yerĉundu goni yũgurtudu norridiyuo. Anna-ã mašayindã, ko turo-ã yerĉuo.

Sũgoi anna tuda Gũro yê Kuhura yê kõi di karahaa dĩšee yidadu tũrri lidu yuhati : « Tunda dĩ Njamina lukurĩe

dakuru čĩidi, anna kôĩ a di čĩkã yê bĩrigada-ã yê tiyendu lukurú. Nura toopuũ ndũrrunoo tohú » čuo.

Ôwonnĩ yuhado : « Anja nduã tadũwo karahaa tundaã su yũdutu četu lukar » čuo.

Karaha Ênimog (14.5 mm) su čĩĩ, lôko nani kuzo ho tiyendi dogusoo tennãá, bũnnu buĩ-ĩ čaktorkuru karaha hundã turo ho su nakaar. Ôskoro karaha buya-ã ha čĩkã mannu čakhĩturu karahaa hundã su yũtaar. Saa tĩnen tohĩ korã yerndaar.

Kôĩ tigirtã gunna êrbedige kegurčundu kumandu yĩridu čĩndi. Odu karahaa-ã ha čuzuru taru saa talata Daguna tigirtu tĩšo. Togi-ĩ tũgohu sa site êrbedige kegurčundu « Kumandu yertu Njamina yĩridu ! » čuo. Êrbedige-ã haŋgurã enou tobusunnó di yerndaar. Lukurĩ saa tumania tohĩ korã Masaget tigiuro. Taa tigirtã mannu êrbedige li « Kumandu yĩridu ! » čuo.

Tobusudo yugó. Lukurĩ saa ahadašĩr tohã Njamina gũmbar. Tigirtĩ mannu gorsu-ã tohĩ čĩ. Tigirtã gendarmerie du tũyududo. Du tigirtã Adum Yakũb na Abduraman Sala na budi konnoyuo. To ndũ nũwo, F.A.N. lau mannu anna hundã yerčundudo lĩdi čũku basa.

Tunda tigirtunnó di mura gubudi tigirooto, anna ndurã ha bokĩndĩ, mura hanayundu čũo. Toi di lerda. Kôĩ gendarmerie du tigirtã, anna čata-ã yurusa hundã du

hidendu čûo. Aũ turo hananiri : Mahuma Yaksun čindĩ ôŋgohi yee arakûduski nohudo. Anna guru ni yurusa hundã kidekundudo, guru ni čûo. To koo di tunda ha kôi a di wusndu čundu tuyuhado.

Tani mura ha hadar : « Karahaa buya-ã su asuba tuzukuda, kôi a di gorsu tohî čî. A kôi tirkugo nakirîe koo gunú. Mosko gudi barandiri » nar.

Ôro matar-ã lau wasaga tiyeo. Kôi to tigirtu landurã, ôwonni lertiyundunnó togus. Aũ morčînã Abduraman Sala, tani hi kuruk čunu tuyoŋu tedu yaaba ada dî ministère intérieur bûrigi-ĩ hi čîkã : « Yaaba ada ŋga lanu » čî.

Lanurã yaaba tada budi gala. Kiša hundã ni čuraa, yaaba naharaa, lôko gorsu-ã tohã čuruku čarku tûrra. Odu anna nurã gunna ha yoburu tigiri. Komboĩ Zûmuri-ĩ yê, Bordoo-ã yê, Zuaruu-ã yê, Hayaa-ã četu tiridã yê, Wûruu-ã yê gunna yaabi, yaabi di wasaga yeru du čakuo. Anna ada bûnnu ndur bui arbataš-ã (14.5 mm) yidadã mannu yûgurtudu anna ada Hayaa-ã Ôli Mahuma Kandî mi na yoo Bordoo-ĩ Kôso Adiliĩ mi na čîkã, gunna kômo ndurã nerkaa. Bûnnu-ã wô bîe činaku tiyendu čuruku tûri.

Tani yê Galmai Kamakama yê Kôsoi mi yê Êrzei Banjarai yê Mahuma Sîdi yê bu kôi Gûkuni čĩ tigirtu, yunu tohã gunna haturu yendar.

Gûkuni tani hi tuyuhadi : « Anna nuã yoob nani, ôro šaria hamsîn (*rue de 50 m*) Digel lau, čirri to di anna nuã yida bui di sobus » či. « Nû muro anna guru yobuũ yûdummoó, anna čikã šimasda subua gunna čunukudo yugó ; bosu čûo. Kôï hundã du anna yûdu nani, mura yuso wô lidu wowu čao » či.

Odu anna Hayaa-ã yê Bordoã-ã yê yoburu tigiiduru lau ma du yûdaar. Tigiiduru yûdurã, saa lau mannu tohunnó di, Yûsum Narô ŋgo karaha bui-ĩ čusčini yê Šele Togoï mi yê aũ turonnu tada ha čubabu či. Tuyuhatu, kômo tada gunna kûrinduri bî-ĩ yesči. Odu togo tûgohu tohudo, čačabtudundu tigiirtu, ôrdi-ĩ hi ma dogu boŋgar.

Ôrdi-ĩ tunda tiridã bazudo kôï to di asuba budi hiye. Asuba hunã hidendoo, mbi yida wiziki anna-ã ha wûni čeni. Kôï to hi Hasan Halali na anna mundu asuba hidendu kusara-ã wûni čubu huluktu. Odu tunda karaha arbataš-ã yidĩ garndirî yum to lido yugó. Togi-ĩ ôwonni lido yugó. Agudi-ĩ tohã, Mahuma Gulai na arbataš môore-ã yuhati : « Suag karahaa-ã ni nohã na, arbataš-ã ni bîe bozu čî, tunda ni diŋguru tobusu tîyo ndû kohidiri » čuo. Arbataš-ã bîe bozu čî, ndû kohidiri čundu, budi waltadindi.

Tani hôkornuru lanurã, karaha a diki bozu čĩ ndû suru hunu. Toyota-ã kiši hunã so arbataš-ã ha guyini ; yôï-ĩ so arrakini, yunu kohuroo, Toyota-ã du naaru, bîlibili torrî ndû nuru hôkornar.

SAGAHUNU BÛNNU ARBATAŠ-Ã KARAHA-Ã SU NAARÃ : Mars 1980

Odu Mahuma Adiliĩ hi maaru, muro hi suag kohirĩe, asuba yê díske karahaa yê yoburu karaha-ã kiši-ĩ du to di yê a di yê yũdaar. Lanurã, kôĩ a kôkori-ĩ lau du du, kunu ôro durusu tohã, čêne-ã gunna ha čammuru : « Yalla arbataš-ã kideŋgu ! » nar.

Odu kideŋguru su nakaar. Su nakurã, ma yê dı yê gunna kômo guru du yida luhaa mũkuri tĩrize kohudar. Kôĩ a mbo wô du čĩ čenu čunuunãá, ôro dogu kideŋgurã, odu bĩlibiliyinie togus. Landurã, karaha-ã du gali di hũruhuri čagi. Taa tani nekelea taru, karaha-ã dahu hunã gunna hurru bĩe naar. Odu gali di bĩlibiliyinie tohã, čêne-ã konno borsu, lerčunjudu, bũrču.



Yuhati : « Yunu ŋgo ôro karaha bui-ĩ su čĩ kuzo hi tiyendĩ, a gali » čuo.

Tani hadiriadu : « Lôko Ênimog-ã liwo torkuru ôro su nakiri » nar.

Yum to dûnogi ôro tûrru, dugusa čû kora kômo ada ôrdi-ĩ du čĩ bokundu yoduro. Sûgoi F.A.N. mannu anna hunã leo. Odu tunda arbataš taduru, tiri a šaria Nîmeri hi ôro tedĩ, gunna makuru, ôro Ront-point Sêiseban tigirtu tuduzo.

Mura anna hundã tigirtudo, dogusu saa talata lidu, anna ndurã ha čubapu, kôĩ to di Brahim Mahuma Kandĩ mi yê anna šiša čado.

Tani yê Mahuma Sidi yê wônnu yerturu, arbataš-ã sohi tadaru, lukurĩ Gûyi, *Poudrière* du kînniĩ wô kurukurã, aũ bûnnu yodur. Ma yê dĩ yê lanuroo, yunu durrudo yugó. Sûgoi kînniĩ lukurã, bûnnu gudi « pîm, pîm » čĩ. Tani, amma nûgoi bûnno yihidĩ nuru karaha-ã tuduzu, wô čaŋurã, aũ kerre turo čaĩ li yuhadi : « Kôĩ ondugoi tûdutuma du ôrdi-ĩ li bokundu tiyihido. Anna ndura munduga-ã čado ; guru ni hosčundú » čĩ.

Mahuma Sidi hi hadiriadu : « Aũ a koo činĩ čĩ » nar.

Kunu wô tugurkurã, šaria Hamsîn ôro tedĩ, ôrdi-ĩ wônnu sôkurčunu ôro yugurĩ čĩ. Yum to arbataš-ã Bûgudi

Boogiriĩ mi čusćinĩ čĩ. Yosko Adiliĩ mi čubabi. Kumanu kuruk nduru, makuru matar-ã ko ma du yaabi tũgi madiĩ čĩĩ, kõi to ôro dahu huraa-ã ha tũruzi di nakaar. Ôrdi-ĩ wô kũuk koraa hosu. Yusopu li ndar.

Odu yugurkĩ ôro gali di kũgoi kor lidã, Yosko Adiliĩ mi du duyĩ. Kõi to di ômuri ŋgullahado čuruwo, wenege du Njamina du mannu bozudo yugó. Wô tatartundã, guru bu hodi-ĩ mannu tarakuo. Ŋgullahada čarku numi-ĩ du zotã, tũmudu wô du bozo. Aũ bũnnu pĩl čunno mannu yugó.

Kõsoi mi na lau a šatô dô lau čũo. Sasau asubaa-ã basuã, čarku ma yugurkoo, ôrdi-ĩ kũmo munduga-ã gunna tuyoopuda. Odu Kõsoi mi anna hunã ha du čũuŋu, ôrdi-ĩ hi wô ternduru šaria Talatĩn su tigirtu Allah čenu bozo.

Mura tũgohu loko, anna ndurã ha bokundã, wô tigirtu Hĩsen su yuhatu : « Kũmo ada F.A.P. su ternduru torkar ; kõi a gunna bõli čundu » yuhado.

Odu Hĩsen lerdo. Šaria Talatĩn lau a du du, ôro Sẽiseban tedĩ, tiri to gyunu, karahaa čũ dogudu wô hosćindã, anna-ã čudurti. Mõsoud yuhadi : « Karahaa ada yugurkoo, turndu » čĩ.

Yugurkã, anna-ã karahaa šaabĩe ndũ wuturi čundu, yũhutu karahaa-ã ôro yuguruwo. Ôro yugurkĩ, kõi anna ndurã čĩkã tũgiĩ kuhugo kor tohã, Hĩsen layinã, wasalu-ã anna hunaã

gunnó kordu hanayinã, kubo hunã yiga yoduru yuhadi :
« Kallia-ã wosa ni » či.

Čêne-ã kôï wosa čundã, karaha-ã mui guyi. Kômma ha
Anur kôsoi mi hanayi : « A Hîsen čunu čû kora du yuha. »

Odu to koo di Hîsen kôï to hi Allah čenu čuruu čaa ted.
Sûgoi sohi karaha to gudi-ĩ lî čîidi anna sohi čîkã, su artaša
yudoku, anna čû kora čado ; turo-ã ni čaa ted. To koo di
Allah tiyendu numi-ĩ lau to di makar. Anna mundu ŋuida
yugondú. Ŋuida čîkã ha sura kohuduru yum to dûski ndurã
to koo di torkar.

Gali bûnnu arbataš-ã (14.5 mm) ka ôguzuu čûo : Turo-ã
arbataš (14.5 mm) ko turonno, turo-ã ni ka čû do, turo ni
ka tuzoo do.

Arbataš ko turonni-ĩ ŋgo ôskoro Čadiana-ã karaha
Land-Rover su činaku yidao.

Ŋgo Lîbia tunda ha mannu tiyeo. Čîidi arbataš ka čûdi-ĩ
Rûsia ŋgo yibeyinã, čôhure čubapîe du yibeyi. Yibeyindî
muro, guru ni sa tuzoo yida ; guru ni sa čû yida. Kôï turo
ho činaku, ôro eskenu-ã ha čôhure čubabi. Zaga gudi
čongu tûrrie yugonnó yingaldu.

Sa tuzoo yidî gûrčundu čongu tugandi. Yibeyindî to koo di
yibeyundudo. Zaga gudi di čongu tûrrie yugó. Lîbia mannu

ngo budi yidĩ, kôĩ turo ho tũkudu činaku, ôro eskenu-ã ċubabĩ gunnoó yunu gudi hanayundú. Ka tuzooda-ã ngo dubabada ha ċũdutu yidadã gunnoó, wô bĩe bozu ċĩ durturdo yugó. Wô bĩe ċĩĩ, mannu karahaa dunoda yidadu gũrċindi. Ngo aũ hõkorċunu karaha ha su ċinaado yugó.

Yum 3 *mars* 1980, arbataš ka ċũdi-ĩ, to koo di tani hõkornuru karaha ha su naar. Karaha ha su nakurdo di bu tunda ha mannu budi njirka tiyeo. To di bu Mahuma Gulai muro arbataš-ã yihidi. Ôbudu Soĩ hi ni duna ndenno hunu. Mahuma Adiliĩ mi suag ċusċini. Arbataš to taduru, ôro lau a Gũyi yê Digel yê gunna gorsu a kohidirĩ, tani mannu bui hundu sa mada du tuduzu tĩyi. Dugusa hoo díšee tĩšido di bu, tuda ada Gũroo-ã mannu, Allahuza Kêbir su bui hundu. Ngo Hayaa sopuru, ma Gũro anna hunã ha huzaa tedã, anna hunã yida gũbkurċi.

Anna F.A.N. ga ôro bũro hundu turo yidao. Tunda yê Allahuza anna hunã yê ċetu hoktudundu, mura ha kôĩ hundã du boŋguru hitaar. Ôro Digel tedã gunna kôĩ dũudee-ã ŋgirigĩ kubo tundaa togus.

To koo di tĩyikiidi, kunu, kunu du ôrdi-ĩ hi ternduru torkirĩ, yum 8 *avril* togusã, sũgoi halaŋguru gali di bapiriadu tĩyikiidi, wô ŋa ċaċabtudunu ôro tirĩe tohã, aũ nahar (*Espagnol conseiller membre Frolinat*) turo tuyuhadi :

« Zogo ôro ndedîe tohoo, četu lukuri, ôro ŋa hotoa yoburîe daaru » čî.

To koo di yum 8 *avril*, ôro tidedîe tohã, nahar-ã ha mannu karaha arbataš-ã su naaru, tugurkurã, kôî nani čaki hotoa čoobi. Šaria Hamsîn tigirtã, tani muro hi hadar : « Aya sobus hotoa na yoob. Tani bu taa tigiri anna nurã ha lanuru tiri » nar.

Bu tuguurã, anna nurã tuyuhati : « Ôwonnî ôrdi-î kômo guru du čî su bûnno tiyihiti » čuo.

Odu kôî taa arbataš-ã taduru du boboŋguru hitaar. Čusnduru wô kendirî šaria Talatîn nerko tigiro. Šaria Talatîn tûgi-î kuhugo kor tohã, Sîdi Čôgoi mi na, Sîdi Bugar na yoo, Ollobodu Šahai Hoken na tada gunna četu čûo. Mura ha wasagaa yerî tîyiidi, tani hi so-î tuyubabo. So-î tuyubapã, Sîdi Čogoi mi na Šahai na mura karaha-ã su tuyunaku, arbataš ndurã taduru wô numi-î zabtudo.

To di bu, tani gorsu budi kohurdo yugó. Odu kôî a nahara-ã čîkã tûyukudã, nahar bui ŋgo labtan čî hananiri. Muro amêliada yohi, surča yûdii, muro tuyuhadi : « Nuro mannu ŋuide ni » čî.

Taa so-î sura tuyohu ôburi kor tobuzã, ôwonnî suru yidanú. Sûgoi so-î halaki yoguru, dûli di yibeyi. Kôî to su bûgudi-î Ôbu Daku Mahuma Burahimii, muro su čî ; tani yê Êrzei

Banjarai yê burãᅇgara ha su tîyo. Dohu yê dûski yê gunna hooduda. Tunda kôî di aũ yugó.

Ôbure ôguzuu kora kôî to di četu tobuzo. Kunu wozurã, so-ĩ ôwonni galigo di čoᅇudo yugó. Bu Kûsuri tidedu taa anna guru yigannu yibeyundu tiyeo. To mannu suru yidanú. Zogo so-ĩ gînidu tohu bos. To di bu gorsu-ã du luar. Kôî gorsu čide haki tigrirido yugó.

Yum 6 *octobre* tohã, ôrdi-ĩ labar tadurdó di pamᅇgurčunu yuguruu, numi-ĩ dî Amsînene ᅇgirigĩ tuyoᅇo. Tunda villa Lamy čindĩ matar-ã doogi-ĩ du tîyo. Ôrdi-ĩ mannu kôî tunda tîyikã kûuk kor lido, Allah yohiê Sugĩĩ Êisala na arbataš-ã yidadu lidu, su totokundu, bokuo.

Tani kôî yiga kurrã, karaha Tošiĩ Salaa yaabi-ĩ kûli ôronnu tuzu čî. Maaru kûli wônnu naar. Odu anna nekindî čikã gunna ha čedaar. Kôî yiga tuguurã, aũ gunna čai čî. Gûkuni anna-ã ha bereyinîe barayini ma yê dî yê hûroti-ĩ du tugaŅî čî.

Tani tidedî tigiri hadiriadu : « Nuro yina ada kohũú, du ndûusú, anna ada čarku tûrri čikã, nuro haki werenuũ zabtundú nuru » hadar.

Gûkuni tuyuhadi : « Kumanu kôî artasa-ã čikã šigiri artasa yoob. Anna-ã ha tigii ye » čî.

Taa tidedu artasa sôndugo tuzoo kora ka yihitu tiyendu, yoburu anna gorsu-ã du číkã ha tigiiduru gorru yerî, sûgoi ma kurru matar-ã lau wônnu ma tûruzi di tidedî, araã ndura guru durru, artasa gorru yer. Kôî turo a Mûsa Êli Kôso, Mahuma Êli Kôso ndirî, tuganî čî haŋuru hoktudo.

Sûgoi Sukia Anur ndirî, Sukia Kôši to hi mannu haŋaar. Odu Sukia Anur karaha-ã ôro dahu-ã ha nakaar. Tudugandî, artasa ndurã gorkuru yendirî, kôî a Dûguli-î mii hi ma tûruzi di tûduuso. Ma du araã ndura guru čûku, artasa yendar. Allahuza Kiči ndirî, Kêlleî Abdala dîhi hunu, anna F.A.N. ga čû daŋaida kubaa čooba yida tigiro.

Odu muro tuyuhati : « Anna ada ha yoopu zabsundu » čî.

Muro hi artasa huna yenduru, anna daŋaida-ã ha yopuru zabtudo. Lukurî, kôî a mbo anna ndurã ha artasa yendurã tigirtã, anna tusu čûo durturi. Tunda anna tundaa ndiri hanandurú. Su tigrî, amma tani lau ataga čû koraa čî. « Sus, sus » tiyi.

Tani amma ndû tuyuhadi nuru, su lanurã, anna F.A.N. ga, turo wasalu hunã yê wasalu ndurã yê šiša. Odu tani karaha-ã mui dunar. Mura tûruzi di su artasa tuyudowo. Tani hi so nur anigi-î tuyuguro. So nur bori-î ni ŋgo togurkudo su artasa ôguzuu bozo. Yunu gudi kohurdo yugó. Karaha-ã ôyu-ã kuba čû du yaŋuru maarã, dî tûruzi di lukurî, tiri a matar-ã kopuru kandaar. Lukurî villa Lamy

nerko tigirtã, guri-ĩ budi hidenno duna nurã tus. Lau nurã lûduyunu Mouscou či.

Aã nurã, muro tuyuhadiadu : « Tani ñuide » či.

Tani hadiriadu : « Čaņu yusu » nar.

Muro zabči tuyuha : « Nuro čaņu ni ? » či.

Tani hadiriadu : « Nuro čaņu yusu » nar.

Karaha-ã su landurã, anna čû F.A.N. ga MB dañaida tadorã yê aũ tundaã yê su yugondú. Odu Mûsa Êli Kôso ho « yusu » nar.

Tani turonnu karaha-ã du sa lau du bu tobus. Kunu čĩ anna tundaa, Ahuma Hûloti ndirĩ yê lau huna čû yê tugandĩ leo. Odu tûrri lidu layindã, tani lau turo ho geledudunu tĩši tĩyi.

Mura yuhati : « Hêi du aũ čĩ » čuo.

Odu to koo di tuyonĝu villa Burkina tûyuko. Taa Gûkuni mannu anna yida du tuganĩ čĩ tuyudurã yuhadi : « Mouscou ôwonni ñuidunu ni ? » či.

Tani « aã » nar. Odu kô taa tuyonĝu dĩ Farša labtan-ã tûri. Farša a layindã ñuia ada tusa čundu, bu Kousserie tuyonĝu tûri. Kô to di sura tuyohidĩ, landurã sura hundã suru yidadú. Wañammii lukar. Wañammi kasčunu tuyunã,

mannu suru yidanú. To koo yohî so-ĩ muro du yalčunu, layindã suru yidanú Lîbia kediyuo. Lîbia labtan 2 *mars* du šibtiiynu, du ôbure ôguzuu tobuzu amêlie yohudu, so-ĩ du asuba čûuŋo. Mbo šahar *novembre* labtan-ã du tigrirido. Odu šahar avril Adum Tôgoi mannu *Allemagne* du lido (1981) četu Njamina tiro.

To di bu šahar *juin* tohudo, armeé intégrée yibeyundudo. Anna buya F.A.P. du čikã munduga-ã gunna kôî to di čûuŋgudo.

Tahar Khartoum ndirĩ F.A.P gu bui di čî. Tani hi lûduyunu tuyuhadi : « Nuro aũ karandudo yîri duna ndenno nur du sobus » čî.

To koo di duna ndenno F.A.P gu du tobus. Du tûyuku, yina ada gunna yibendirî, Hasan Merdege (*président F.A.P par intérim*) du čî. Tunda ni kôî a ôskoroo-ã buya du tîyo. Lôko 7 *juin* lukurĩ korã gunna kôî to di tîyo. Kôî to du tîyikã, aũ wasaga hunu wuduo ni landiri. Allači Yîrei ni gûrsoo-ã bui.

Ŋgo kôwuro FROLINAT du aũ ôrozi hunu tubudo koo mannu arbinduru buya-ã ha yendiri. Yina ada ŋgo giba kanjindã borsu landirî ôburi *juin* togus. Ôburi *juin* tohĩ gubudi, yogodi-ĩ ŋgo du čĩĩ čuruk. Sûgoi Hîsen ma du duna guyunu, numo numo di čubabî dî liî, Salal li. Tani yernuru anna numi-ĩ du dikundu čikã ha lûnuru, čammuru hadar :

« Anna munduga-ã gunna yiga tûrroo mannu, tunda kôituro ho tobusu numi-ĩ orrondar nuru hadar. »

Gûkuni lau yina guru baranuru tiye.

To koo di numi-ĩ taduru tîyuku, ôwonni numi-ĩ du ôskoro yara Nîyeriaa-ã du çûo. Ôskoro yara Nîyeriaa-ã mura memerda, Hîsen lau çûo. Mura mannu çetu mêde tuyoobo. Odu ôrdi-ĩ F.A.N. tedî Massaguet lido, numi-ĩ gunna anna-ã çarkî çûo. Yum 6 dogusu aũ gunna tedî çî. Tošîĩ na anna guru hu arbataša yenduru, dî pont šigirtu turndu, Gûkuni togo tûgohu tugurii, to gunnoó sôyo-ã kûdukude çindi ndar. Aũ gunna čaa tedo. Gûkuni ni anna-ã numi-ĩ du čûkudo koo di čuduri.

Tani tigiri Gûkuni hinar : « Ndû koo kohĩ njî ? » nar.

Gûkuni yuhadi : « Aya *Pont Bêlilé* lidoo mannu sũgoi zabhitiri » čini.

Sũgoi ôwonni dogusu zabtudunu kôĩ Gûkuni čĩĩ tigiri hadar : « Nû aũ gunna čaa tedo. nuro ni aya mozu njĩĩ, anna-ã čûkudo ŋadu durĩĩ yee ndu koo di durĩĩ njî nuru » hinar.

Ôwonni hadiriadu : « Dahu ŋgirennoó lukuru numi-ĩ du yunu tohî čĩĩ lanu » nar.

Odu tani yê Sugĩ Anur yê, tunda tuzoo, Gûkuni hi makuru numi-ĩ kûrinduru layinã, mugoi amma gunna tedĩ ċide kordu hanayi. Dogusu tohã tunda mannu yaabi Gûkunii-ĩ tigirtu tĩšo. Tani yê Mûsa Sugĩ yê tĩšo. Anna huna bûnno buya-ã yidadã borsu ċũo ; aũ gudi ċide yugó.

Saa sabaa nerkayunno, Dûguli-ĩ mi dĩ di ċĩ yuguruwo tedĩ liĩ yuhadi : « Nura nũ aya mosu njĩkã, dĩ êredie Ćad kaa aram gunna ċabtu ċĩ. Anna-ã ni gunna ċarkĩ ċũo. Mura ni gokĩ yugondú. Asubu gunna guyundu yidadu ċabtundu ċĩkã, nura yunu durtĩ njĩkã ndũ ? Mura ni yunu orro di yidadã ndũ ? » ċi.

Tani halaŋuru Gûkuni hi hinar : « Anna-ã gunna sa mada du tusu ċĩkã, nuro kuriĩ garċindĩ ċũo » nar.

Gûkuni tuyuhadiadu : « Dga ŝigiri Allahĩ hi lanu » ċi.

Tani yê Wordugu Ŝide yê Alhai Usman Sugi yê lukurĩ Allahĩ-ĩ tigirtu lahandurã : « Alhai Usma wol Ŝarda nuro njĩ ni ? » ċi.

Tani hadar : « Nuro anna-ã gunna tûrroo, luumãá ndũ garrĩ » nar.

Allahĩ yuhadiadu : « Tani nogor tidedi ? » ċi.

Tani hadiriadu : « Lau anna-ã tûrrĩ yusu » nar.

Odu kayuã hunã čumosê yerči. Muro gunna muskor borsu ; šendaa čû gunna muskora hûči yida. To yê to yê kôidi bûnno šiša du sauyuo. Suag-ã ha haturu šigiri karaha-ã wallanu ndar.

Odu Allahîi kayuã hunã čumohudo kor tohã, tunda yiga kurukar. Yaabi-ĩ ko-ĩ yiga kurukuru kînniĩ lukurã, karaha Range-Rover-ã Sîdi Kodonu čusčini ma du čî muide du yuguruu dî kanji. Sûgoi karahaa guda čû kanjuo. Nduzoo-ĩ Hasan Merdege, tani kubo kidektugunuru nûgoi nurã, muro kubo di tani hi zabsu či. To koo di Allah tiyendu Farša ha dî lukar.

LÔKO KÛSSIRI TARAḌGURĀ

Farša tigirtu, Gûkuni karaha hunã markaba-ã ha su činaa, četu lukurîe tañaã su naarã, ôskoro yara-ã čedo. Odu karaha nurã ternduru wô lopar. Karaha Gûkunii-ĩ čaktorkuru, tani karaha Wordugu Šidee-ã taru Alhai Usman četu sohi tugurkar.

Karaha Range-Rover-ã kômo kûrtu, kûrto-ã wûdur yidanú, tûyuhutu kanji. Tunda labar tadurdó di lukurî Mara tigirtã, mura hosčundú. Mbo kôî yerturã Gûkuni Usman su yuhadiadu : « Kumanu bu *Cameroun* šigiri, ôskoro *Cameroun* čikã ha labarru » či.

Usman to hi bu hôdi-ĩ tarakunu *Cameroun* tûruzi di ted. Odu tani yê Wordugu Šide yê lau ndura tiyetã yê dî Farša Mêlezi lau lukar.

Anna-ã ha hadiriadu : « Aya gartundu, ma lukuru Gûkuni yunu yohã waha torkuru, lau tedã hananduroo, taa tunda yunu tohĩ kohudar » nar.

Odu ma lukurî, dogu du yuzo yerčînî čî durtaar. Su tigirtã, Gûkuni na karaha-ã wûni čendu, mura bu hôdi-ĩ tarakundudo.

Odu tani Wordugu Šide hadiriadu : « Nuro dî tûruzi di yusu anna Bongor lau tûrrã yunu aya tohã duru yidadú. Gûkuni ŋgullaha du čuruk nu labarru » nar.

Sûgoi tani dî zabtudunu tigiri, anna taa čîkã ha hadar :
« Gûkuni karaha hunã wûni čenu ŋgullaha du bu
Cameroun taraki » nar.

Tani bu *Cameroun* tigiri, anna *camerounais* haduru :
« Tunda aya tîyo bu taraŋgirĩ hadiri » nar.

Camerounais kôï čîkã tigiri gûrso hunda mîndie yerã, mbo
yina guru yuhatî čîkã mannu dikuo ; ko hunã du dîĩ loburu
to koo di anna guda čîkã gunna yuguruwo. Karahaa ndura
tadurã munduga-ã arbataša, mbi ndur tadurã ni bui gunú.
Karahaa su asuba yidadunnãá ôro Tû tûrria kugã, asuba
yenduru, zaga ôro Tû ndûrrĩ sugandu ndar. Tunda
gabtiyindã ni bu taraŋgiri, mbo mannu tunda gunna haki
lukurdó tohi ndar.

Kôï taa karahaa čû čačamburu ôro Tû dahu čeo. Tunda
gabtiyindã karahaa arbataša tadurã, wûni yenduru bu
Kousserie taraŋgaar. Allaharčunno, bîde ma dahu yenduru
lukurĩ tîyikiidi Kêlleï Abdalla karahado *camourenais* četu
Gûkuni hi barayindî čûku hoktudo.

Hoktudundã hidiyuo : « Gûkuni ndû yohu ? » čuo.

Tunda hatiriadu : « Gûkuni a di tarakirči » ndar.

Mura hidiyuo : « Lau tarakunã hanandiĩ ni ? » čuo.

Tani hadiriadu : « Tûruzi-ĩ hananiri » nar.

« Mura tûruzi nogor lau ? » čuo.

Tani hadar : « Kôî a tûgi čuu čĩĩ, lau dî di taraki » nar.

Odu mura numi-ĩ hanayindi. Lukurî, kôî turo wô čaktugundurã Gûkuni bozu čî tigirow.

Taa čonĝu kôî préfet čĩĩ tûko. Tunda numi-ĩ du tîyikiidi, muro hi gubudi čonĝu Maroua tûri. Tunda ni sohi tigirow. Maroua du subua ôguzuu kor tîšo. To di bu tani yê Šahai Šêmi yê lûduyundu, nura Lîbia ndûrru, anna taa čîkã ha zaga numi-ĩ sopurã hatiĩ čuo. Yoo nduru to koo di tîyikiidi, sûgoi Gûkuni muro *Algerie* tedîe togus.

Odu Gûkuni muro tuyuhado : « Halas ndûrrú. Tani *Algerie* tidedî tîyi. Nura mannu četu lukuru, taa bu Tripoli yûsurru » čî.

Odu garndirî yum tedîe tohã četu lukar.

SAGAHUNU ALGERIE TIGIRTĀ : 1982

Algerie tigirtu subua čû kor tîšã, tani yê Alhai Šahai Šêmi yê Tripoli lukar. Tripoli tigirtã hûndug turo du čaktiyihido. Subua kor tîšã, Adum Tôgoi li. « Gartu » či. To di bu subua čû guda tîšo. Ôwonnî Oki Dagaš mannu Lîbia li.

Taa Adum Tôgoi tani hi tuyuhadi : « Nuro tûgi êriskii dînee-ã kôî gunna ndedĩ tam, Algerie šigiri Gûkuni hi hadurdo yina guru njeni kii » či.

Taa tani dî Algerie zabtudu. Algerie tigrĩ Gûkuni na numo turo čer hunã Telgilef čindi, numi-ĩ di yiga orraa ôguzuu koraa kôî taa čûo. Tigiri gûrso-ã tiyenu subua kor tîšã, Gûkuni hi yuhati « Čabu O.U.A. Tripoli a tohiadu čî. Nuro hi Gidehi baranjini ma Tripoli ndedi » čuo.

Odu Gûkuni tuyuhadi : « Tani Tripoli tidediadu tîyi. Garru četu lukuri » či.

Sûgoi subua kor tîšã, tuyoopu Algerie numi-ĩ tigiuro. Tigirtã muro koo di tiyendu šahi mannu yadurdo yugó. Tuyoopu matar-ã tûrru čôhuri-ĩ hi kônduru Tripoli čaŋgar. Tripoli matar-ã čaŋgurã, tuyoopu numeĩ turo Hadbatul čindĩ, yaabi kôî êlinu du čîde, yaabi durda ada ŋgo gibaa-ã turo du tigiitu tûyududo. Tani yê Gûkuni yê Mahuma Fakĩ yê Adum Kûgu yê Abakar Allahuza yê, kôî to di tîyo. Subua tobusoo, tiyihiti ndiri, aũ ni četu hoktuyundú.

To koo di anna-ã četu tôlhuno du nûnguri, sûgoi yogoda-ã tôlhun-ã mannu tuyugobo. Odu zaga yugopã hanandaar. Anna mundu četu nûngurdoó mannu anna mîndie četu nûnguri. To koo kohidirî čabu O.U.A. nerkayinã, yogodo turo Alî Tîreki čindĩ li.

Odu Adum Kûgu yuhadi : « Tunda ha kôî a di daŋaĩ tûuŋguũ tûhutuũ, tôlhun-ã ni kopuũ, anna ndurã ni baradiyindi ; haki hoktudundú ; a ŋga koo čunu četu čúlloyuo. »

Alî Tîreki, yogoda muda-ã ha hiyi : « Tôlhun-ã wuna yugobu ? » či.

Mura yuhati : « Tôlhun-ã wô du zondudo » čuo.

Alî Tîreki yuhadi : « Kumandu yibendu ! » či.

Mbo mannu du du kôî soduruu-ã su yodirkidĩ gunnoó, yunu gudi zondu yidanú. Odu yibeyundu, subua tîšã, čabu O.U.A. nerkayinã, tunda ha êski di yigannu tiridudo yohudu, ôro tiri mataruu-ã lau tuyoopu tûrru. Sûgoi wô numi-ĩ dahu čendu zabtundu hûndug turo du tûyududo. Odu čabu O.U.A. Gûkuni ni du tigiri, Njamina du ni anna leo. To koo yohidî, čabu-ã taritari duyuo. Odu kôî to hi Adum Tôgoi na Okiĩ Dagaš na Gûkuni hi čudurtu hoktuo. Ôwonnî anna guda Gûkuni Ged na, anna Frolinat šiša du lida čîkã gunna četu hoktuo.

Gûkuni tuyuha : « Gûrso môliyuno tûdušu, Okîř Dagař su ye » čunu. Okîř hi yer. Gûrso-ã gunna ŋgo môliyuno murdom sã hoo, aũ guru hu môliyun ye čini. Anna-ã ha gorru yerî, wenege du yunu kînniř môliyun kor gabči. To balak kubo nur du bos.

Gûkuni tuyuhadi : « Tani Algerie tidedu tiri. Nuro dí Sebehe yusu, anna-ã ha čaçamu yina guru yuha » či.

Taa Gûkuni, Algerie tedu sũgoi Sebehe li.

Odu Sebehe a četu tûyuku, Yũgo ni li yunu gunna yibeyindîe togus. Odu Yũgo ho ôskoro-ã bui yoho. Taa Yũgo tani hi bũro ŋjũnjuu-ĩ wur ndenno hunu tuyogus.

Komboĩ Sebehe du čĩĩ hõwuluu tani lannaar. Anna ndura aŋgalda Malumma Adum na ha haduru, nura du ŋgiridu mosunnoó, anna kuna-ã kombommi tigiřtenú nuru hadar.

Mura ha yoburu tigiřiduru kombommi du yũdaar.

Odu anna kuna-ã ha hadiriadu : « Anna buya-ã mannu kombommi di čũo. Sũgoi sõura gudi četiri nuru » hadar.

To koo di anna guru guru kora leo ; guru kora dunadu čoobo.

To di bu Mûsa Sûgi na anna hunda yidadu lidã gunna ha kombommi du çûuŋo. Odu to koo yohidî *groupement nr.3* yibeyuo.

GORSU GÛROO-Ã : 1

Gûro 1 ndiri gorsu togus. Tani yê Yûgo yê ma Gûro tigi-ro. F.A.N. čillaa tigi-rĩ bokuo. Aũ Bûduma Lac gu turo daŋaide di čoŋo. Ôrdi-ĩ ni čaa ted. Anna Gûroa-ã ni šimasu bui yidadú. Čaba guda wô du tani tugonnoó di yoho. Yina durru tammãá zaga haki hadîe yugó. Tani, Yûgo wur ndenno hunu kô-i tedĩ gunna četu lukuri. Bu Ôgi mannu četu lukuru zabtudo. Ôwonni Gûro 2 ndiri gorsu togus. Ôskoro F.A.N. ga sũgoi tigirtu gorsu yeido.

Tunda Sebeha a tûyuku tubasã, čačabtudundu yernduru turo tîšã Gûro tigi-ro. Tigirtĩ gubudi *groupement nr.3* dazaa-ã to ni ma tigi-ri Gûroa-ã četu hoktundu F.A.N. su gali di zûbčuo.

F.A.N. anna huna mundu čado. Asuba huna mundu hiye ted. Anna daŋaida ni kubaa čoobo. Odu to koo di tani Yûgo četu tigirtu dugusa čû kora tîšo. Tîšã, Yûgo anna buya-ã ha čabč-i. Kô-i to di *groupement nr.1* yê *groupement nr.3* yê Okiĩ Dagaš su bui hundu, Yûgo čabčunu, yuhadi : « Gorsu a kohuduũ kanahartuma budi gali čunu gagalč-i. Ôwonni nura yunu a tohã gunna arbindu tendu, tani Gûkuni hi kenuru yeri » č-i.

Okiĩ Dagaš yuhadiadu : « Nuro sokoša buya gunuũ čôhuri hi čakurũwo, yunu tohã baraniĩ, zaga to koo di haktunú »

či. Dagaš mbozoo muro hi (*état major*) du bui yohidê kugiĩ, wenege du yohududo yugonnãá, to noor yida.

Yunu to yuhadã Yûgo kunu oorči ; hûruũ mannu čenno yugó.

Yûgo yoo činã yerči bu kôï turo tigiri boyo hunu čumosu yîs. Subua kor gunna yunu yohudo yugó yîsu čï.

Dugusa dîšee tîšido, allahar kor, Allahuza Kêbir tedî li lahadiyinã tuyuhadiadu : « Êrbedige Yûgoo tar » či.

Tani hadiriadu : « Êrbedige-ã te ! » nuru, maaru karanaar.

Karanurã su yuhadi : « Ôskoro F.A.N. ga Wañaña čïkã numi-ĩ yusopu čarku tûri. Ôskoro nduã haki lidîe kumayundu haki lidoo gali čundu arbiyundudo. »

Taa Yûgo mbo yîsi čïĩ čeduru hadar. « Allahuza êrbedige nuũ yûgurtudo » nar.

Yûgo yuhadiadu : « Dga karanu » či.

Su yunu čïĩ karanuru hadar. Odu muro hi lahayunu yuhadiadu : « Karahaa nuã mbia yudou nani, ôskoro nuã čačamu, tûgohu saa talata tohoo yerru Wañaña gezenu či. Saa site tohoo, *groupement nr.3* yerčindi či. Saa tumania tohoo tunda yerndiri » či.

Allahuza yuhadiadu : « Mbi-ĩ garndirĩ tĩyikã ôwonnĩ lido yugó » ċi.

Yũgo yuhadi : « Yoo garru nani mbi-ĩ liwo, nuro karahaa nuã yudok nani yerru ċi. Nuro hi sohi guda-ã yerċindi. To hi sohi tunda yerndiri » ċi.

Allahuza tuguruwo, enou bozunnó di karahaa mbia-ã leo.

Odu Allahuza aũ kegurċunu yuhadi : « Karahaa mbia-ã leo ; tunda karahaa ndurã tokurĩ tĩyo » ċi.

Yũgo yuhadi : « Mbia nduã yudoku yũsurru tunda sohi tugurkuri » ċi.

Mura mbia hundã yudoku tũri. Tunda mannu saa tumania yerndurã, saa wahid kor Wañaña gũmbar. Odu Wañaña du dugusa ôguzuu kora tĩšã, tani yê Īsa Lũti mi yê sakan gundurũ yerndaar.

Yiganu tĩyikiidi, yaabi Yũgo ċĩĩ ko-ĩ anna budi kũriyindi zĩi di durtaar. Karaha turo mannu tigiri ted. Tunda ndũ yunu ċĩĩ, karaha mannu tigiri tedã nduru lukurĩ tigiuro.

Tigirtã anna ċikã yuhati : « Anna guru aya lidu Yũgo ho ċoŋgu tũri » ċuo.

Odu tunda karaha Jeep Yũgoo-ã makuru sohi tugurkar. Barandirĩ, Okĩĩ Dagaš yê mura (*groupement*) buya-ã yê

bosu čûku tigiro. Odu lahanduru : « Nûgoi ngullaha ni ? »
ndar.

Groupement buya-ã yuhati : « Dagaš yê Yûgo yê kunu kiša
čûo samahahirîe, to koo di Yûgo ho makuru kûrtudar »
čuo.

« Yoo budi gali » nduru « tunda ni četu tobuzo. »

Yûgo yê Dagaš yê kiša du čîkã samahayihitu bozo. Dugusa
subua kor tîšã tunda sûgoi Sebehe zabtudo.

Lôko gorsu Wañaŋaa-ã tuzuã bu Haya gezendaar. Sebehe
tigirtu anja hunda barayundu artasa yê mbia yê
čačabčundã. *Groupement nr.2* sêryeã Allahîi bui hundu,
Wordugu Šide yê Mahuma Palastîn yê kuba ndenna huna,
Mîski kiši hunã dî tedî du, *groupement nr.4* Îdiris Šêlliï,
Îdiris Adil ndirî to muro bui hundu, taa čûo.

To koo di ôburi dîšee-î du groupement čû tada asuba hunda
yê mbia hunda yê čačambar. Ôzuũ yum hirčinã, Yûgo anna
ma čîkã, Okiï Dagaš na ha tôlhun čenu hiyi : « Nura
galnduda ni ? » či.

Mura yuhati : « Tunda galtududa » čuo.

Ôzuũ yum hirčinã, tûgohu, čačabtudundu, anna mîndie
Ôgi a hûturã, tunda ôzumnduda Ôgi a yernduru, odor kor
Wadi Maru tigiro. Kôi taa Turkiï Yeskuã na Wordugu Šide

na Ôli Mahuma Kandî na četu ôzuũ korkuru yerndaar. Dogusu yasaanduru Rond-Point de Gaulle tigiro. Kôï to hi tîyikiidi anna *groupement nr.4* Mîskia-ã lidã, četu yernduru Suri tigirtu kohunu yibenduru tîšo. Tûgohu lukurîe tohã, tani karaha Worduguu-ã tigiri, suag-ã ha ôro dahu-ã ha naaru, tani čusti di tobus.

Lukurî Yin tigirtã, bî-ĩ kunu owonno, Kîrdimmi tigirtu kohunu yibenduru tobuzo. Kunu čĩĩ anna numia-ã lidu yuhati : « Ôskoro F.A.N. arakudûski aya čûku tûri » čuo.

Odu anna sohi čikã garnduru lidã, tûrizi di ma lukar. Mbo Sôo Gôruã lukuri nduru Yûgo ho labarndurdo.

Yûgo yuhadi : « Gubudi yûsurru sohi tigirti » čĩ.

Tunda Sôo Gôruã tigirtu kohunu yibenduru tîyikiidi Yûgo na leo. Kôï to hi dugusa čû tîšo. Anna ndura ma čikã ha hindar : « Tunda Sôo Gôruã tîyo, nura lau nga lau njûku » ndar.

Mura tuyuhati : « Ôwonni Wadi Dôm tîyo, mbi-ĩ haŋgurú » čuo.

Tunda mura ha zamburu hindar : « Dgo galtududa ndũwo, sũgoi nga koo di mbi tadumãá » ndar.

Odu lanurã, kôï a gali gunú. « Bu lukuru Mani Wariĩ kôï to gali yunu ligiê dogu du duriĩ, ême hunã ni durusa, kôï a soba borsu-ã koo gunú, ma lukuroo gali » nar.

Taa lukuru Mani Wariĩ tigirtu tobuzo. Kôï taa dugusa ôguzuu kora tíšã, aũ turo bu Fai tedie durtaar.

Yûgo yuhadiadu : « Êrbedige yibenuru yeroo gali gunuũ ? » či

Tani hadiriadu : « Aya tiridu tîyikã basie yingaldu, yibenu » nar.

Odu Yûgo amma ha êrbedige yibeyi çe.

Êrbedige-ã su yunu gunna labarndaar. Anna ma čakã ha tôlhun yendiri, ndu koo kohuduũ ndiri ?

Mura mbi-ĩ lido yugó čindi.

To koo kohidirî dugusa dîšee kora tobuzo.

Sûgoi anna ma čakã labartiyuo : « Êski di mbi-ĩ hanjaar, tûgohu yerndiri » čuo.

Yum to tíšo, togi-ĩ ôwonni lidú, hendar.

Mura yuhati : « Dogu tugondú » čuo.

Odu tunda ôskoro ndurã ha čačamburu, karahaa-ã su galnduda du sobusu ndar. Mura ko ma du tigirtoo, tunda aya du tigirti ndar.

Odu *groupement nr.4* Îdiris Adiluu-ã yê Bîrehim Bešeruu-ã yê ma Allayîde lau kendar. Lau gudi-ĩ Ômul tiri a bui du ndûuski-ĩ sêryeã Allahîi yida čî. Barka Čôčoriĩ (*commandant compagnie*) hunu, to koo di du tûusie. Wordugu Šide yê tani yê lau ônu du tûduusie. Mahuma Palastîn yê *commandant compagnie* mulezum Yosko yê nura yiganu šîgitu, hôsči anna du tûusã turo kudur tulloo, huza yendu ndar. Yûgo muro ni tani sohi tobuzi čî.

Odu to koo di du sûtudo. Tunda lau ônu tîyikã, aũ morčînã Wordugu Šidea-ã lukurî, Ômul tûgi-ĩ kuhugo kor tohã, anna F.A.N. ga ma du čarku yugurkuda labar yidadunnó di bosu čûku su tigiro. Su tigirtã, Kôku Anur na karaha-ã dahu-ã ha čîkã yuhati : « Yertu ! Anna lau nduã ma tûrroo, nura aya mosu njîkã nûgoi » čuo.

Labar tadurdó di aũ turo ôduwurdu, su artasa tuyudowo. Wordugu Šide yê ada guda čû kora yê kômma su čado ; guda čû kora ŋuiduo. Yina tada tohidĩ Alî Sugĩ tiyedo.

Odu anna ada čatã ha tigiituru karahaa tîbimmaa ha yenduru, tunda wô kurukurã, anna-ã suri-ĩ du mortuda lau tûrrĩ hanayundú. Anna munduga-ã gunna lau čûkã hanayundunnó togus. Arbataš tadorã ko turonno. To

mannu ôze-ã tugopudu, yunu kohidirĩ gunna hanandurdó togus.

Odu anna wô du čikã ha hanandurú. Tunda karahaa taduru ma yê dî yê kêrbindiri tîyikiidi, ême saana guru čûo. Du kohunu yibenduru, anna ndura wô du čikã yugurkĩ waha hitaar ndar. Ôwonna ôrdi-ĩ wônnu kûriyinie mannu durturi nduru to koo di kohunu yibenduru du tobuzo.

Bûnno tadorã, bûnno kuna gunnoó, bûnnu bui tadorú. Kôï to di tîyikiidi ôskoro F.A.N. gaa-ã arbataš hundu turo yê *canon 106* hundu turo yê yidadu wônnu lidu tuyudurtu su tiyihido. Tunda ni su hitiri, to ko kohidirî tunda (*mortier*) taduru koŋgar. Kunu čĩĩ, Ôli Mahuma Kandî mi na dogu du zîi di tuyudurtu leo. Sûgoi Yûgo ni li, sêryeã Allahîi mannu li, hiyi « Ndû koo ? » čï.

« Anna ndurã kohuna yibeyundu yidadu čûo, ôrdi-ĩ ni hosčunú to koo di tîyo » čuo.

Yûgo yuhadi : « Čačabsundu kunu, kunu du ma gubudi lukar » čï.

Odu to koo kohidirî sôlli maarsuu-ã tohã, bûni Ômuluu-ã ko-ĩ su tigirtu tobuzo.

Ôrdi-ĩ kôï hunã nerko budi dogu gunú. Wûne hundã dogusu ma yê dî yê čarkĩ durturi. Tunda odu kohunu

yibeyundu, tunda ha su sũktundi nduru, tunda mannu kohuna yibenduru tĩšo.

Tũgohu tohã, Ídiris Têgil muro mbozoo, anna ada *groupement nr.4* du čĩ, tedĩ li, labara wuturã, muro yuhadi : « Lau ndurã galigo di tĩyo, miškile tadorú » čĩ.

Tunda hindar : « Aũ nohudo čĩn ndurã ? »

Muro yuhadi : « Aũ nohudo yugó. Ôrdi-ĩ ni kômo-ã yũhudu čaa ted. Nũ kômo-ã anna nurã yidadu čũo » čĩ.

Kunu tobusã, lau to ma du anna čĩkã yugurkã yuhati : « Ídiris yê obudo hunã mi-ĩ yê morčuo. Ôrdi-ĩ ni kômma yusobu čaa ted » čuo.

Odu anna sohi čũku mašaa yidadã ha labarnduru lidã, kunu, kunu du ma lukurĩ ma Yĩdi tigiro. Saa atunašur tohã, Allah tiyendu numi-ĩ tũduuso. Ôrdi-ĩ anna huna mundu yũhudu čaa tedo.

Anna ndurã turo, turo du dĩ suri-ĩ du čũku mokindi, guru ni anna araŋgada, yuhati : « Abba ana gaid hĩni » čĩni (bêrberi) nooši turo čubaba tia-ã gunna hũduda. To koo di kubaa čoopu ma numi-ĩ yigiido.

Okĩ Dagaš na mura ôŋgohi di ma numi-ĩ tũusa. Mura numi-ĩ tũusĩ, tunda tigirtu dugusa tũdušu tobusã, ôrdi a ma čĩĩ gunna tunda dĩ tĩyikã basu, gunna dĩ yugurku lidu Ômul

nerkaa bosu čûo. Lôko čarku čurukĩ mannu lau to Mardagaĩ yê Yîdi dî koriĩ yê gunna kôî to hi yiga čarku čuruwo. Odu to koo di tunda ma numi-ĩ tigirtu du tobuzo. Yunu a tohã gunna Yûgo labara-ã çe. Taa Okiĩ Dagaš na četu hoktundu, yunu tohã gunna labartuo.

Zogo anna guru mêde guda mannu yuhado, čîidi tunda yina tohudã, dûli di yire-ã hatirĩ gunnoó, du mêdi ŋinei walla yoo yina guru ŋgandamai walla yunu to tûrtu tadurdo yugó. Kômo guru anna yina yuhatiã du, tunda ma numi-ĩ tigirtã, anna *force neutre* yara-ã êski di leo mannu čundu tuyuhatu sadiyuo. Čîidi mura anna lau ma du zotã aũ hundu nohã turonnu. Bîrehim Čêniĩ, kôî a bûrdu wô numi-ĩ čakundu zotĩ (*accident*) yohu kôî to hi aũ a Allah arrahamnji morči. Gudi hunã Yugudu hu mannu su kôčuo čîidi, wenege du aũ hundu ŋuidunno mannu yugó. Ôrdi gudi čudurtu četu gokudo yugó. Haya ni ndoŋusi ndurã to tûrtu du Allah tiyendu makar. Haya makuru ôburi tobusã, Yûgo čuruu Lîbia ted.

Ŋgo tani ŋuidudunu labtana tuyoŋgu tûrrudo di bu, anna ma du četu tiridã du aũ ŋgullaha yidado yugó. Anna ma du četu tiridã munduga-ã čado. Anna čatã du Bîrehim Mahuma Kandî, Galmai Kamakama, anna šišaa mundu čado. Duida-ã to di bil, tada du Ôli Mahuma Kandî, Tošiĩ Sala, tani turonnu ŋuide nuru labtan-ã tigrĩ, Êrzej Banjarai

na Anur Kôsoi mi na tani di gubudi ŋuidundudo labtan-ã du čûo.

Sala Barkai mi hi Lîbia du čôhuri (*hélicoptère*) kegurčundu čoŋgu Lîbia tûkudu, asuba yê anna yê čendu muro mannu sohi gûbkuřci. Muro mannu li. Gorsu-ã du kubo dui. Goî muro ŋuidu. Sûgoi wô Lîbia du anna kegurčuo. Ôwonni gorsu-ã duna guyi. Tunda ni asuba budi tadorú. Gûkuni lôko ôro Tû liĩ, asubu a čĩĩ gunna Hîsen muro guyi. To koo di tunda ni asuba tadorú, mura ni asuba yidao.

Odu Gûkuni wô Lîbia lau, asuba buya barayi. Šahar site-ã (*juin*) tohã, anna tuda Lîbia du čîkã ha asuba čendu kegurčuo. Anna lidã du Mahuma Ali Atuman, šurtaa-ã du aũ ôzide, muro hi bui hundu. Asuba buya-ã du aũ turo Ali Dôuki čindĩ, aũ to hi du kegurčuo. Lôko tuda-ã wônnu lidã, Sala Barkai mi hi têskide di čendu, gorsu-ã du čûuŋo. Du tûusã, mura numi-ĩ hanayundú. Ma dahu čendu tûrri, mura du turonnu mannu yuguruudo yugó, gunna čado.

Sûgoi Ali Dôuki muro asuba ada (20. 21 yê Rajîmada yê) ma du kûnnu kuhu čenĩ totokinĩ, to koo di kôwuro turo tobuzo. Mura lôko lidĩ, asuba hunda yidadã gunna dî Dûgia čôhuri-ĩ hi yuduhaku, aya karahaa ha gûřčundu yigiido. Guru ni Lîbia a gûřčindi Njamina yigiido. Ôskoro Lîbia du yigiitã gunna tuda.

Tunda arbataš ndurã karaha ha su čĩ čudurtã, aũ a Dôuki de yunu abagadi, mine yogusu hidiyuo : « Yunu a muro nga koi di yibenduũ, wuna ni yibeyundu njendu ? » čĩ.

Odu anna-ã yuhati : « Tunda tũmoore aya yibendar čundu » yuhado.

Odu Dôuki karaha hunu yê arbataš yê yigiidu yuhadi : « Zaga yibenduma koo di turo yibendu tendu » čĩ.

Odu wô kôĩ a SETUBA čindĩ wasaga yenduru tũku, karaha-ã su čĩnaku čendu, taa dĩ Dũgia tũkudu čôhuri-ĩ hi čĩnaku wô Lĩbia čoŋgu tũri. Lĩbia tũkudã, subua ôguzuu kor tobusã, karahaa Toyotaa ŋgo dikundu wô du čĩkã gunna su arbataša yê Rayimada yê su čũdutu, karahaa murta tuzoo kora aya Njamina yigiido. Arbataš a aya karaha ha su bozã, Lĩbia mannu ŋgiri hunã a koo di tigiri. Lĩbia aũ čoŋu tũkã Alĩ Dôuki.

Odu asuba tada gunna yidadu wô kuha čendi. Gorsu-ã ka ôguzuu du tohĩ čĩ. Digel lau yê wô MB lau yê Béguinage lau yê. Ôrdi-ĩ kôe yuguriã tada mura. Digel lau ŋgo tani bui di tĩyi. Tani tudogurkã aũ gudi bui di čĩnawo.

Béguinage lau Mũsa Sũgi čĩ, Gendarmerie lau ni Bokoriĩ anna huna yida čĩ. Gudi-ĩ lau Printénia CNPS kôĩ to hi magaza Béguinage gu čĩ. Camp martyrs lau anna gôrde êreisuu-ã čũo. Anna ko turo-ã MB lau čũo. Ôrdi-ĩ yê mura

yê kôidi tûgi-ĩ kuhugo tohú ; mura ni ma du čûo ; ada ni dî di čûo. Kôï tûgi-ĩ kuhugo korã, mura kôï di tiri borsu čï. Ôbure yîsii gorsu togus.

Yum 10 juin, tunda ni dî di tîyo labar tadorú, F.A.N. yunu hunu gunna čabčunu, gorsu čuro di čubabîe yunu to koo yibeyi.

Tûgohu turo dî pamņgurčunu tedî Amsînene kôï Lîbiana-ã čîkã tigrî, anna dî di čîkã zabyoduro. Zabyihitudo di bu layindã gorsu-ã duna gyyunno, tunda yê yogoda čîkã yê hoktudundoo mannu arraņgurdó togus.

Gûkuni layinã suru yidanú. Wô Lîbia tigrî yogoda-ã ha yuha : « Dubabada yê asuba dûli di tendummoó, gorsu a kunu, kunu-ã suru yidanú » čï.

Odu Abdelkêbir asuba dunada yê dubabada yê čenu Gûkuni zabtu Njamina li. Lôko to ma Haya na kômo munduga-ã Hîsen čoobudo. Odu to koo di gorsu čuro di dunodo yogodi-ĩ du tûus. Lôko du liĩ, enou bozunnó di yunu gunna yohî, Allah čenu 15 *décembre* tohã gorsu-ã tus. Duna a yogodii-ĩ gali di liĩ, yîņgaldu numi-ĩ toņus. Gorsu-ã lanũwo, anna mîndie yohidî čûo. Čuro di gorsu-ã anna mundu tadorú. Wô MB lau anna gokî čîkã anna tuda.

Đgo gubudi Mahuma Sôtoi du čï. Muro lôko ŋuidunã, Kêbir Bôlu mi du čï. Lôko Kêbir ŋuidunã, Ramadan Toke

Salai mi kôî to di muro bui di bos, Béguinage lau Mûsa Sûgi anna huna yida du čî. 2 *chateaux* lau mannu tuda mîndie čûo. Gorsu-ã anna yohidî čîkã munduga-ã tuda ; anna guda yugondú. Gorsu-ã anna guruu tohudo yiŋgaldu, dûli di tohî yugó.

Gorsu-ã zaga ôbure yîsii tedã, wenege du toi yiŋgaldu.

GORSU HAYAA-Ã

Haya numi-ĩ makurdo di bu Yũgo četu tĩyikiidi muro yuhadiadu : « Gali numi-ĩ du ŝĩgitu, tani wô Lĩbia tidedu mŏgodaa-ã gunna yoburu tiri » čĩ.

Tani ni hi tuyuhadi : « Nuro bui labaraa-ã du njĩde di bu dĩ kŏmo ada Kĩrdimmi na ŝigiri genegaa yoob. Yunu tohĩ čĩĩ gunna waha yodur » čĩ.

Yũgo čuruu wô Lĩbia ted. Odu subua kor tohã, tani anna nura Hasan Wahali yê Sũleman Abakar su ni suag nur. Karaha Land-Rover taru dĩ Kĩrdĩĩ yê Yin yê gunna tigiri dugusa čũ tĩŝã, sũgoi zabtudu. Gurma tigiri dugusa čũ tĩŝu, sũgoi Kĩrdĩĩ anna taa čĩkã četu daha hoŋguru čũ kora tĩŝã, halaŋuru dĩ Yin tided. Yin ga mannu dugusa čũ kora tĩŝu, sũgoi zabtudundu kurukurã, Gurma tigirtu tũdugutu, tũyuku dohu sŏlli laŝaa-ã gunna neŋgurdo yugŏ. Tia ndura yũturi, saa talata bŏligii-ĩ tohudo. Tani tĩŝũ tidedi nuru, luuru ma dahu yer.

Tũgohu bŏligo tuguuru ma kannaar. Tunda labar tadorũ, tugukurã, Sũndoi a ŏskoro Hĩsenuu-ã Haya čubapĩe yĩsu čũku, tunda ma kandirĩ, durturi. Mura ni tuyudurti, nũkundu tiyendũ. Tunda lukurĩ Ômul tigirtã, Marda Abbasala muro bui di čĩ êrbedige hunu yeru ma kannaar. Ômul du kanurã, ma du Doctor Abakar yê Gũkuni Madŏ

yê karaha hundu yidadu ma du yugurkuda, Mardagaĩ yê Yîdi yê kôï di hoktudundã, tunda ma kandaar.

Numi-ĩ tigrĩ, tani dohu nejurdo yugonnãá yingaldu lobtududo ; yaabi-ĩ tigrĩ tîš. Kunu enou tîšido yugonnó di odo dîgiši nur turo Ahmadai li, dîhi či. Uũ nurã wûne sauyindi či. Tani hinar : « Dga lau sauyindi nar ? »

Odi-ĩ yuhadiadu « Lau sauyindĩ munurú, čïidi wûne sauyindi » či.

Odu tani yê Sûleman yê Hasan Wahali yê yiga tugurkuru, karaha ndur kônduru ôro Balaine tigirtu su kônduru šiĩ nakiri nduru tigirtã, Hasan Merdege wô čakirčinî či. Muro hidiyuo : « Ndû yunu čïĩ, wûne sauyindi, ôro su kônurã mannu yunu durrudo yugonnãá » či.

Tani hadiriadu : « Tunda dugusa ada gunna numi-ĩ du tugondú. Ndû numi-ĩ du êski togusu » nar.

Muro yuhadiadu : « Anna guru Ôu číkã yê anna Bîrigada-ã guru yê miškile yidao. Mura tada gunnoó, yunu gudi êski tohudo yugó » či.

Odu sũgoi zabtudundu tigirtu tîšo. Kunu tîšã odi-ĩ ôwonni tedĩ li, yuhadi : « Dîhi wûne-ã nerkaa sauyindi » či.

Sûgoi karaha ndurã kônduru ôro lukurî matar-ã tigiro. Matar-ã du Mûsa Sûgi yê aũ yogoda-ã bui yê çûku hoktudo.

Tani mura ha hinar : « Wûne sauyindi čindĩ, ndũ yunu čĩ, čôhuri-ĩ yerči bĩ layunno yugonnũú ? » nar.

« Dgo tũgohu gunna čôhuri-ĩ yerčunu kũriyunu bĩ layini. Mbo tũgohu mannu čôhuri-ĩ yerčunu kũriyi li čĩidi, yunu čudurudo yugó » čuo.

Tani hadiriadu : « Tani mannu mbo bôligo Kĩrdĩ lau tiri čĩidi, tiri-ĩ hi yunu durrudo yugó » nar.

Odu tia ndura tada yũturi tĩyikiidi, Gũkuni li yuhadi : « Kumandu kôĩ a di karahaa čĩkã yihitu, ôrdi-ĩ numi-ĩ du tũusudo » čĩ.

Sũleman ni karaha Land-Rover-ã yida čuruk. Tani ni karahaa kolokolonuru, guru ni su batêrie čĩ, guru ni nekele-ã su čĩ, batêrie yidanú. To koo di karaha Toyota turo makuru bu tugurkuru, kôĩ čôhuri-ĩ čĩ kaa artasa-ã čũ. Sôndugo murdom kora su yũturi tĩyikiidi,

Hasan Wahali yuhadi : « Dĩhi lanu, wũne ma kegirčindĩ čũ, 23 mm tunda ha kuhu tiyendĩ čĩ » čĩ.

Tani hadiriadu : « Anna tundaa gunnũú » nar.

Hasan Wahali yuhadi : « Dî dahu čenu yihidî yugó ; ma tûruzi di kegirčinî čî » čî.

Odu tunda artasa gundirî tîyikã mannu hûturu, tûruzi di ma Taimaņa dahu yenduru lukar.

Mbo Yûgo Lîbia tedu yina yoburu tiri činĩ gubudi, yunu gunna alamņunu, kômo ada guru ŋgo anna čatã du anna čûuņ. Kôî a Wordugu Šide morčinã, *groupement nr.2* du Allači Yîrei hi bui di činak. *Groupement nr.4* kôî Îdiris Adil morčinã Marda Abbasala ha bui di činak. Kômo tada gunna nozomņji čûdu. To di bu tunda kôî Taimaņa ma lukurã, kunu tuduzo ; taa dubaba-ã matar-ã du ma yuguruu asuba kuhu tiyo.

Anna-ã du Gûkuni mannu du teido. Tunda ôwonni kuba zôde, aũ asubu yidado yugó. Ma lukuru togi-ĩ Gûro tigiuro. Wenege du anna guru dohu Gûro tigiuro. Kôî ma lukurĩ tôlhun-ã tadar ; Gûkuni, yogoda-ã četu nûki. Yogoda-ã kôî Gûkuni ŋgullahado hanayundã, yogodi-ĩ čôhure yeidu wô Haya gunna kûnnu asuba hiye. Allači Yîrei na anna Wûri čîkã, dubabada-ã ma numi-ĩ tûusĩ čuduro. Taa Allači wô to di čaktugunu, êĩ a Maô tûruzi-ĩ hi anna ada Hîsenuu-ã ha, mura duru yidadunnó di kôî di yugopu četu gokî saa arbaa dûnogii-ĩ togus.

Anur Kôsoi mi na čarku yugurka tôlhuno yidadu, yohidî Allahîi na ha hakuo. Yuhatiadu : « Tunda numi-ĩ du lukurdo aũ čide yugó, nura mannu yûsurru » čuo.

Odu Allači na ma zabtundu komboĩ hundã tigirtu yunu hundu yusopudo yugó. Karaha tennãá mannu gûrcundu čonĝu ma Wañaņa dahu čeo. Ma tugurkã togi-ĩ anna ma číkã četu hoktuo.

Ôskoro F.A.N. ga numi-ĩ tûusã ha yogodi-ĩ haraga čennó yugó. Dohu yê dûski yê gunna čôhure du wô zûbčini. To koo di lau ma du ôskoro bîe kedugu, ôwonni čôhuri bui Yûšin yida dubabada tûdušu kora anna huna du číkã ha wô yuduhaa če.

Odu anna ndurã Haya du yiga čuruku tigirtu bozo. Kôi to hi čûku, dugusa murdom yîšã, ôskoro yogodi-ĩ kedugunã yê anna ndurã yê čačabtundu wô ŋôdurtuguo. Wô čaktugundã, gorsu bui mannu yohududo yugonnó di F.A.N. su bokundu numi-ĩ du yoduro. Tani hi ma Gûro a tuyunaku, garru nani Lîbia du anja-ã lidoo dî kegurru tuyuo.

Odu Haya toburrã, dî tigiri. Anna ko turo-ã Ebeše tigirtu, sũgoi zabyihidu, Bîltin tigirtu, ôwonni zabyihidu, anna ndurã ha bokindî sũgoi Kalai tigi. Tunda maši ndur tubasã, Okiĩ Dagaš yugó ; laya-ã tohudo, anna hunã ha čabčunu wura čenu galayunu yuhadiadu : « Dogu ndûrrú.

Čirri a Arada lau ndûrrú bî landũwo zabsundu, dogu ndûrrú. Numi-ĩ du njũku tani Gũro tidedu tiri čunu, to koo di Okiĩ Dagaš čuruu Gũro tedo. »

Odu kôĩ to di anna ada guda číkã, maši hundu nũ tunda tubasã, bu Arada tigirtu kôĩ to di čikiidi, Bĩltin du aũ tigiri mura ha yuha : « Ôskoro F.A.N. ga Bĩltin numi-ĩ yusopu čarku tũri » čĩ.

Odu anna ndurã Bĩltin numi-ĩ bũgi tigirtu du bozo. Du dugusa yĩšã, sũgoi Ebeše číkã mannu čaro čundu yuhado. Sũgoi anna ndurã Ebeše tigirtu du bozo. Odu bui hundã Okiĩ Dagaš ni yugó ; kôĩ to čaba yohidĩ, labar yidadunnó di ôskoro F.A.N. ga tigirtu čubabo.

Odu anna ndurã ha tar-yihitu, čarku Bĩltin tigiuro. Bĩltin ga mannu gokĩ, sũgoi ma Kalai leo. Anna ndurã mbia yê artasa yê mannu yidadú. Toi yĩngaldu čidaka du haki gorsu yohududo yugó. To koo di Ebeše na Bĩltin na haki tudadunnó togus. Ôwonnĩ ko bui hundã kinnú tũrrã yĩngaldu yunu gunna zonji.

Odu anna Haya číkã mannu Yũgo tedĩ li. Ebeše ni toburdo. Anna munduga-ã čatudo. Haya du anna číkã mannu gunna yiga lukuru Šiša tigirtu tobuzo. Šiša du ôbure guru kora tĩšã sũgoi numi-ĩ tigirtu du tobuzo.

SAGAHUNU YOGODI-Ĩ HAYA ZODUÃ

Numi-ĩ du sũgoi kunu, kunu du yogodi-ĩ ngo Haya wô gũu du zoduã koo di tiri a Zuaruu-ã lau mannu li du tũus. Numi-ĩ tunda dakurdo yê dakurdó yê gunna yogodi-ĩ numi-ĩ gũu du zod. Tôuhi hi ni su ôskoro čũdu, Haya du ni ôskoro bozo. To koo di yogodi-ĩ numi-ĩ duna du bos.

Sagahunu 1984 tohudo, tani hi anna buya ada ôskoroo-ã turo tuyoho. Odu Haya du tũyo, kôĩ lukurĩe yugó. Sũgoi wô Lĩbia lukar. Lĩbia lukuri, tiridi, kôĩ gorsu tohudo yugonnó di 1985-1986 tada tohidĩ, wô Lĩbia lau tũyi. Sôura-ã mannu lanũwo, ngo gibi-ĩ koo gunú, sũgoi yida.

Aŋgaldu numi-ĩ gunna yogodi-ĩ yida. Haya du ŋgiri, walla yiga luĩe gunna turkanu ndurã tosu togus. Odu tani wô Lĩbia tigiri tobus. 1985 čoŋu 1986 ŋgiringĩ, Lĩbia du tũyi ; kôĩ yiga luurdo yugó. Bu Hada du miškile togus. Gũkuni odu layinã, yogodi-ĩ yunu gudi yidado kor du hanayi. Mède huna guru *Radio France* du yuha. Aũ guru wenege du bazudo togusi.

Gũkuni êredie-ã du yuhadi : « Anna nura sôura-ã du njĩkã, yunu kohudumma gunna Hĩsen četu yibesundu » čĩ.

Gũkuni yuhadiadu : « To hadurã yĩŋgaldu yogodi-ĩ, tũlhun nurã mannu yugopi yandu yidadu » čĩ.

Yuhadĩ muro koo di tólhun hunã yugobo. Odu tólhun Gûkunii-ĩ yugopã, zaga četu nûngurie yugonnãá, tani yuso ma Tripoli tigiri gali yê zondu yê yunu yohî čĩĩ waha torar, haki Lĩbia du čurui walla čuruunú, yina tada gunna dahu taŋu du tuduŋosu yuso tigiri waha torar nuru to koo di Sebehe a yernuru ma Tripoli tided.

Ma kĩši-ĩ mannu tosu. Sĩdi Sunoriĩ, Sĩdi Ahumad, muro karaha bui anja gudii yida. Subua du čũ du ma Tripoli tedu zabtini. Odu muro hi haduru : « Ma ndedĩe tohoo, toŋu yusu » nar.

Sĩdi yuhadiadu : « Gali » čĩ.

Yum turo tuyuhadi : « Togo tidediadu tĩyi, tũgohu du tiri noŋuru lukuri » čĩ.

Odu togi-ĩ Sĩdi Sunoriĩ li četu ma dahu yendar. Ma tugurkuru lukurĩ Burak Šoti di ma tugurkurã, Sĩdi yuhadi : « Nũ dugusa čũ kora du Šuha ha mannu aya kũrturu sobar ; ôro Tũ tediadu čũwo ni munurú, nuro labar taũ ni ? » tiyi

Tani hadiriadu : « Labar tarú » nar.

Odu tiri-ĩ hi tĩšu tũgohu Tripoli tigiuro. Taa tani tũruzi di yaabi Gûkunii-ĩ tidedĩ tigiurĩ čĩ lahanaar.

Muro hidiyi : « Ŋgadi yerruũ ? » čĩ

Tani hadiriadu : « Dî Sebehe du tiri » nar.

Gûkuni yuhadi : « Šuha ha aya wašinuru, dî ŋgiroo, anna buya čikã gunna yoob yusu nuru hadurã, muro yê hokndundudo yugonnũú » či.

Tani hadiriadu : « Šuha dî čide kor du mannu nû ma kurrudo di bu Sîdi Sunoriĩ tuyuha nar. Muro hi mannu Sîdi Sunoriĩ dî čoŋu tedo, nû ma tiridĩ, Sîdi tuyuha » nar.

Gûkuni yuhadi : « Haŋîe koo ŋga četu nûŋgu, nura anna buya-ã četu ôro ndûrroo gali » či.

Odu dí Alí Šegeĩ na ha baranirî, haŋurdo yugó. Taa kôĩ to Ahumadiĩ Hîsenuu-ã du mannu baranirî haŋurú. To koo kohirî dugusa čũ tîš. Odu yum turo yuso tigrĩ Gûkuni hi čûsudu nar nirîe tigrĩ, dûski saa wahid ille ruba, yaabi-ĩ ko-ĩ tigrĩ Gûkuni na yiga yugurka hoktudo. Karahaa anna kabtia-ã tusu čûo.

Sôdik Fodul su hinuru : « Dga di ndûrri njûku ? » nar.

Mura yuhati : « Gidehi, aũ kegirči Gûkuni hi čudurîe barayunno, nû lukurî tîyo » čuo.

Odu Gûkuni to koo di karaha kôči čuruk. Yaabi-ĩ du anna murta tuzoo kora čûo ; tigrĩ anna-ã du tobus.

GORSU WAÑAÑAA-Ã 1983

Lôko ôskoro F.A.N. ga Wañaña du čikiidi čarku Haya tûrrã, Njamina du ôskoro dûbo čû kora čačabčuo. Lôko to Îdiris Dêbi ôskoro-ã bui hundu, ma Wañaña ndubabia keyuo. Kôï to di anna buya hunda čîkã du aũ bozudo yugó ; gunna ma gorsu-ã keyuo.

Wañaña du gorsu bui yoho. Lôko Wañaña nerkayindã toorkudu ka čû toho. Ko turo-ã Wañaña lau ônu du tigiro ; ko turo-ã ni kombommi tûruzi di tigiro ; duna hundu bui-ĩ gunna Wañaña tûruzi di tigiri. Lau to di yawo mannu hodi-ĩ du ndoburîe gunnoó tiri gudi yugó. Yunu to hanayindi, toi yingaldu lau a di tigiro.

Ôskoro lau a di tigirtã Ahuma Dongolo, ndiri Ahuma Abdurosul to hi bui hundu. Kôï to hi gorsu tûgohu yohudã, yohidî allahar kor tohã, mura ha kûriyundu čoobo. Anna ada wô ônu lau čîkã, *groupement nr.3* gali di kôï to di gowo. Mura du *groupement nr.1* Wañañaa-ã, anna hundã labar yidadunnó di mbo gorsu-ã tohĩ gubudi Gûro tûrra, tigirtĩ korã, anna *groupement nr.3* ada gokî čikiidi kûriyundu yuhudi čoopu, du artasa-ã zugoyindã, mbo koo gunú kunu hôšiyuo.

Odu kôï to hi gokî, buya hundã munduga-ã čado. Buya hunda ngullahada-ã mundu gunú. Bui hundã Îdiris Dêbi tigiriĩ, kômma waltudo kordu hanayinã, wenege du sũgoi

zabtu, čuruu čaa ted. To koo di anna ndurã numi-ĩ gunna bôli yohudu dugusa čû yîsido, togi-ĩ tunda tigi-ro.

Tigirtã, daŋaida yê asuba hunda čoopã yê gunna čabčundu yidadu tigi-ro. Tani *Responsable bureau 2* anna daŋaida-ã yogutu nuru yogutã, asab hundã anna dûbu yê murta hoo yê du su čûo. Anna-ã ndurã guru, anna čarku tûrrã ha huzayundu guru kora ha čoopu yigiido, čîidi sogodda-ã asamburdo yugonnó di gubudda-ã mura dûbu yê murta hoo yê yina guru yê tohudo.

To koo di anna ndurã goku, F.A.N. su wôzor yoduro. To di bu tunda Sebehe lukuru, gorsu a Hayaa-ã du tûduuso. (Kô-i a mbo tihinedu haki hadurdo yugó.)

SAGAHUNU GŪKUNI HI TRIPOLI A DUYINDĀ : 1986

Lôko Gûkuni na karaha-ã su kôčindi čûku tigrĩ, saa lanurã wahid ille ruba tohudo. Mura ni čuruwo, tani ni yaabi-ĩ du tûduus. Kôĩ to hi Sôdik Fodul durru hinurã yuhadiadu : « Gûkuni yê Gidehi četu asaga yidao ; to koo lukurĩ tĩyo » čĩ.

Odu tani du tigrĩ anna čĩkã ha lahanuru tobus. Kunu čĩĩ, anna guru yiga čurukĩe tohã, ôskoro yogoda ko-ĩ hi čĩkã yuhati : « Gûkuni yê Gidehi četu čabu yidao ; tedu ligĩ korã aũ yiga čurũú » čuo.

Odu kunu tobusã, anna yigannu čûku du lidiã ha mannu du ndûusi čuado. Gûkuni yugó du ndûusú čindi. To koo di tĩyo, aũ yiga čĩde ni čendu du lenú, du čĩde ni čendu yiga čurũú. To koo di tĩyuku, Gûkuni dohu saa ašura ligi ndiri, lennó di saa ahadašir tohã, tunda neŋgar. Saa atunašur dohuu-ã tohã, Yĩbirin Nũbar ndirĩ, anna tundaã turo tedĩ liĩ yuhadiadu : « Nura ha ôskoro-ã kũrinjundu njidao. Numi-ĩ du yunu yuhati čĩkã, Gûkuni, anna guru hu bũnno čenu, numi-ĩ du miškile yibeyindiadu čũo čundu yuhatudo. Tunda ni aũ bũnnu yidado yugó nduru haturdo » čĩ.

Mura yuhati : « Anna-ã yopuru lukuru yigannu kôĩ turoa yũturi čundu yuhatudo. To koo di mura yigannu čũo » čĩ.

Nû nura yaabi-ĩ sopê barayindi. Ôwonna yogoda-ã yuhati : « Ćurukunnoó yaabi-ĩ mortier du bapiri yunu to koo ĉindĩ ĉûo » ĉi.

Tunda du ni aũ asubu yidado yugó. Gorsu ni aũ orro di yidado yugó. Odu tunda gunna yiga tugurkar. Môtobuso ĉû yigiita tusu ĉûo. Tugurkurĩ layindi asubu tammoó yunu hiyindê yugó. Kôĩ yiga lukurĩ, Mahuma Gulai mbo êredie kînniĩ šĩ ĉinaê ĉide hos hunã du yida. To koo di yiga lukar.

Tuyoopu ôro Bûsilim, komboĩ 28 *août* ĉindĩ du tûyuunjo. Kôĩ du tûyuunĝã, kôĩ ŋgo anna ĉitê ni munurú, kôbuso na anna salkada na du ĉûo. Odu ka-ã lanjindi du tûyuunĝi, ka hoo lanjindã, êski di kollo turo du tertiyundu tûyuunjo. Yaabi turo ko hunã lanjundu, tunda anna murdom kora du tûyuunjo. Dogusu boyaa ndura yigiitu tiyendu šĩšu ĉuo.

Odu tani kûdi njorru turo ĉi su boyo nurã hornuru tiš. Bî-ĩ dumosu hôwuluu šahar wahadašir-ã tohudo. Tišu tûgohu tohã, kûdi nurã su tišu tîyiidi, ĉirri-ĩ hi lûli ĉi duraar. Lûli-ĩ du lanurã, lau to bu du Yûsuf Šuha yaabi tunda tîyikã ndabĉi ĉi du ĉi duraar. Mbo Yûsuf muro yê Sûnusi Foki yê Yîdi Salai yê Mahuma Lôni yê tada Gûkuni ĉetu tûrra, mura mannu daŋammi lau to di ĉûo.

Odu tani Kêlleĩ hi hadariadu : « Yûsuf Šuha ma kôĩ a di ĉi » nar.

Kêllel yuhadi : « Ndu koo nuũ ? » čí

Tani hadiriadu : « Yûsuf Šuha ma kôl a di čl » nar.

Kêllel tedl li, lûlimmi du labara Gûkunia-ã hiyinã, Yûsuf yuhadi : « Tunda yê Gûkuni yê saa arbaa tiyigineso, sũgoi labara huna tadorú » čl.

Odu nura wunana njũku nduru hindurã, mura tuzoo čũku čera hundã tuyuhado.

Tunda hatiriadu : « Tunda ha mannu dogusu aya tiyiigido, zaga tiyigitã hanandurú » ndar.

Kôl to daŋai dunodo, ŋgo du anna šiešaa-ã du čũuŋgu čiti, kôl to koo. Yum to kohidirĩ êluã, du tĩšu sũbud-ã saa wahid ille ruba tohudo ; êredie ndur kinnimmi landuru tadiriidĩ, Gûkuni ŋuide, anna četu tũrrã ni aũ turo nohudo, to koo di tubazo. Labtan Gûkuni du čl ni tubazo.

Tũgohu tohoo, yogoda-ã yuũ lĩtiruu-ã tiyendi. Yuũ ndurã yaduroo, kôrtun-ã harnduru, hornduru njorčunoo, êrbedige kohuduru su arbinduru, yunu čl gunna lûli-ĩ du anna ma člkã ha yenduru karayindi. Mura karayindoo, lau gudi-ĩ yaaba šiša tuzoo anna ndura du čũo. Anna tada mura annagayundu yina tohuda-ã du yuhati.

Daŋammi du tĩyo člidi, anna to di člkã yê a di člkã yê êrbedige-ã kenduru karayundu, taa mura turo annagayunu

anna lau to di čikã ha yuhadi. Tada mannu lau to di êrbedige arbiyundu anna guda čikã ha turo, turo du yunu gunna yuhati.

To koo kohidirî dugusa murta tuzoo soũ turo kor tobusã, to di bu yum turo dûnogi sôlli maarsuu-ã kanjinno, ŋgo didi kôï du tîyikã ko hunã lanjundudo yugó. Maša-ã mannu lûliĩ kînniĩ čï, lûliĩ to di du tiyendi. Odu maarsu sôllinduru tia ndura yûtiri tîyikiidi, ko-ĩ landu. Ko-ĩ landunã, tunda anna hoo čera ndurã lûdiyuo. Gubudi muro čer taŋã lûyi.

« Ramadan Barkai ndoo ? » čï.

« Aya tîyi » nar.

« Kuruk » čï. Sûgoi Sûnusi Fok yê Yîdi Salai yê Yûsuf Šuha yê Êyi Ardigi yê lûyi.

Lôko lûdiyindã : « Yalla ômurugu » čï.

« Tunda ŋga di lukuri ? » ndurã, yogoda-ã yuhati : « Atlau barra, atlau barra » čuo.

Yaabi Yîdi na čikã muro hanayunú, tunda tigirtu wasaga yendar. Odu tunda ha toyoopu tûrru, bûro hundã tigirtã, Mahuma Kulliĩ čï četu hoktudo.

Mahuma Kulliĩ tuyuhadi : « Gûkuni baranjundudo, muro ni wosu labtan-ã du čï. Nû kôï hunã noopuru lukuri » čï.

Tunda « Yoo budi gali » ndar.

Mahuma Kulliĩ yuhadi : « Gûkuni ayî hunã morĉinã, bazudo yugó, ŋgiridoo, kubo turndu nani yuhatu yendu » ĉi.

Odu tuyoopu labtan-ã tûri.

Labtan-ã tigirtu Gûkuni hi lahanduru, daŋammi du zaga tîyikã gunna haturu yendar.

Gûkuni muro yogoda-ã ha yuhadu : « Anna nura murta tuzoo sã hoo daha hosĉundú. Kôĩ ĉûku labar hundu tarú. Yitũwo mannu hananurdãã maša nduã tendũú ĉunu, maša wayunno. »

To koo di ĉi tunda tigirtã haturu yendar. Anna tunda ĉetu tuyoopã gunna ŋgullahada, dûli di dahu torkuru yendar. Ayî hunã morĉinã ni haturu yendar.

Gûkuni tuyuhado : « Dî hûndug-ã yûsurru, dugusa ôguzuu kora wowu yida, sũgoi lûnundururu kôĩ kenindiri. Odu tuyoopu tûrru hûndug Lîbia du tûyududo. »

Hûndug-ã du dugusa ĉû kora tîšã, Ašek Îbni Umar, ŋgo muro su *Président Union* GUNT gu ĉundu ĉinakudo. Tunda ha tólhun tiyendu nudurtirîe daaru ĉi. Taa tunda kôĩ ĉiĩ tigirtu hoktudundã, mêde huna mundu tuyuhado.

Ašek Îbni Umar yuhadi : « Tani *Président Union GUNT* gu baranurdo yugó či. Yunu a Lîbiana-ã môore yohudã gunnoó, tani baranurdo yugó ; nura mannu dahu makũwo gali či, yogoda-ã yunu hundu tunjosudu yohudã mura hanayindi » či.

Mêde hunã tuyuhatu tuzuã, tunda ma hûndug ndurã zabtudo. Dugusa hoo kora tîšã, Gûkuni baradiyundu tigiuro.

Gûkuni yuhadi : « Lûnundurã, kôî kenindirîe du lûnundar. Kôî kenindirî, Wûr lau, yogoda ôskoro kômãdo, karahaa hundã, anna-ã čooa ; nû nura ôro šigirtu ! Nani yuhatu : Tunda yê yogoda-ã yê enou du hooduda, anna-ã ha yûhutoo gali. Gudi hunã, yogodi-ĩ duna du yoburi čunoo arrakundú. To kugiĩ, anna hoo yingaldu numi-ĩ du miškile tohîe suru yidanú. Anna hunã ha yûhutu čeo. Gudi hunã numi-ĩ du sugandu Zaga yunu a tohã gunna anna-ã ha yuhatu dahu yongu yendu či. Yogodi-ĩ, tobuzú anna-ã ha yidiri čunno tûrtu tohoo, anna-ã yunu yohidĩ môore hanayindi. Tani yunu taru hadirîe yugó či. Čĩidi anna hunã ha hakundu čendîe koo čendoo gali. Yunu a yingaldu kenindirî tîyi » či.

Odu Gûkuni mêde hunã tuyuhatu četu nendar.

Tunda lukuri nduru haturã, Gûkuni yuhadi : « Agude tohoo, ôwonni nudurturi ; Môsoud mannu njudurti ; mêde huna yidaã njuhati ; to di bu ndûrri » či.

Dugusa čû kora tîšã, Môsoud bûro hundu labaraa-ã du lûduyundu tigiro : « Nura kôî ndûrri njûo. Gûkuni kôî kenjudoo mannu, wûdur Gidehii di ndûrri njûo » čî.

Ŋgo gibi di Gidehi FROLINAT ha zaga duna čenî čîî yê, zaga Njamina Gûkuni hi čoŋu čenã yê, sûgoi Hurãs tigiri, yogoda-ã ha boki yihidã, yunu to gunna yuha.

Môsoud yuhadi : « Gûkuni hi tunda turkundirî tîyo, čîidi Gûkuni tunda ha a koo tuyoho čî. Nû, tani ni gunú, Gûkuni ni gunú, Gidehi kôî kenjindî čûo. Daŋammi di njûkã mannu Gidehi baranjundu njihitu. Tû wûdur ga kenjindî čî. Nû Tû ŋgiridoo, anna tuda-ã ha mêdi a Gidehi yuhado ndu yuhatu » čî.

«Tû muro busau Lîbiaa guru, tani sagahunu 1973 Tû hu busau nur maarîe bôdinuru kohirî nû togus » čî. « Gorsu ni budi togus, anna nura ni budi čado ; asar bui duraar. Tani Tû gunna baranirî tîyi, Oozu turonnu ma kolloï a di čîî wûdur tarú » čî. « Tû gunna baranirî tîyi. Tuda-ã ha yuhatu, aũ mbo mannu busamma Lîbiaa tobuzi čunoo, bûnnu hunã yida bos » čî. « Aũ bozunnó tûrtu tohoo, bûnnu hunã čoŋu kôî Hîsen čîî ted » čî.

« Tada gunna gunú, tani hi go neri čunoo, a di bu tani yunu sûgoi naarîe yugó. Asubu nur tarã gunna gunuru yerniri ; Tû gunna ha dîî kohuru soburi ; sûgoi yunu kizanirîe yugó. A di bu ôskorie du gunnoó yunu gudi yibe walla kiñari

walla tardo yugó. Ôskorie du borsu maari či. Wûdur ndûrri njîkã ni a muro » či.

« Mêdi-ĩ anna-ã basudo tûrtu tohoo, aũ gorsu-ã suru yidanú, tobuzi čunoo, to muro » či. « Aũ tobuzú toi gorsu kohiri čunoo to muro. Aũ dí Hîsenuu-ã tidedi čunoo ni Hîsen hunaã ted. A tûrtu, busau Tûu-ã ôskorie du makiri » či. Mêde huna tada gunna tuyuhado.

Tani Môsoud su hûruũ kînniĩ yeru hadiriadu : « Yire du Tû a di gubudi šimasa budi čuduru. Sagahunu 1700, na 1800 na 1600 na Tû gorsu du čuruudo yugó. Yuburda ni četu gowo, yogoda ni četu gowo, nahara ni četu gowo, ôskoro Čadiana-ã četu gowo, ôskoro Hîsenuu-ã ni četu gowo. Ada gunna kôwuro hundã dûli di dahu du tarú čîidi, tuda-ã yum turonnu mannu yusopu aũ gudi hi čendu du bozudo yugó » nar.

« Nû tunda mbo hanandurú, yibe či ôro lukuru anna ndua tudasuda yûhutie, anna-ã ha gorsu du waturu, ŋgo gibi-ĩ koo di bosie yunu to koo orro di taturã gunnoó, yunu turo ya yammoó ndoori, ôskorie du yibenie yunu to koo tammo tûrtu tohoo, adibi guru hu êrbedige-ã yenduru ôro tûku tuda-ã ha ye nduroo, to mannu gunna turonnu » nar. « Čîidi mêdi numa gunna tubazo » nar.

Môsoud muro yuhadi : « Mêdi a hatirî tîyikã, tuda-ã mugayindie yê mugayundunnó yê tani mannu dahu nurã

du yunu čĩĩ hananiri. A mēdi Gidehii, muro yuhadã gunnoó, tani Môsoud hadurdo gunú. Gidehi muro yuhado. Yunu yida čĩĩ a muro, nura ôro Tû šigirtu mēdi hunã yuhatu » čĩ.

« Tunda halas budi gali » ndar.

To koo di Môsoud četu nendar. Gûkuni ni, hanayunú, wûdur hunu du lukurĩe ŋadu čudurĩ čĩ.

Kôĩ lukurĩ, aũ morčĩnã Ôyi Ardigi yuhadi : « Kayuã nurã, yaabi a Gûkunii-ĩ du čũo ; aũ tendu tidedu yoburu zabtidini » čĩ.

Taa aũ čendu četu yaabi a Gûkunii-ĩ tigiro. Gûkuni tubapudo di baddu, adimmi kôĩ Gûkuni čĩĩ tigrĩĩ gunnoó, aũ yigannu tigrĩ četu hoktundu, mēdi yuhado yugó.

Odu Ôyi Ardigi tigrĩ yina ada Môsoud tuyuhatã, adimmi hi yuhadu : « Ngiroo Gûkuni hi yuha » čĩ. « Tunda ha wûdur a tûrtu Môsoud kediyindĩ čũo. Yina nuro hadũwã mēdi čindĩ yugondú. Yunu a tûrtu njundu yuhatĩ čũo » čĩ.

Odu aũ morčĩnã kayuã hunã čoobu, adimmi hi galayunu Gûkuni hi yuha čĩ.

Gûkuni hôkor hunu du, yina muro yuhadã yohidĩe to koo di čuduri. Čĩidi yogodi-ĩ yunu gudi dahu du yidado kordu adimmi yuhado di bu Gûkuni dahu hunã mēde če.

Taa tunda ha čôhuri hi tûyudutu Sebehe kediyuo. Sebehe du mannu dugusa tuzoo kora tîšo. Tunda kôî Sebehe tigirtî, yogodi-î ôskoro huna keyunno, Zuar lau du tûsudo. Bordo lau ni gokî čûo čindi ; gorsu hundã du yunu gudi labar tadorú, čîidi Bordo lau gokî čûo. Zuar ni du tûsudo yunu to koo čindî čûo.

Tunda ha tuyuhatu : « Matar-ã noopuru lukuru Taanuã čaknihitiri, Oozu ŋgiridu taa karahaa ha Bordo kenjindi » čuo.

Sebehe a matar-ã ha Mahuma Kulliĩ četu tobusu tîyikiidi, Bîrahim Nêyib ndirî li.

Ôyi Ardigi yuhadi : « Ada yina ndua ôskoria tani haŋuru tidedú ; nura anna kuna-ã yûsurru » čî.

Tunda hatiriadu : « Budi gali, nuro aũ aŋgaldi-î sobus ; tunda anna kuna-ã lukuroo ni kal nduru, muro hi sopar. »

Tobusu tîyikiidi, tôlhun ču, Bîrahim Nêyib tôlhun-ã kab čoŋã, « Ma sîmit tubazudo yugó » čî.

To činã yerči. Mêdi to yuhadu, yerčinã, tani kunu oor nurã wayi. Yunu tubazudo yugó čîidi, kunu dahu tigirenú. Odu Mahuma Kulliĩ hi hinar : « Obudo numa mi-î yunu bazuã ndû ? » nar.

Mahuma Kulliĩ yuhadiadu : « Munurú » čî.

Kunu tobusã, Mahuma Kulliĩ muro mannu yiga čuruu, dġgige murdom kora bozuã, sũgoi zabtu li tuyuhadi : « Yunu mbo Bġrahim ma sġmit činĩ, Zuar toburrã mazun čunu, aũ turo muro hi tũlhun če. Muro yunu tubazudo yugó činĩ to muro » či.

Anna guda lau nurã Yġdi Salai na Sũnusi Fok na mannu basú. Odu dġgig kor tobusã, halas čũhuri-ĩ wati čuo. Čũhuri Yũšen du tedã gunna hudura borsu. Taanuã a yuduhaku, čũhure guda ha bũroyindu, guru ni Ôgi čoobu tũrrie, guru ni Wadi Dũm čoobu tũrrie, guru ni Haya čoobu tũrrie.

Taanuã kôî čaŋgurã Rîfi tedî li tuyoopu bûro hunã tiyiigido. Lau dî Ôgi na Haya na Tû kômo yogoda-ã čîkã gunna muro bui.

Muro tuyuhati : « Dugusa guru tuda-ã yê tunda yê šiša du gorsu kohudar. Zuar ni nû makar kubo nduruu togus. Bordo lau ni môtia yida kuha tiyendi, tunda ni kuha yendirî tîyo čîidi, wenege du kôî to nerko ho Bordo mannu toburriê toguso » čî. « Bordo ni toburri, Zuar ni makurdo miškile ndûi mannu yugó, čîidi Oozu šigirtu nani taa kôî ndûrrî kombu landu » čî.

Odu čôhuri Êliko tiyendu Oozu čaŋgar.

(Oozu muro numo diziba nurã du tobusuda, čîidi sagahunu 1967 du bu tigirido yugó. 1967 Bordo a karaha Allemand tedî čî durru su kônuru Oozu tided hananiri. Taa Oozu a bûgudi abba nurã mannu čî ; ba nura guda mannu čûo. Oozu du dugusa čû kora tîšo.)

Odu čûkŋguru landurã Bordo ni toburdo kor du hanandiri.

Yogoda-ã yuhati : « Ma Yibi lau ndûrru, anna taa čîkã ha durtũwo gali » čuo.

Yogoda-ã kedyindĩ mannu, tunda tigirtu anna-ã ha haturu, numi-ĩ muro busau Lîbia a, Tû gunna ni busau Lîbia a, nû nura kûdikude mûkũú, sobusu ndirîe barayindi. To koo di

kedyindî čûo. Tunda kûši-ĩ ler ndur mannu gunú, čĩdi, yuso tigirtu yina ada tohidî číkã yê Lĩbia du tohudã yê anna-ã ha haturu yendar nduru, to koo di karahaa čû tiyendu ma Yibi dahu yendar.

SAGAHUNU OOZU YARA DU TIGIRTU YIBI LUKURĀ : 1986

Taa hadirĩ koo di Taanuã a Êliko tiyendu Oozu tigi-ro. Oozu numo nur dizibaa, kogodee, 1967 nahar Allemand turo čet-u tigi-ro, to di bu Oozu tigi-rido yugó. Wenege du sagahuna dġidem tohi. Oozu a bġgudi abba nurã ni ċĩ ; dizibi nuraã duga huna mannu mundu ċũo ; ba nura tada ha mannu kũmo ċĩkã tigi-ri lahanaar.

Sagahunu 1975 Gidehi ada karayindiã ha ċabċunã hiyi : « Lũko huturol ndurã tuzoo, kũi togo yidado tunda ha orrodiyindĩ nogor ċunu, ada-ã ha hiyinã, ada-ã hanayundũ. »

Gidehi yuhadi : « Tũ a gunna tunda makuroo, togo ndur ni tuduhuki » ċi.

Tani yunu a Gidehi ŋgo sagahunu 1975 yuhadã, yunu to tohĩ ċĩde gunnuũ nuru tuduŋos. Odu karahaa ċũ tiyendu yuhati : « Kũmo guda-ã du gorsu ċĩ, nũ ma Yibi yũsurru » tuyuo.

Taa tunda tuzoo, Mahuma Kulliĩ čet-u hoo, ma Yibi lukar. Karaha turo-ã tani tar Šġrhedine Orou mi hi suag nur. Ma lukurĩ Őmuši tigi-rtã, yogoda-ã buya hundã taa ċũo. Bĩ lada hundã ni ma gubudi ċũo.

Yogoda-ã yuhati : « Anna ada ha yihitu yûhutu zabsundu »
ćuo.

Sûnusi Fok yuhadiadu : « Tani tobuži ; nura anna ada ćetu
yûsurru » ći.

Taa tani yê Yûsuf Šuha yê Yîdi Sali yê ma lukar.

Yogodi-ĩ gubudi ći ; tunda sohi tîyo. Tugurkurã yogodi-ĩ
tiri bui-ĩ yusobu ćirri hi ćuruk. Šêrehedin kunu metur kor
gubudi tewo, tani sus nuru tus.

« Šêrehedin nûgoi ? » ći

Tani hadiriadu : « Ma gubugo a di mîne ćûo » nar.

Šêrehedin yuhadiadu : « Ndû hananuũ ? » ći.

Tani hadiriadu : « Mîne ćûo, sûgoi zabsu » nar.

Odu Šêrehedin ćiidi zabtunã, yogodi-ĩ ŋisćunu karaha-ã du
ćakunu ćai li yuhadiadu : « Mbo sôgodi nurã ha šîgitu
nurduũ, nogor a hi ndedî njî » ći.

Tunda kôi to hi ćaŋguru, sûgoi sôgodi numa ha lukurú
ndar. Toonu kôi wô ćakunã, tunda ôguzuu bîde lukar. Ma
lukurî kunu allaharćunno, Yibi Somma tigiro. Kôi taa
ôskoro-ã ćûku zaga tiridã haturu yendar. Taa karaha

haᅇguru ma Yibi tuyoopu ted. Yibi tigirtu tîšu tûgohu tohã, zaga tudugandã anna-ã ha hatar.

Ôwonna wô Lîbia du Gûkuni zaga ᅇuidunã yê anna guda-ã zaga daᅇammi du čîkã yê, yogodi-ĩ čirri to hi čubabu Zuar čoᅇã yê Bordo ndûuski-ĩ hi čĩĩ yê yina tada gunna anna-ã ha haturu yendar.

Anna ada Yibi čîkã yina ada tohudã gunna labar yidadú.

Mura yuhati : « Allači Yîrei mi mbo tûgohu tôlhun-ã du haᅇgurã, yuhadi : Dûnogi saa arbaa tohoo, nûᅇguru nendiri čunu tuyuhatã gunnoó, de Zuar ni toburdo. Bordo ni gorsu du čûkudo kordu labar tadorú » čuo.

Tunda mura hatiri : « Nû nura yê yala nduã yê gunna numi-ĩ du mosu njûo ; ôrdi-ĩ ni dí Toonu a ma liĩ čî. Muro yunu yida čĩĩ tunda ha kegirtiyundu, anna-ã ha yuhatu, bûnno hundã čokuo, či. Čokundunnoó, tani ôskorie du tigiri čunno, yunu to yida liĩ čî nura ni yala nduã taduũ numi-ĩ du mosu njîkã a ᅇga koo tohi » ndar.

Kôĩ taa anna Gûroa yê anna šiša ômure murta díšee kora čûo.

Mura yuhati : « Tunda yunu a gunna labar tadorú ; yunu a tûrtu tohudoo, tunda nozom gundiri » čuo.

Tunda hatiriadu : « Tunda yunu kohudurã gunna yogoda-ã ha arrai ndur du dugusa subua kor turturu anna-ã yuhado ndiri. Nû anna buya ndurã yugondú čundu tuyuhatudo. Nuro ni kunu garru nduru hatiri » ndar.

« Nura anna numi-ĩ du njĩkã, yala nduã yê yunu nduũ tadumma gunna zaga numi-ĩ du yiga torkiĩ sugandu » ndar.
« To gunnoó, yogodi-ĩ ôskorie du numi-ĩ lido tohoo, yunu bibiyinĩ budi bui ; yunu to nura hôkorndu » ndar.

Anna-ã yuhati : « Budi gali » čuo.

« Odu yunu gunna haturu yendar. Tani allahar tohoo, bu kôĩ tôlhun-ã čĩĩ tigiri Allači hi waha torri » nar.

Allahar ma Čêni dahu tigiri. Tôlhun-ã kohirĩ, Allači hi haŋurdo yugó. Šilman Kalia ha haŋaar.

Šilman tuyuhadi : « Zuar numi-ĩ tobur. Yogoda-ã môore du balatûgi činakĩ čũkã gunnoó, aũ numi-ĩ du čĩde yugó. Tunda yarkuru ôro ême-ã su tĩyo. Nû mannu êmmi dahu-ã su tĩyi tôlhun nendirĩ tĩyi » čĩ.

Tani hadiriadu : « Allači mbo anna-ã ha wačunu tôlhun nendirĩ čunno, nû tani kôĩ tôlhun-ã čĩĩ tirĩ muro hi haŋurdo yugó. Odu anna aya čĩkã četu yunu čĩĩ haturu zabtidindi » nar. « Ôwonnĩ wô Lĩbia du yina tohudã Gũkuni zaga ŋuidunã, nû ni ŋui hunã kunu wosuã yê ayĩ hunã morčĩnã

na, yina ada gunna basú haduru yer. Ôwonna anna murta tuzoo sã hoo kora gunna daŋammi di čikã, tada ni gunna ŋgullahada, labara ada gunna haduru yer. »

Tîšu togi-ĩ tûgohu, saa hoo êredie Hurãs šiĩ nakirî tîyikiidi, yuhadi : « Ôskoro Hîsenuu-ã kiši Mîskii-ĩ du tûusu ma tigirtî čûo » yunu to koo di yuha.

Sûgoi saa dîšee yê lau šiĩ nakurã, yunu yuhado yugó. Saa sabaa na tumania na gunna yunu yuhado yugó.

Tani anna-ã ha hadiriadu : « Gunnadooni, ôskoro Hîsenuu-ã dî di ma yugurkudo, lidî čûo êredie-ã diki yuhadú. Ôskoro Hîsenuu-ã kiši Mîskii-ĩ du ma tigirtî čûo čunu yuhadî, yunu turo bazudo yuhadî čî » nar.

« To kugî, nura čačabndundu yala nduã čirri hi hituũ, anna ada dî di lidî čikã tada četu hokndundu yunu tohî gunna kohudũwo gali. Tunda dî tigirtu yogoda-ã ha hatiri. Subua tohî korã yala nduã zaga hitiĩ sugandu. Yunu kohudumma gunna yala nduã yihitu » ndar.

Odu tunda tûdugutu allahar kor dî Yibi Somma dahu yenduru lukar.

Yibi Somma ha tugurkuru, kunu, kunu du lukurî dohu budi yesčunno dî tigiuro. Enou du bîde tudugandudo yugonnãá yinǵaldu, kunu sa tuyubo. Aũ guru ni tûuni haki čidaado di

tedú. Anna guru ni zia hundã numia, zaga dakurã ñadu lukurú. Bî-ĩ ni dumosu kîri hunã turkona ha njubi. Lau to Mîski na Yibi na budi kîride. Odu yesčunno Yibi Somma tigirtu tîšo.

Tûgohu yuzogo yernduru, Ômuši tigirtu lau ndurã yê hoktudo. Mahuma Kulliĩ yê Sûnusi Fok yê tada gartiyindĩ čûku, četu zabtudo. Taa lukurî dohu yesčunno dî Widenğur čindĩ, Oozu a ma du čî tigirtu tîšo. Tîšĩ gubudi šaha ndura yadirî, êredie Čad su nakuru tadiriidĩ, labar čûsu čî šĩĩ yinaku čini.

Tunda êredie Čad yunu yidĩ ndû ndiri šĩĩ nakirî, neğurdo yugonnó di saa wahadašur ille kor tohudo yuhadi : « Ôskoro Čadua-ã yê yogoda-ã yê četu Wadi Momor ga gorsu yohudu, anna a kora ni yitar ; a kora ni kubaa yopaar čundu yuhado » či.

« Odu tunda hatiriadu Mîski lau tûrri čûo čundã, a di lidã durtuũ » ndar.

Tîšu togo dûskeyunno saa wahadašur Oozu tigiuro. Tigirtã, yogoda taa čikã ha lahandurã, mura numi-ĩ du čûkã gunnoó, labar ndûi mannu yidadú. Numo toburroo, gorsu gokî čûkoo, anna čatoo, labar ndûi mannu yidadú.

Odu čôhuri Êlikobter barayundu, li tuyoopu Taanuã tiyiigido. Taa Rîfi čî êrbedige yibenduru yenduru, mède

šišaa murdom kora su hatiri : « Tunda yê yogoda-ã yê nogoũ gibi ņila koduroo tadar. Nũ mannu tunda yê mura yê kôidi gorsu tadorú. Anna buya ndurã yugondú ; Zũmuri tũrrudo. Kôidi dugusa tuzoo tohĩ korã lidi. Lidoo, to di bu tunda yê nura yê yunu yibee čũwo, kôidi to hi kohidiri. Tunda nura lau gorsu tadorú nduru, yina to koa êrbedige-ã su yibendurdo. »

Mêde tada layindã, yunu mura budi barayindĩ su yugonnó togus. Mura yunu barayindĩ : « Tunda bũnno ndurã čonĝurdo, Yibi busau Lĩbiaa, tunda hanandurdo to koo yogoda-ã barayindi. Čĩidi, êrbedige-ã karayundu su layindã yunu to koo yugó. »

Gubudi muro êrbedige to sowurčundu wô Lĩbia keyuo.

Odu allahar kor tohudo tunda ha čôhuri hi tũyudutu Sebehe čanĝar. Sebehe du dugusa tuzoo kora tĩšã, ma Yuhura baranjindi čuo. Odu yernduru ma Yuhura tigiuro. Taa ôskor kôpten turo yê hoktudundu yina kohudurã gunna haturu yendar.

« Anna-ã kuba hundã yuakundu yidawo ; gorsu yidadú. Nũ mannu anna buya hundã ha garčindĩ čũo. Tunda mannu sũgoi zabtidindi to koo di tirida nduru haturu yendar. Sũgoi zabtudundu tigirtu anna ada ma čĩkã mosko hundã zaga četu tugurtaĩ yunu to gurtadiri nduru to koo di tunda tiridudo » ndar.

Ôskor kôpten-ã yuhadi : « Yoo budi gali » či.

Mêdi-ĩ du yunu dûli yugonnãá wenege du mura mannu dahu čoŋgi niri. Odu karaha tiyendu ma Tripoli Gûkunii-ĩ yûsurru čuo. Tunda tuzoo ma Tripoli kôî Gûkunii-ĩ tigirtu, Gûkuni hi yina kohudurã gunna haturu yendar. Mura a koo di kediyuo, tunda tigirtã a koo kohudar nduru Gûkuni hi hatar.

Numi-ĩ du yunu tohî čĩĩ, Gûkuni mannu labar yidanú. Yina tada gunna haturu yendar. To di bu zabtudundu Sebehe tiridu aũ nani tigo hunã ted. Dugusa tada du ôskoro Hîsenuu-ã Hada mannu čubapu čoŋo.

SAGAGUNU HADA TOBURRÃ : 1987

Hada toburrudo di bu, tunda Sebehe a tîyikiidi, Gûkuni tôlhun tiyendu, tunda anna buya guru čera ndurã dî kegurčunu yuhadi : « Bu Algerie čabu tadar ; ma yîridu Algerie lukuri » či.

Sûgoi tunda anna baradiyindã čačabtudundu ma Tripoli tigirtu Algerie lukar. Algerie tigirtã hûndug Rasî čindî gunna du gubia čĩ to di čaktiyihido.

Kûši ndurã bugi-ĩ gunna Adum Tôgoi yuhado : « Gûkuni lennoó, tani čanjiri čunu, yina to koa » yuhado.

Odu yogodi-ĩ Gûkuni hi šigiri Adum Tôgoi četu hoksundu čunu to koo di Algerie tigirtu Adum četu hoktudo. Dugusa mundu hakumma yunu yohoo dûli-ĩ, yunu to hi su gurtadar. Sûgoi Njamina du anna kegurčuo. Îbrahim Îtno na Ahuma Lamîn na, anna gubia čĩka dazagada koa gunna kegirčundu, Gûkuni četu hoktuo.

Kôï to hi muro mêde hundã yuhatî, hûndug-ã su ôburi kor yîšu, mêdi yibee čûwo gunna yuhado. Sûgoi yogodi-ĩ čillaa Hada ted čundu tubazo. Aya gowo, taa gowo, bîr korã gowo čindî, sûgoi Wadî Dôm du gowo čundu tubazo.

SAGAHUNU HÎSEN WADÎ DÔM ČODĀ : 1987

Sûgoi Wadî Dôm makar čuo. Êredie dîne-ã ha čĩĩ gunna yuhadi : « Ôskoro Čadiana-ã karahaa yidadĩidi čôhure četu gokĩ, dubabada četu gokĩ, Lĩbia asubu a kor yidĩ, sam 10 yidĩ. Êredie dîne-ã ha lanumma gunna Čad gunnoó yunu gudi yuhadi yugó. »

Odu yogoda-ã gunna abusčundu, Lĩbia du anna šaaba Čadiana čĩkã gunna ha, Sebehe yê Yĩdebi yê Tripoli yê Bãŋgazi yê Kuhura yê kôĩ a Čadiana čũo čundã gunna čoopu daŋai čũuŋo.

Odu Gũkuni, Môsoud su lũyunu yuhadi : « Ôskoro Hĩsenuu-ã četu nookoo, anna šaaba sagahuna du tani hi sohi lidã ha yopuũ daŋai mũkiĩ ; mura ndũ lamar hundu, yopuũ daŋai mũkiĩ njũkã ? » čĩ.

Môsoud yuhadiadu : « Tani duru tarú » čĩ.

Gũkuni zabčĩ Môsoud su yuha : « Duru tammoó, nũ šigiri mêdi hundã waha yodur » čĩ.

Kôĩ to Rahĩs Manani yê Mahuma Makai yê Mahuma Bêšĩr Okor mi yê, tada ôguzuu yê Môsoud yê hokunu, Tripoli keyi. Dohu saa ašura tohã, tôlhun tiyendu, anna šaaba čĩkã gunna daŋammi di yihido čuo.

Odu tîyuku subua kor tohã, Môsoud, sùgoi zabtu li. Êredie Hurãs yina yuhadiã, haki aũ kinenuũ mozîe koo gunú. Anna tuda-ã tira muguna, yogoda-ã kôî tugurkî gunna tira turčundu yogoda-ã ha čitĩ, asuba yogodaa-ã čoopu du čitĩ, čunu, êredie-ã mēdi budi yuhadi.

Môsoud liĩ yuhadiadu : « Kumandu ôro anna kendu, tigirtu, anna ndura čarku čurikî čîkã ha tiri yusopu, čendu čuruwo čî. Anna ndura čarku čurikî čîkã ha yuso čitú, tiri yusopu čeo » čî.

Gûkuni yuhadiadu : « A miškile gunú. Nû muro anna keniri » čî.

Allahar tohã, Adum Tôgoi tani hi tôlhun tiyenu tuyuhadi : « Nuro galndudo ni ? » čî.

Tani hadiriadu : « Galti ndûi ? » nar.

Adum zabči tuyuha : « Gûkuni yunu njuhado yugonnúú ? » čî.

Tani hadiriadu : « Yunu tuyuhado yugó » nar.

« Yoo gali » čî.

Kunu dîgige dîgidem kora tobuzã, Gûkuni muro tôlhun tiyenu tuyuhadi « Dî (kûlop dî peĩ) yîri » čî.

Odu dî tidedî tigrî, Gûkuni yuhadiadu : « Ôro Tû wûdur ga ndedi » či.

Tani hadiriadu : « Wûdur ndûi nar ? »

Gûkuni yuhadiadu : « Ôro Tû ŋgiri anna-ã ha haduũ, yogodi-ĩ čaa čurîi čîi hi tiri yusopu čeo. To koo di ôro ŋgiri hadiĩ » či.

Tani hadiriadu : « Nuro yê Adum yê aya hûndug-ã su nîšu, tani hi ôro ŝigiri anna-ã ha yuha ndiĩ, anna-ã mura Hîsen yê hoktuda ; yogodi-ĩ čôhure yê dubaba yê yunu a yidiĩ gunna du gorsu čenî čî mura weredindî čîkã, nura aya njîkã ha hananjindiin ? Nura hûndugo ho nîšu njîkã, mêde nduã anna ada ŝiĩ činakiin ? » nar.

Gûkuni yuhadiadu : « Čidakoo ni ŝiĩ činawo, čidakoo ni ŝiĩ činakú, tunda anna kendar nduru Môsoud na ha hatiri. To gunnoó anna ndura Lîbia du čîkã ha ŝi yugubasidi, toi yiŋgaldu nuro ôro ŋgiri anna-ã ha wasaga yeĩ, tiri yusopu, yendu, yûhutu, čuruwo nuũ hadiĩ, čidakoo yûhutu čuruwo, to gunnoó yunu yohidiĩ mura hanayindi » či.

Tani hadiriadu : « To kugoo, Hîsen su mannu labarru, anna a kua ôro kenirî tîyi nu yuha » nar.

Gûkuni yuhadiadu : « Yoo gali » či.

Tûgohu tohã karaha yûgurtudu matar-ã tuyoŋu ted.

Taa čôhuri Môsoud hunã ha, tani turonnu hu Algeri a su kônuru Sebehe čaŋar. Sebehe a Mahuma Kulliĩ li yunu gunna četu gurtakuru, tani wô numi-ĩ tided.

Mahuma Kulliĩ hi hadiriadu : « Tani turonnu haki ôro tidedú ; aya numi-ĩ du anna baranuru četu ôro lukuri nuru » hadar.

Odu anna baranirî dugusa ôguzuu tíšã, Alî Šegeĩ yê Bîrahim Barka yê Kôki Mûsa yê mura tada ha yoburu lukuru Bordo tigiuro.

SAGAHUNU BORDO YARI DI TIGIRĪ : 1987

Bordo tigirtã, yogoda-ã mura matar-ã lidu tuyoopu wô numi-ĩ tigiro. Yogoda-ã tuyuhati : « Landu ôro ême ada ha su gunna aũ borsu. Tiyendu taba mannu wûni nakurú. Dohu aũ taba wûni činawo, artas kuhu čendi. Tiyendu ma lukurú. Numi-ĩ gunna kûriyundu yidao. Tiyendu nukurú. Odu nura yunu kohudumma gunna mêdi a yibendu » tiyuo.

Tunda hatiriadu : « Nû ma Zûi tigirtu anna číkã četu gurtakuru, tiridi to di bu ma Zûmuri číkã ha tigirtu durturi » ndar.

Mahuma Kulliĩ hi Bordo a sopuru, tunda guda-ã ma lukurĩ Zûi tigirtã Ahuma Čĩrri yê Sala Ôrboliĩ yê lau hunda guru yê četu tĩnne hunda čoopĩe numi-ĩ du čũku hoktudo. Aũ gudi numi-ĩ du čĩde yugó, čĩidi yogodi-ĩ anna koduro kora čũkudo koo di abusčunu čĩ.

Odu anna tada ha hatiriadu : « Nura ni ndugandĩ niriduda, tunda ni sũbob a taduru tirida nduru » hatar.

Mura yuhati : « Nura yê tunda yê gunna turonnu. Yogodi-ĩ čuruu tedĩe koo ndũ wuturi anna yitirĩ, čidakoo nũ mannu čuruku tũri. Aũ mura ha su bũnnu yodirĩe yugó » čuo.

« Odu tunda Bordo tigirtu yogoda-ã ha haturu ma Zûmuri lukuru, anna číkã četu gurtakuri » ndar.

Taa sokoša ndurã gunduru ma Zûmuri lukar. Tugurkuru tîšu togi-ĩ Zûmuri numi-ĩ tigiŕo. Mahuma Môlimai na Sûnisi Kôso na Mahumai Kêllei na mura anna dîgidem kora čûku tigiŕo. Odu mura ha ni zaga tudugandã haturu yendar.

Mura yuhati : « Budi gali, čîidi bui ndurã Sala Barkai aya yiga kôî turo wûdur yida tedo. Gartu liwo, mêdi turo tadûwo muro hi ni yuhatu, to di bu yunu tohĩ gunna četu kohidiri. Nura yê tunda yê gunna turonnu » čuo.

To koo di dugusa murdom kora tîšã, dohu turo Sala ni li. Yogoda-ã ni Allah čenu dî tiri hakundu čuruwo. Yogoda-ã tûgohu kôî yizi-ĩ hûlčunã asuba hunda kuhuyindî, čuruku tûri.

To koo di yogoda Zûmuri du čîkã čuruwo. Yogodi-ĩ čuriĩ gubudi numo a tedã gunna mîne čûuŕ. Mîne ôze darabčunu aski hi čûduda, mîne tada Mahuma Šegu mi hidiri činî, muro hi su yerčunu čîdo. Sûgoi tunda dugusa dîgidem kora tîšã, Muduruã tigirtu, karaha makuru kûrunduru, bu Dubohur tigirtu, halaŕguru Ôgi tigiŕo. Anna taa čîkã ha lahanduru Zuar tigiŕo. Zuar ga dugusa ôguzuu kora tîšã, dî Njamina lukar.

LÔKO NJAMINA TIGIRI

Njamina tigirtã, Hîsen četú hoktunduo. Yina ada zaga tohudã gunna tuyuhado.

Tani yê Alî Šegeĩ yê numi-ĩ lukuru zabtudundu tigirtã, anna lau ndurã ha čoopu kôĩ Hîsen čĩĩ tũrra, tunda tigirtã karaha turo tuzu gartiyindĩ čĩ tuyoopu ted. Tigirtã Hîsen yunu hunu gunna yuhadu šiĩ nakaar.

Hîsen muro yuhadi : « Gũkuni yunu a ŋgo yidĩ ôwonni yusobo yugó čĩ. Nũ mannu yogoda-ã četú yohĩ čĩ. Yum turo mannu yusobudo yugó. Muro hi ŋuiyundã, mannu hôkorčunno yugó. Yerčunu yina guda du tũusi čĩ. Yunu a nura gunna hôkorndu » čĩ. Mède budi yuha.

Mbo gubudi yuhado, sũgoi halaki su yuha.

Tani Gũkuni hi numogodo yeru hadar : « Yiga lukurdo di bu Gũkuni yogoda-ã četú hoktunu, aũ turo ho gorsu čenê orro di mannu yidanú nuru hadar. Anna ada nũ kôĩ a hi čĩkã du tani sohi tiri čĩidi, Gũkuni yunu to koo yida čĩ tani hananirĩe yugó » nuru yina mundu gunna haduru yer.

Hîsen muro yuhadiadu : « Nuro labara tammoó, tunda labara huna tadar » čĩ.

Njamina numi-ĩ du dugusa čũ kora tĩšã, Ôli Mahuma Kandĩ yuhadiadu : « Numi-ĩ du diŋguru tĩyikã suru yidanú.

Ôro Tû Agun lau karaha nur turo čî četu lukuru makuru zabtudo » čî.

Odu mbia ndura yopuru, Ôli yê Kîniã bûgudi a Muduruã yê tada četu ôro Agun lukar. Tiri tûrizi di dahu du Korodoŋa Čuŋia ŋa ha tugurkuru, Haya tigirtudo yugonnó di Dubohur čaŋguru mbia ndurã dî Bataa hûturu Yibi tigiŋo. Yibi a subua kor tîsã, ôskoro taa Yûsum Gihinni na anna buya čîkã ha tigirtu lahandaar.

Mura tunda ha kunu bursadiyundú. Bursa-ã mannu tuda-ã kôî čûku ŋgirĩ gunna, anna ada anna Gûkunia čindi. Yina guru yuhati. Tani hi ni tîyĩ gunna aũ Gûkunii čindi, didi bursadiyundú.

Kôî taa dugusa dîšee kora tîsã, Ôli yuhadi : « Kîhilã ha tigirtu lahanduru, togo lukuroo gali » čî.

Odu tûgohu, karaha-ã batêrie yidanú ternduru četirîe yerčunnó togus.

Ôli yuhadi : « Karaha-ã terndĩ nugondú. Toi di yerčini yugó » čî.

Tani hadiriadu : « Yerčunnoó, a di gudi haki terndurú » nar.

Tidedu tobus. Mura terčindî čîkiidi karaha-ã yerči. Yerčiniã, yîri lukar čuo.

Tani hadiriadu : « Tidedú nar, mbo karaha-ã tertĩ nugondú činã, maidiyunu êrbedige nur turo karanirî tobus. »

Mura tûri. Kunu dîgige murdom sã hoo kor ndurã mân sauyi. Tani luuru bîdi wô kombommi tigiri.

Ôskoro-ã tuyuhati : « Karaha ndur čuruudo yugó ; karaha nduũ čuruudo čîn ? » čuo.

Tani hadiriadu : « Suguĩ Azai mi hi Ôli dîhi hunu dî wonnoko to di hayi čî lahayinîe ted » nar.

Mura yuhati : « To karaha nduma su mân yerčunno, ôskoro-ã waha yodurkîe tûri » čuo.

Ôskoro-ã tigirtã Ôli na ha su mân yerčunno, Bokoriĩ so-ĩ togurkudo ; Wordugu Sugĩ mi ši bazudo. Guyundu yigiido. Ôli ni ŋgullahado.

Tunda hatirîadu « Karaha ndur a ni nohudo. Ndû kohuduroo gali » ndar.

Odu chef da P.A. karahado yuhadi : « Dî Agun kôî karaha nduma čĩ nigitiiri. Karaha nduũ taa čĩ makuũ niridu ada ha yopuũ ndûrie koo tani dî nigitiiri » či.

Odu kôî karaha-ã čĩ tigirtu, karaha-ã ha wallanuru, ma Bataha tirĩ, Yûsum Gihinni na anna bîrigada čikã yugurkã tuyuhati : « Ôli na čôhuri-ĩ su tûri. Nuro hi mbi taa čĩ čoŋu

Haya li. Tunda Hayaa garndiri čuo čundu yuhado. Nû tunda četu Haya lukuri » čuo.

Čiidi mêdi-ĩ Ôli na yuhatudo yugó. Mura môore yibeyundu yuhatudo. Tani kugiĩ aya čûwo Lîbia Gûkunii-ĩ čaa tedi čundu, mêdi a yibeyundu yuhatudo. Odu mura četu Haya lukar. Haya tigirtã, ada Njamina čûo. Lôko to tólhuno mannu yugondú ; numi-ĩ du dugusa tîšido. Karaha Ôlii-ĩ yibenduru gali tohã, sûgoi Ôli muro ma Haya tigiri čunu wašigirči.

Tani hadiriadu: « Halas yîri » nar. Garnirî Ôli muro li. Tani ni aya Hayaa karaha nur zondudo čî yibenar. »

Tani Ôli hi hadiriadu : « Dgo nuro Yûsum na ha wašinuũ, mbi taa čĩĩ čoŋu kumayi Haya li nuũ haduũ » nar.

Ôli yuhadiadu : « Tani yunu to koo hadurdo yugó. Čôhuri-ĩ liĩ tuyoopu matar-ã tûrrã gunnoó, yunu to koo aũ hu wašinurdo yugó » či.

Tani hadiriadu : « To yunu aba kazu čendu mura yuhatudo. To koo di tani mannu mura četu Haya tiri » nar.

Sûgoi kôĩ taa tîyikiidi, Ôli odo hunã ma Tirenu a, karahaa guru čûku asuba-ã yopuri čindî, mîne aski hi čûku gibi tûsuda, mura ha su yerčunu Ôli odo hunã morči.

Odu Ôli sudaga yibeyunu, Haliki Tîdei mbi tiyendu, dî Njamina lukar. Njamina lukurî, karahaa tuzoo tadar. Darkoro ho tugurkuru, Kîrdiî tigirtu, kuyo kuyo di lukurî, tani yê Hasan Kalîbu yê Mahuma Šêgi yê Ôli muro yê lukurî tiri-î hi karaha Ôlii-î zonji. Tunda guda-ã lukurî Daguna tigiro. Daguna tigirtã Abdalla Nasur ŋgo aũ lau ndur.

Ôli adibi hunã ba hunu, muro yuhadiadu : « Dî ndûrrú. Dugusa čû kora kôî a di tîšu, kartaa ndura bapuru kuyodi yûsurru čunu orrodiyuo. »

Dugusa čû kora tîšã, yernduru Njamina lukar. Njamina saa wahadašir kor tigirtu yaabi Ôlii-î čaŋgar. Bokoriî ŋgo mîn su yerčunu so-î togurkã, so hunã kunu kayunno, bosu čûku tigirtã, bûre hundã budi wuda.

Tani mura ha hinar : « Numi-î ŋgullaha ni, nura wosa ni » nar.

Mura yuhati : « Tunda ŋgullahada » čuo.

Tani zamuru hinar : « Numi-î ndû zondu tohu » nar.

Mura yuhati : « Tuda čîkã gunna ha čoopu daŋai čûuŋo » čuo.

Tunda hinar : « Numa ? » ndar.

Mura yuhati : « Arakûduski » čuo.

Tunda tiridĩ dugusa čû du gubudi tudo čĩĩ gunna ha čonĝu daŋai čûuŋga ; tudo gudi orro do čide yugó.

To di bu numi-ĩ du tĩyikiidi, Mahumai Kêllei tedĩ li. Lahadiyindã hidiyundu : « Numa niridudo » čĩ.

Tani hadiriadu : « Dugusa tuzoo kora du tiro » nar.

Sûgoi zabči tuyuha : « Numo a di mozú » tiyi.

« Tani tigiri Hĩsen su durru haduru, anna ada daŋai mûkuã, munduga-ã yunu Gûkunii yidadudo yugó. Dikindu daŋai čûuŋgã gunnoó, yunu miškile yidadudo yugó nuru » hadarã, Hĩsen yuhadiadu : « Tani anna diŋuru daŋai mûurie nûgoi Ramadan Mouscou hu daŋai dunurdã » čĩ.

Nuro hi soũ dunji njida « To kugiĩ yanuũ tawo gali » tiyi.

Tani hõkorniri lobtiyinã, Njamina tirĩ aũ četu hoktudundudo yugó. Yunu zondu kohuru hananirĩe yugó. Tuduyinĩe koo, anna guda-ã koo yuso tuduyi nuru diŋuru numi-ĩ du tobus.

Numi-ĩ du subua kor tobuzã, yum turo Hasan Kalibû, muro suag Gihinii, wô tigiri Gihini hi lahayinã, Gihini yuhadi : « Dga di kuruũ ? » čĩ.

Hasan Kalîbu yuhadi : « Haya du tiri » či.

Gihini zabči hiyi : « Wunana četu niri ? »

Hasan Kalîbu yuhadi : « Ramadan Mouscou mannu četu tiro » či.

Sûgoi Gihini yuhadi : « Ramadan Mouscou hu yuha, togo tûgohu li durrîe daaru » či.

Hasan Kalîbu li tuyuhadã, tani yaabi hunã hananurú ; togi-ĩ Hasan muro li tuyoŋu wô ted.

Tigirtã Gihini yuhadi : « Wô bûro nurã lukar » či.

Odu četu wô bûro hunã tigiuro. Tigirtã anna tuda-ã zaga daŋai tûusã gunna tuyuha.

Gihini yuhadiadu : « Anna-ã Gûkuni četu nûkundi, yina guru yohidî čûo. Tunda mura ha enou du soũ hûi di landirî tîyo. Yina yohidiã gunna landirî tîyo. To koo di mura ha yopuru daŋai mûkurdo. Diŋgiru aũ hu daŋai dundurdo yugó. Nuro bu Haya lau njĩ, aũ nuro lau miškile yidado yugó. Tahaũ mannu yidado yugó. Nuro ni ndû mannu dahu du dunũú. Anna guda-ã zaga čîkã ŋadu numi-ĩ du sobus. Nôuši walla ndû mannu kusar numa du dunũú » či.

Tani hadiriadu : « Hadiĩ koo di tani ma Haya du t̃yi, Ôli karaha hunu turo ndoĩa lukar. Tunda ni yunu gudi orro di tadurdo yugó » nar.

Gihini yuhadiadu : « Yoo budi gali » ċi.

Yina tada ċetu gurtadirĩ Hĩsen t̃lhun ċenu yĩri ċi.

Odu yerċunu w̃ Hĩsenuu-ã ted. Wenege du w̃ Hĩsenuu-ã t̃girĩ yuhado toguso ; tani kugiĩ Haya du lido ; aya ċetu t̃yo ċunno. Sũgoi dugusa t̃sã, ôwonni Gihini lũdiyunu, k̃i ayĩ hunã na dadaa hunã na ŋgo numi-ĩ du zaga ċetu t̃yikã gunna yuhadu tiye. Ôwonni tuyuhadi : « Sũgoi mannu yunu guru w̃dur nuũ walla, yunu guru dahu ñjubaboo, yĩri ten » ċi.

Odu tani luuru tided. Sũgoi Gihini yê hoktudundudo yugonnó di dugusa t̃sã, tani yê Ôli yê karahaduda, Ôli karaha-ã ċusċini. Lukurĩ t̃yikiidi, karaha Gihinii-ĩ orokum hunã hananiri durũwo, Ôli hi hadar : « Bu karaha a Gihinii-ĩ » nar.

Ôli hidiyi : « Ŋga koo di hananuũ ? » ċi.

Tani hadiriadu : « Orokum hunã hananiri » nar.

To koo di sohi kuyo, kuyo di lukurĩ, Gihini sohi t̃yikã gaza-ã du hanadiyuo. Tunda lukurĩ *ministère défense*, *palais gouvernement* lôko to gunna k̃i turonnu hu ċũo.

Odu kôï to du tûduusu, bu *ministère défense* lukurîadu tîyikiidi, Gihini kôï di kabkurčunu, tedî li. Liĩ, Ôli mbo hûni duyî yida. Hûni-ĩ yodurã, Gihini hanayunu yigazu, « Anna ada mbo sohi čîkã anna ndu koa nuru, tani mannu kuyonã du tidedî tîyi » čî. Sûgoi tani hi tuyuha : « Dûnogi tohoo wô bûro-ã yîri nudurîe daaru » čî.

Ôli yuhadi : « Tani mannu wûdur nur zogo četu tigirti » čî. Dûnogi saa arbaa kor tohã, tunda ôguzuu, tani yê Adumai yê Ôli yê tigiro.

Tigirtã Gihini yuhadi : « Yunu turo hinindiri čî. Anna ada Lîbia du lidã, anna ndu kua, ndû baradia lidudo. Mura ni wunana, ndu koo di lidudo » čî.

Tani hadiriadu : « Anna ŋgo migiza, Lîbia du čûo. Miškile ndûi mannu yidadú. Enou du Lîbia du čurukîe čidaku, to koo di hakumma kegurčunno, lidî čûo ; Malumma Adum na aŋgalda ŋgo sôura-ã du čûo. Anna sôura-ã hûi činakã turo, nû duna yina tadaa yidadú. Zaga Čad lidî barayindî čîkã gunnoó, yunu miškile ndûi mannu yidadú nuru » hadar.

Ôli mannu to muro koo di su yuha.

Gihini yuhadiadu : « Tani mbo anna sôura yohidia nirî gunnoó, mbozoo, turo, turo du numi-ĩ du tar hitiriadu tîyo, čîidi a koo tûrtuo miškile gunú čî. Yunu to hi Hîsen, Sala

Barkai hi mannu lûyunu hiyi. Anna ada lidã, anna ndu kua, Gûkuni bûnno čenu kegurčunu sôura yohidi čunu kegirčina ada anna ndu kua ? » či.

Sala Barkai yuhadi : « Anna ada du aũ sôura yohîe ŋгаа čî či. Aũ aŋgaldo hundã ni Malum Adum, muro ŋgo tiyetuã hananumũú, aũ malum gibi aŋgaldo. Ada du aũ duna yida, yunu to koo orro di yidado yugó. Anna ada ha yoob. Aŋgalda-ã ha ni yûhu. Kuna-ã ha ni ôskoro du yûuŋ. Nuro lau mannu amba. Anna ada du aũ nuro lau nôrdi yidado yugó » či.

Odu to koo di, yunu to hi su tani ni Gihini hi hadar, Sala ni Hîsen su yuhadã, mura kuba čû du čoŋgu, anna kuna čîkã ha čoopu ôskoro du čûuŋo.

Lôko tunda tuda-ã Njamina tiridã, Hîsen yuhadi : « Anna tuda buya lidã ha horkusa yendu, busaba yendu » čini. « Hîsen anna-ã ha kôî čihinedo yugó » čini. « Tani mannu Hayaa tîyiidi, dî Njamina yîri horkusu njendi, Yûsum Sêid gu (D.A.F) duna ndenno hunu njohidiadu čûo, kumanu yîri » tiyindi.

Tani hadiriadu : « Êrbedige turo yodurku tiyinakudo koo dî tigiri. To gunnoó, anna guru yîri horkusu njendi čindĩ tigirenú » nar. « Mbo tani tiroo, kôî a ômure guda-ã du tûusã du, tani mannu du tîyi » niri.

Umar Tahar kôî B.E.T. ndudomii-ĩ bui-ĩ hi lûyunu hiyi : « B.E.T. du P.A.M kôî mašaa nakiriadu tîyo. Aũ gali barandu tendu » ċi.

Umar yuhadiadu : « Aũ gali barandîe Ramadan Mouscou hu yoŋgu » ċi.

Hîsen zabċi yuha : « Ramadan Mouscou hu tani hananurú » ċi.

Umar yuhadiadu : « »Hananummoó Gihini hi hadũwo lûyi njeni » ċi.

Yum turo yaabii-ĩ tîšu tîyiidi Toke Lûi li Gihini baranjini ċunu ċetu wô tigiro. Tigirtã Umar Tahar mannu bozu ċi yuhati : Hîsen yuhadiadu : « Kubu P.A.M. gu ma B.E.T. yohudu ċunno, nû nohidirî tîyo » ċi.

Odu anna ada P.A.M. buya-ã ċetu hoktudundu. P.A.M. ma B.E.T. bui tuyoho. To koo di Hîsen toburrî korã gunna kôî to taru tîyi.

Odu Hîsen toburudo di bu, tunda tuda-ã gorsu a gunna kohuduru ŋgullaha kûrtudurã, Lôko nani anna-ã du tunda sũgoi tîyikã, kalaka ndurã haŋgurdãã nũgoi nduru yunu to hi su tunda anna šišaa gurtakar. Tunda sôura a kor yibendurã, diri-ĩ anna gudaa kubo di tûusu, tunda a koo tudohudã nduru budi gurtakar.

Sagahunu 1992, ôburi nôguzuu-ĩ du êrbedige 232 su anna h wuluu  ze  end  du tani t yi,  zi *Lieutenant colonel* tiyeo. Tunda anna  ze tundur , anna 36 kora. Allahuza K li na Oki Dagař na tada mannu du   o.

SAGAHUNU ÊĨ KÔNURÃ : DECEMBRE 1993

Sagahunu 1993 ôburi murdom sã çû-ĩ, tani yê Adiliĩ Êyi yê Darkala Tahar yê Adum Adiliĩ yê karaha tañaã taduru ôro Tû tigirtu yunu çĩĩ gunna ôroña waha torkar nduru sôortudo.

Odu horkusu a P.A.M. du tarã soburu ôro Tû lukar. Ôro du tîyuku, anna ndura çetu nogoũ nakirî, çûnguru landurã yunu a kohidirî tîyikã, yunu su gûmburi tîyikudo yugonnãá, yunu bibide guru kohuduroo gali nduru, yum turo dohu Bordo tigirtu bapar.

Bordo bapurã, Adum Adiliĩ mi morçi. Tunda guda-ã ngullahada lukar. Lukuru dí Ôhudui yê Hugosu yê kôgoi to di tigirtu tobuzo. Kôï to di tîyikiidi Adiliĩ Êyi hi Lîbia yusu zia yê tandaa yê anna yê kibindar.

Tunda guda-ã kôï to di tobuzo. To koo kohudurã, anna ndura bûgude Bordo çĩkã gunna çabtundu Bînige lidu bozo.

« Ka galagurçundu, gorsu a kohidĩĩ njĩkã tunda dakurú. Dahu tigrirtenú. Numo ndurã ngo ši bazudo. Nû ni ši bazi. Yunu a gunduũ tadumma yusopu » çuo.

Odu anna kegirçindi, de tunda mêdi mannu ndurú ; yohidĩ ôburi di bu Bînige du bozo.

Odu Adiliĩ Êyi ŋgo wô Lîbia kendurã li. Adiliĩ liĩ tunda sôortudundu hatiri : « Anna-ã ni a koo čindĩ čûo, nuro ni Lîbia ndewo yunu haŋummo yugó, ndu koo kohidiri » ndar.

Mahuma Nûriĩ na Okiĩ Dagaš na mura tada yaradu Bînige lida čûo. Tunda landurã yunu ndurã gubia tedĩ yugó. Mura četu gurtakuru nogoũ nakaar.

1995 Njamina tiro. Njamina tiridĩ gubudi tani hi G.N.N.T gîmie-ã bui-ĩ kubo duna ndenno hunu du tiyinawo.

Lôko šera dînee-ã busau Oozuu-ã Čad su čendĩ, Dêbi muro Bordo li, tani yê hoktudundu yina mundu gurtakar.

Dêbi yuhadi : « Nû tani yê nuro yê ôzi ndurã tîrize. Nuro aya niri mozu ŋjĩ tohú. Njamina yîri horkusu gunu, tani nuro hi ôzi a kor neru, nuro aya mozi tohú » či.

Tani hadiriadu : « Ôzi-ĩ nû nuro hos-toruũ temma gunnoó, ŋgo enou du tar. Nû tani nuro hi budi šukurniri » nar. To hadiriĩ, tani mannu yusona nurã kôĩ tuhukidiadu čûkudo kordu hananiriĩ yingaldu Dêbi hi mannu mêdi dunodo kuhu yer.

Adiliĩ mannu Dêbi četu mêde dunada kuha čao. Adiliĩ tûuni kordu Dêbi hanayunú yuhadiadu : « Nûgoi ôskor koo di mozunnãá » či.

Adiliĩ yuhadi : « Tani ôskor gunú » či.

Dêbi yuhadi : « Tani ôskoro baraniri, nuro ôskor gunnoó yerru yuruk ! » či.

Adiliĩ yerči čuruu ted.

Odu tani yê Dêbi mêde ndura gurtakuru, muro ni čuruu Njamina ted. Tani zogo sohi dî Njamina tigrĩ G.N.N.T. du horkusu nurã tiyeo. Horkusu to di tîyiidi, Mahuma Salê Birahim četú mêde ndurã su tûrrú, tani hi tuyoduro. Sûgoi *coordinateur adjoint ministère intérieur* kedyuo.

Kôï to di tani yê Ahuma Makai yê četú tîyikã, tunda čûu na ôze *Lieutenant colonel* tadar. Yum turo Ahuma Makai tuganî čîidi, aũ hunu hanayinîe turo yê hoktundã, amma Ahuma ha hiyi : « Ôzi numa ndû činã ? »

Ahuma yuhadi : « *Lieutenant colonel* » či.

Amma zabči hiyi : « Nûgoi *lieutenant colonel* ôzi a ŋgo enou du tammuũ ? » či.

Ahuma yuhadi : « Enou du tar čîidi, aũ ôzi nurã ôro kideki tiyenîe yugó » či.

Amma yuhadi : « Čer numa yê orokun nuũ matîrikul-ã yê te » či.

Ahuma čer hunã yê orokum hunã yê yuhadu če.

Kôï taa Ahuma amma ha yuha : « Ramadan Mouscou mannu enou du *lieutenant colonel* aũ ôzi hunã ôro kideki čenê yugó. Muro hi mannu kohuũ yewo gali » či.

Amma yuha : « Čer hunã yê orokum hunã yê te » či.

Odu Ahuma tigiidu če. Dugusa murdom tohunnó di ôze ndurã *colonel* du yuguruwo.

Mahuma Salê Birahim yuhadi : « Nura *coordinateur* du njîkã tani kinnú ôze haŋgumma, kôï a di nûhuturu mosú » či.

Mahuma Salê tigiri *ministre intérieur* ha yuhadidu : « Anna Kinnú ôze *colonel* hakuo. Kôï a di yihidu te. Anna nura mûuri » či.

Odu kôï to di bokundu tiyihido. Sûgoi *ministère armée* du *directeur de l'administration* čindĩ kôï to di tûyududo.

Kôï to di sagahuna čû kora tobus. To di bu *direction* to sarčundu yugonnó yoho. Tani hi halakundu wur ndenno *état major* gu tiyinawo. Kôï to di du tîyi, lanurã kara nurã budi bui gunú. Dgo *diplome B.T. S comptabilité finance* yibenurdo ôwonni *management* čindĩ, su yibenurdo. To kugiĩ *ministère finance* tidedu taa tobuzoo, yala nurã taru kunu tobuzunnũú nuru, bu *ministère finance* êrbedige

yibenuru yer. Lôko to Mahuma Nûriĩ ċi guduyundu bu du tobus.

Kôï to di tîyikiidi, bokundu *rétraite* kediyo. To di bu Mariam Mahamat Nûr yuhadi : « Diñuũ njĩĩ suru yidanú dí H.C.N.D. du kôï anjaa-ã du šigiri sobus ċi »

Odu kôï to di du duduyo. To di bu horkusu hakummaa gudi turnurdo yugó.

Odu horkusa dahu nurua ereda nura yibenuru du kohirî tîyi. Nû *rétraite* nur ni tar. Kînjige nura ni kohirî tîyi.



Décoré par le Ministre de la Défense Nationale le 20.09.2024



Recevant l'attestation des mains du Ministre de la Défense Nationale



Photo de famille le jour de la décoration

L'histoire et les étapes de l'invention d'une arme lourde.

